

LEVÍTICO-GARDA

LEVÍTICO

GEBE-SOGLENAID

Garda-nug

Levítico-Garda. We-garda, Garda-Sogataled-sogbaagwadid. Septuaginta-gardagi Griego-gayaba, *Levítico'ye* onugsasmalad. We-garda, Hebreo-gayabardina, *Wayiqrá'ye* nugad, “Ese-gochadye” sogleged. Leví-wangani sunmaknaid.

Levítico-Gardagi weyob sunmaklenaid

Leví-wagan-abala dule-irwa-Bab-Dummadse-gormaladga-ARBADII gusmalad. Baigandi (Levita'mar), Bab-Dummadga-ibmar-imaklemalad-*IMAKDII* gusmaladid. We gardagi we-igar-mamaidgi sunmaklenaid: Ibmar-Bab-Dummadga-*IMAKLEMALOEDGI*, Bab-Dummadse-goled-neg-akwemaloedgi, Ibamar-onolemaloedgi, ibmar-ise-gullemaloedgi, ibmar-nabir-gullemaloedgi sunmaklenaid. Deginbali, Bab-Dummad-Jehová, Israel-dulemar-e-Bab-Dummad-swilidiki maidgi, degi, e-dulamar igar-*ISLIDIKID-MAGAR-ITOGEDGI* bur bule we-garda sunmaknaid.

We-gardagine, weyob ilemakar sunmaklenaid:

1. Bab-Dummadga-ibmar-ukleged-igar (1:1—7:38).
2. Dule-irwa-Bab-Dummadse-goled Bab-Dummadga nugsalesad (8:1—10:20).
3. Igar-swilidikid, degi, igar-swilidiksulid (11:1—15:33).
4. Isgued-Elileged-Iba-igar (16:1-34).
5. Islidik-gued-igar (17:1—25:55).
6. Dulegi-ise-nued-binsaleged, degi, dule-ukabsaleged (26:1-46).
7. Bab-Dummadga ibmar-nugsalegarmalad (27:1-34).

Be itogua.

1. BAB-DUMMADGA-IBMAR-UKLEGED-IGAR

(1:1—7:38)

Bab-Dummadga-ibmar-ogumakar-ukleged-igar

- 1** ¹ Bab-Jehová dulemarbo-ambikued-neg-akar Moisés'se gochad. Agi ega sunmaksad, ega sogsad: ² “Israel-dulemarga be sunmake, ega be soge: ‘Bemar Bab-Jehová’ga ibmar-ukleged ukega sedanimalale, sunna moli-bebe-nikad-sedamalad, igi, sibat-wawaaddibe.
- ³ Ar dule-gwensak Bab-Jehová’ga moli-bebe-nikad ogumakar ukele, we-moli-bebe-nikad machered guergebed, swilidik, gwen boni-nikasuli guergebed.
- We-ibmar-uklenaid, Bab-Jehová-dulemarbo-ambikued-neg-e-yawagak-dogedgi uklegoed, adi, Bab-Jehová nabir we-ibmar abingaegar.
- ⁴ Dule, moli-bebe-nikad-sapingwagwad-ogumakar-uklegoed-e-nonogi na e-argan mesoed.
- Deyobi, dule-e-igsawed-elilegegala, Bab-Jehová we-moli-bebe-nikad abingaoed.
- ⁵ Geb degine, dule, Bab-Jehová-asabin we-moli-bebe-nikad-sapingwagwad-e-dukard egwannoed.
- Geb Aarón-masmala-dule-irwa-Bab-Dummadse-gormalad, Bab-Jehová’ga we-moli-e-abe ukoed.
- Geb sorbali, moli-abe ibmar-ogumakar-ukleged-aila-e-dikarmargi bomi-bomi imakoed.
- We-ailade, Bab-Dummad-dulemarbo-ambikued-neg-yawagak-dogedgi siid.
- ⁶ A-sorbali, moli-bebe-nikad-sapingwagwad-e-uka edaroed, geb e-san goa-goa imakoed.
- ⁷ Aarón-masmala-dule-irwa-Bab-Dummadse-gormalad, ibmar-ogumakar-ukleged-aila-birgi sapanmar urboed, geb soo ogamaloed.
- ⁸ Geb Aarón-masmala-dule-irwa-Bab-Dummadse-gormalad, moli-e-san-goamakaled, e-nono, degi, e-samurgi-gwallu-nanaid ibmar-ogumakar-ukleged-ailagi soo-gasiid-birgi urboed.
- ⁹ Dule-ibmar-uknaid, moli-e-samurmar, degi, e-malimar, diigi enukoed.
- Geb dule-irwa-Bab-Dummadse-goled ibmar-ogumakar-ukleged-aila-birgi bela ogumakoed.
- We, ibmar-ogumakar-uklegedid, Bab-Jehová’ga soogi-ogumakar ibmar-ukleged yeer-yapannedid.’ ”
- ¹⁰ Bab-Jehová Moisés’ga sogdebalid: “Ar dule-gwensak anga sibat-wawaad, igi, sibaddibe ogumakar ukele, we-ibdurgan-machered swilidik, gwen boni-nikasuli guergebed.

- 11 We-dule, Bab-Jehová-asabin ibmar-ogumakar-ukleged-aila-dad-nakwed-argan-sapiledsik, sibat-wawaad-machered-e-dukar egwannoed.
Geb Aarón-masmala-dule-irwa-Bab-Dummadse-gormalad, sibat-wawaad-e-abe, ibmar-ogumakar-ukleged-aila-e-dikarmargi bomi-bomi imakoed.
- 12 Geb sorbali, we-dule, sibat-wawaad-e-san goa-goa imakoed.
Geb dule-irwa-Bab-Dummadse-gormalad,
sibat-wawaad-e-san-goamakaled,
e-nono, degi, e-samurgi-gwallu-nanaid ibmar-ogumakar-ukleged-ailagi, soo-gasiid-birgi urboed.
- 13 Dule-ibmar-uknaid, sibat-wawaad-e-samurmar, degi, e-malimar, diigi enukoed.
Geb dule-irwa-Bab-Dummadse-goled ibmar-ogumakar-ukleged-aila-birgi bela ogumakoed.
We, ibmar-ogumakar-uklegedid, Bab-Jehová'ga soogi-ogumakar ibmar-ukleged yeer-yapannedid."
- 14 Bab-Jehová Moisés'ga sogdebalid: "Israel-dulemarga be sogo: 'Dule-gwensak Bab-Dummadga nuumar-ogumakar-ukele, sunna sapur-nuu, igi, wagnuu-mimmidibe, Bab-Jehová'ga uked.
- 15 Dule-irwa-Bab-Dummadse-goled ibmar-ogumakar-ukleged-aila-birgi nuu mesoed,
geb agi e-ibe dukar ungoed.
Geb nuu-abe ibmar-ogumakar-ukleged-aila-dikarba eogoed.
- 16 Dule-irwa-Bab-Dummadse-goled, nuu-e-masgammu, degi, e-samurmar onioed.
Geb bia buru milege, ibmar-ogumakar-ukleged-aila-dikarba, dad-nakwedsik mioed.
- 17 Agine, nuu-saban egaoed,
geb sakangi-gani negabar onaboed.
Geb degine, dule-irwa-Bab-Dummadse-goled, we-nuu, ibmar-ogumakar-ukleged-aila-birgi soo-gasiidgi ogumakoed.
We, ibmar-ogumakar-uklegedid, Bab-Jehová'ga soogi-ogumakar ibmar-ukleged yeer-yapannedid.' "

Dog-nuedye-sogega ibmar-ukleged

2 ¹Bab-Jehová Moisés'ga sogdebalid: "Israel-dulemarga be soge: 'Dule-gwensak anga ibmar-gwag-gulleged ukele, e-madubur-burnued sedagoed. A-madubur-birgine, olivo-gwallu, degi, ina-wawadikid eogoed. ²A-sorbali, we-dule, Aarón-masmala-dule-irwa-Bab-Dummadse-gormaladse we-madubur sedoed. Geb dule-irwa-Bab-Dummadse-goled, argan-nukgwen, we-madubur-olivo-gwallubo-oburaled, degi, ina-wawadikidmala suoed. Geb dule-irwa-Bab-Dummadse-goled, we-madubur ibmar-ogumakar-ukleged-ailagi ogumakoed, adi, ebinsamalaga we-ibmar-gwagmar Bab-Jehová bemarga ukmaid.

We, ibmar-ogumakar-uklegedid, Bab-Jehová'ga soogi-ogumakar ibmar-ukleged yeer-yapannedid. ³Ibmar-ukleged-obichaddi, Aarón'gadga, degi, e-masmalagadga guoed. Bab-Jehová'ga soogi-ogumakar-ibmar-uklemalad-bamaladba we-ibmar-ukleged bur-ise-islidikidid.

⁴”Ar be Bab-Jehová'ga ibmar-gwag-gulleged soogi-yoar uknaile, ega be madu-olo bur-madubur-nuedgi-imakaled-inasulid, olivo-gwalluba-omukualed be ukoed, madu-dibyaled-inasulid, olivo-gwallugi-magaled be ukoed.

⁵”Ar be Bab-Jehová'ga ibmar-gwag-gulleged dibyar ukele, bur-madubur-nuedgi-imakaled-inasulid, olivo-gwalluba-omukualed be ukoed. ⁶We-madu-dibyaled, be bisge-bisge imakoed, geb olivo-gwallu be egi eogoed. We, Bab-Jehová'ga ibmar-gwag-gulleged ibmar-uklegedid.

⁷”Ar be Bab-Jehová'ga ibmar-gwag-gulleged bormogi-duar ukele, bur-madubur-nuedgi-imakaled, olivo-gwalluba-omukualed be ukoed. ⁸Weyobi, ibmar-gwag-gulleged we-ibmarmarba guagwar-imaklesad, Bab-Jehová'ga be sedoed, degi, dule-irwa-Bab-Dummadse-goledga be ukoed. Geb agine, dule-irwa-Bab-Dummadse-goled ibmar-ogumakar-ukleged-ailase sedoed. ⁹Agi, dule-irwa-Bab-Dummadse-goled, argan-nukgwensaar we-ibmar-ukleged ogumakoed, adi, bemar ebinsamalaga: Ani, Bab-Jehová, an bemarga bela ibmar uked. We, ibmar-ogumakar-uklegedid, Bab-Jehová'ga soogi-ogumakar ibmar-ukleged yeer-yapannedid. ¹⁰Ibmar-ukleged-obichaddi, Aarón'gadga, degi, e-masmalagadga guoed. Bab-Jehová'ga soogi-ogumakar-ibmar-uklemalad-bamaladba we-ibmar-ukleged bur-ise-islidikidid.

¹¹”Be Bab-Jehová'ga ibmar-gwag-gulleged-ukleged-ukedi, bipisaale madu-inaba, degi, achanisba be oburosulid. Ar ade, Bab-Jehová'ga soogi-ibmar-ogumakar-ukleged bipisaar madu-ina-nika, degi, achanis-nika ogumaklegosulid. ¹²Bab-Jehová'ga gebe-ibmar-sanmaksamalad-uklegedbali, achanis, degi, madu-ina be ukoed. Degi-inigwele, Bab-Jehová'ga ibmar-ogumakar-ukleged-ailagi ibmar-ukleged-yeer-yapannedyobi be ukosulid.

¹³”Bela ibmar-gwag-gulleged-ukleged, baluba be imakoed. Ar balu Bab-Dummad-bebo-igar-mesisad-e-wilub gued. Degisoggu, bela be-ibmar-uklegedgi balu be mesoed.

¹⁴”Bab-Jehová'ga ibmar-gwag-gulleged-gebe-sanmaklesad be ukele, soogi e-warmarbela be yooed, degi, e-gwagmar-nagale be ukoed. We, be-ibmar-gwag-gulleged-gebe-sanmaklesad-uklegedid. ¹⁵A-birgine, olivo-gwallu, degi, ina-wawadikid be eogoed. We, ibmar-gwag-gulleged-uklegedid. ¹⁶Dule-irwa-Bab-Dummadse-goled, argan-nukgwensaar, we-ibmar-gwag-nagaled-olivo-gwalluba-oburaled, degi, bela ina-wawadikidmala ogumakoed, adi, bemar ebinsamalaga: Ani, Bab-Jehová, an bemarga bela ibmar ukmaid. We, Bab-Jehová'ga soogi-ogumakar-ibmar-uklegedid.’ ”

Gwenatigwar-guega ibmar-ukleged

3 ¹ Bab-Jehová Moisés'ga sogdebalid: “Israel-dulemarga be soge: ‘Dule-gwensak gwenatigwar-guega anga moli-bebe-nikad ukele, we-moli machereddibe, omedibe, swilidik, gwen boni-nikasulid anga ukoed. ² We-dule, moli-bebe-nikad-ogumakar-uklegoed-e-nonogi na e-argan mesoed. Bab-Dummad-dulemarbo-ambikued-neg-yawagak-dogedgi we-moli-e-dukar egwannoed. Geb sorbali, Aarón-masmala-dule-irwa-Bab-Dummadse-gormalad, moli-e-abe ibmar-ogumakar-ukleged-aila-dikarmargi bomi-bomi imakoed.

³” ‘Geb dule-gwenatigwar-guega Bab-Jehová’ga we-moli-ibmarmar soogi-ogumakar ukoed:

Samurgi-gwallumar-nanaid,
bela samur-bukwad-e-dikarmargi-gwallumar-nanaid,

⁴ e-mirwa-gwabogwad,
mirwa-birgi-gwallumar-nanaid,
e-dikarmargi-gwallumar-nanaid,
bina-dutugwadgi-gwallumar-nanaid.

We-bina-dutugwad mirwa-gwabogwadba-mesa onolegoed.

⁵ Geb degine, Aarón-masmala bela we-ibmarmala ibmar-ogumakar-ukleged-ailagi ogumakoed.

We-ibmarmar, soo-gasiid-birgi ibmar-ogumakar-ukleged-bukwadmala ogumaklegoed.

We, Bab-Jehová’ga soogi-ibmar-ukleged, Bab-Jehová yeer-yapanne itogedid.

⁶” ‘Ar dule-gwenatigwar-guega Bab-Jehová’ga sibad-wawaad-ukele, we-sibad-wawaad machereddibe, omedibe, swilidik, gwen boni-nikasulid ukoed.

⁷ Ar sibad-wawaad-sapingwagwad ukele, Bab-Jehová’ga uknaidgi

⁸ dule-ibmar-uknaidi, sibad-wawaad-sapingwagwad-e-nonogi na e-argan mesoed.

Geb Bab-Dummad-dulemarbo-ambikued-neg-yawagak-asabin we-sibad-wawaad-e-dukar egwannoed.

Geb sorbali, Aarón-masmala ibmar-ogumakar-ukleged-aila-e-dikarmargi sibad-wawaad-e-abe bomi-bomi imakoed.

⁹” ‘Dule-gwenatigwar-guega Bab-Jehová’ga we-sibad-wawaad-ibmarmar ogumakar ukoed:

E-gwallu,
e-bunnusaila-nagase-sikaled,
samur-birgi-gwallumar-nanaid,
degi, bela samur-bukwad-e-dikarmargi-gwallumar-nanaid,

¹⁰ e-mirwa-gwabogwad,
degi, mirwa-birgi-gwallumar-nanaid,

e-dikarmargi-gwallumar-nanaid,
deginbali, bina-dutugwadgi-gwallumar-nanaid.

We-bina-dutugwad mirwa-gwabogwadba-mesa onolegoed.

11 Geb degine, dule-irwa-Bab-Dummadse-goled bela we-ibmarmar
ibmar-ogumakar-ukleged-ailagi ogumakoed.

We-ibmar-ogumaklegedi, Bab-Jehová'ga masga gued.

12” 'Ar dule Bab-Jehová'ga sibat ukele, Bab-Jehová'ga we-sibat
uknaidgine, 13 na e-argan sibat-e-nonogi mesoed.

Geb Bab-Dummad-dulemarbo-ambikued-neg-asabin sibat-e-dukar
egwannoed.

Sorbali, Aarón-masmala ibmar-ogumakar-ukleged-aila-e-
dikarmargi sibat-e-abe bomi-bomi imakoed.

14” 'Dule-gwenatigwar-guega Bab-Jehová'ga we-sibat-ibmarmar soogi
ogumakar ukoed:

Samur-birgi-gwallumar-nanaid,

bela samur-bukwad-e-dikarmargi-gwallumar-nanaid,

15 e-mirwa-gwabogwad,

mirwa-birgi-gwallumar-nanaid,

e-dikarmargi-gwallumar-nanaid,

bina-dutugwadgi-gwallumar-nanaid.

We-bina-dutugwad mirwa-gwabogwadba-mesa onolegoed.

16” 'Geb degine, dule-irwa-Bab-Dummadse-goled bela we-ibmarmar
ibmar-ogumakar-ukleged-ailagi ogumakoed. We-ibmar-ogumaklegedi,
Bab-Jehová'ga masga gued, yeer-yapannedid. Bela we-gwallumala
Bab-Jehová'gadid.

17” 'Ar bia bemar ambikuoe, bemarga, degi, be-waganga, degisadegu
weyob igar megoed: Bemar bipisaale, ibmar-e-gwallu, degi, ibmar-abe
gunnosurmalad.’ ”

Isgued-ular ibmar-ukleged

4 1 Bab-Jehová Moisés'ga sunmakded, ega sogded:

2 "Israel-dulemarga be sunmak, amarga be soge: 'Dule-gwensak
na wissulidba Bab-Jehová-Igar-Maidgi annasale, ibmar-ise-imakleged
imaksale, weyob ibmar imaklegoed:

3” 'Ar dule-irwa-Bab-Dummadse-goled-e-dummad isgusale, bela
Israel-dulemar-oichononikoed. A-ulale, Bab-Jehová'ga moli-bebe-nikad-
sapingwagwad-swilidikid, gwen boni-nikasulid na e-isgusad-ular, ukoed.

4 Dule-irwa-Bab-Dummadse-goled Bab-Dummad-dulemarbo-
ambikued-neg-yawagak-dogedse, Bab-Jehová'se
we-moli-sapingwagwad sedoed.

Agi, we-moli-e-nonogi na e-argan mesoed.

Geb Bab-Jehová-asabin we-moli-dukar egwannoed.

5 Geb sorbali, dule-irwa-Bab-Dummadse-goled-e-dummad moli-
sapingwagwad-e-abe ichesaar suoed.

Geb we-abe, Bab-Dummad-dulemarbo-ambikued-negse sedoed.

6 Dule-irwa-Bab-Dummadse-goled na e-goo moli-abegi owardikuoed, geb Bab-Dummadse-goled-neg-Ise-Islikid-idu atued-dummad-naidsik, Bab-Jehová-asabin, ilagugle (7) we-abe bomi-bomi imakoed.

7 Geb sorbali, dule-irwa-Bab-Dummadse-goled, we-abe Bab-Dummadga-ina-wawadikid-obupurmakleged-ailagi moli-bebeyob-gwigwichidgi magoed.

We-galu, Bab-Dummad-dulemarbo-ambikued-neggi, Bab-Jehová-asabin siid.

Geb bela abe-gwabguoedi, Bab-Dummad-dulemarbo-ambikued-neg-yawagak-dogedgi ibmar-ogumakar-ukleged-aila-siid-nagagi egoed.

8 Geb we-dule-irwa-Bab-Dummadse-goled, isgued-ular, we-moli-bebe-nikad-sapingwagwad-ibmarmar Bab-Jehová'ga ogumakar ukoed: E-samurgi-gwallumar-nanaid, degi, bela samur-bukwad-e-dikarmargi-gwallumar-nanaid weoed.

9 Deginbali, e-mirwa-gwabogwad, mirwa-birgi-gwallumar-nanaid, e-dikarmargi-gwallumar-nanaid, bina-dutugwadgi-gwallumar-nanaid webaloed.

We-bina-dutugwad mirwa-gwabogwadba-mesa onolegoed.

10” ‘Ar igi dule-gwenatigwar-guega moli-bebe-nikad-uklenaid-e-gwallumar weedae, deyobi, we-moli-sapingwagwad-e-gwallumar weemogoed. Geb degine, dule-irwa-Bab-Dummadse-goled we-ibmarmala ibmar-ogumakar-ukleged-ailagi ogumakoed.

11” ‘Ar moli-bebe-nikad-sapingwagwad-e-uka, bela e-san, e-nonoba-mesa, e-malimar, e-samurmar, degi, e-saamar, Israel-dulemar-danar-danar-bukwad-magaba onogoed. 12 Bela we-moli-e-ibmarmar dulemar danar-danar-bukwad-magaba, ar bia burumar-milegedse, neg-swilidikidse onolegoed. Geb agi, soo-gasiid-birgi be ogumakoed. Buru-milegedgi ogumaklegoed.’ ”

Israel-dulemar-isgued-ular ibmar-ukleged

13 Bab-Jehová Moisés'ga sogdebalid: “Israel-dulemarga be sogo: ‘Ar bemar ibmar-wissulidba Bab-Jehová-Igar-Maidgi annasale, ibmar-ise-imakleged imaksale, bela Israel-dulemar Bab-Jehová'gi nue-dummad-isgusmalad. 14 Ar Israel-dulemar na e-isgusad wisgunonimalale, e-isgusad-anar moli-bebe-nikad-sapingwagwad anga ukega senonimaloed. We-moli-sapingwagwad Bab-Dummad-dulemarbo-ambikued-negse sedmaloed. 15 Israel-girmar-dummagan Bab-Jehová-asabin moli-sapingwagwad-e-nonogi e-arganmar mesmaloed.

Geb Bab-Jehová-asabin we-moli-sapingwagwad-dukar egwanmaloed. 16 Geb sorbali, dule-irwa-Bab-Dummadse-goled-e-dummad, moli-sapingwagwad-abe Bab-Dummad-dulemarbo-ambikued-neg-yase sedoed. 17 Dule-irwa-Bab-Dummadse-goled na e-goo moli-sapingwagwad-abegi owardikuoed. Geb Bab-Dummadse-goled-neg-Ise-Isldikid-idu atued-dummad-naidsik, Bab-Jehová-asabin, ilagugle (7) we-abe bomi-bomi imakoed. 18 Geb sorbali, dule-irwa-Bab-Dummadse-goled, we-abe ichesaar ibmar-ogumakar-ukleged-ailagi moli-bebeyob-gwigwichidgi magoed. We-galu, Bab-Dummad-dulemarbo-ambikued-neggi, Bab-Jehová-asabin siid. Geb bela abe-gwabguoedi, Bab-Dummad-dulemarbo-ambikued-neg-yawagak-dogedgi ibmar-ogumakar-ukleged-aila-siid-nagagi eogoed. 19 Geb dule-irwa-Bab-Dummadse-goled-e-dummad bela moli-bebe-nikad-sapingwagwad-e-gwallu weoed, geb ibmar-ogumakar-ukleged-ailagi ogumakoed. 20 ” ’Ar dule-irwa-Bab-Dummadse-goled-igsawad-anar igi moli-bebe-nikad-sapingwagwad imakledae, deyobi, Israel-dulemar-e-igsawad-anar we-moli-bebe-nikad-sapingwagwad imaklemogoed. Deyobi, dule-irwa-Bab-Dummadse-goledi Israel-dulemarga e-igsawad Bab-Dummad-ega-osulogega imakoed. Geb Bab-Dummad Israel-dulemar egi nossuliyob dakoed. 21 Geb sorbali, dule-irwa-Bab-Dummadse-goled Israel-dulemar-danar-danar-bukwad-magaba moli-onogoed. Geb igi moli-bebe-nikad-sapingwagwad-idualed ogumaksagusa, deyobi, we-moli-bebe-nikad-sapingwagwad ogumakbaloed. Ar Israel-dulemar-e-igsawad-anar we-moli-bebe-nikad oburgwilenaid.’ ”

Dule-negsemaid-igsawad-anar ibmar-ukleged

22 Bab-Jehová Moisés’ga sogdebalid: “Israel-dulemarga be sogo: ‘Ar dule-dummadga-maid na wissulidba igsawale, na e-Bab-Dummad-Jehová-igar-maidgi annasale, ibmar-ise-imakleged imaksale, we-dule-dummadga-maid Bab-Jehová’gi nue-dummad-igsawad. 23 We-dule na e-igsawad wisgunonikile, sibat-machered-swilidikid, gwen boni-nikasulid na e-igsawad-anar Bab-Jehová’ga-ukega senonikoed. 24 We-dule sibat-nono-birgi na e-argan mesoed. Geb bia ibmar-durgan-ogumakar-ukleged-e-dukar egwallege, agi Bab-Jehová-asabin sibat-e-dukar egwannoeed. We-sibat dule-igsawad-anar oburgwilenaid. 25 Geb degine, dule-irwa-Bab-Dummadse-goled we-sibat-e-abegi e-goo owardikuoed. Geb we-abe ibmar-ogumakar-ukleged-ailagi-moli-bebeyob-gwigwichidgi mage-mage imakoed. Geb bela abe-gwabguoedi ibmar-ogumakar-ukleged-aila-siid-nagagi eogoed. 26 Geb dule-irwa-Bab-Dummadse-goled bela sibat-e-gwallu ibmar-ogumakar-ukleged-ailagi ogumakoed, ar igi dule-gwenatigwar-guega ibmar-ukleged-e-gwallu ogumakdae, deyob imakmogoed. Deyobi, dule-irwa-Bab-Dummadse-goledi dule-dummadga-maid-e-igsawad Bab-Dummad-ega-osulogega imakoed. Geb Bab-Dummad dule-dummadga-maid egi nossuliyob dakoed.’ ”

Dule-wargwen-isgusad-anar ibmar-ukleged

27 Bab-Jehová Moisés'ga sogdebalid: "Israel-dulemarga be sogo: 'Ar Israel-dule-wargwen, na wissulidba isgusale, na e-Bab-Dummad-Jehová-igar-maidgi annasale, ibmar-ise-imakleged imaksale, we-dule Bab-Jehová'gi nue-dummad-isgusad. 28 We-dule na e-isgusad wisgunonikile, sibat-ome-swilidikid, gwen boni-nikasulid na e-isgusad-anar Bab-Jehová'ga-ukega senonikoed. 29 We-dule sibat-nono-birgi na e-argan mesoed. Geb bia ibmar-durgan-ogumakar-ukleged-e-dukar egwallege, agi, sibat-e-dukar egwannoed. 30 Geb degine, dule-irwa-Bab-Dummadse-goled na e-goo sibat-e-abegi owardikuoed. Geb ibmar-ogumakar-ukleged-ailagi-moli-bebeyob-gwigwichidgi abe mage-mage imakoed. Geb bela abe-gwabguoedi ibmar-ogumakar-ukleged-aila-siid-nagagi eogoed. 31 Geb sorbali, dule-irwa-Bab-Dummadse-goled sibat-e-gwallu bela weoed, ar igi dule-gwenatigwar-guega ibmar-ukleged-e-gwallu weedae, deyob imakbaloed. Geb dule-irwa-Bab-Dummadse-goled ibmar-ogumakar-ukleged-ailagi sibat-e-gwallu ogumakoed. We-ibmarde Bab-Jehová'ga-ibmar-ukleged yeer-yapannedid. Deyobi, dule-irwa-Bab-Dummadse-goledi dule-e-isgusad Bab-Dummad-ega-osulogega imakoed. Geb Bab-Dummad dule egi nossuliyob dakoed.

32 " 'Ar dule-isgusad na e-isgusad-anar sibat-wawaad-sedanikile, sibat-wawaad-ome-bipi nue-swilidikid, gwen boni-nikasulid Bab-Jehová'ga senonikoed. 33 We-dule, we-sibat-wawaad-e-nono-birgi e-argan mesoed. Geb bia ibmar-durgan-ogumakar-ukleged-e-dukar egwallege, agi we-sibat-wawaad-e-dukar, e-isgued-anar egwannoed. 34 Geb sorbali, dule-irwa-Bab-Dummadse-goled e-goo sibat-wawaad-e-abegi owardikuoed. Geb ibmar-ogumakar-ukleged-ailagi-moli-bebeyob-gwigwichidgi abe mage-mage imakoed. Geb bela abe-gwabguoedi ibmar-ogumakar-ukleged-aila-siid-nagagi eogoed. 35 Geb sorbali, sibat-wawaad-e-gwallu bela weoed, ar igi dule-gwenatigwar-guega sibat-wawaad-mimmi-ukleged-e-gwallu weedae, deyob imakbaloed. Geb dule-irwa-Bab-Dummadse-goled ibmar-ogumakar-ukleged-ailagi, sibat-wawaad-e-gwallu ibmar-ogumakar-ukleged-bamaladba-mesa ogumakoed. Deyobi, dule-irwa-Bab-Dummadse-goledi dule-e-isgusad Bab-Dummad-ega-osulogega imakoed. Geb Bab-Dummad dule egi nossuliyob dakoed.' "

Akar-akar-isgulesad-anar ibmar-ukleged

5 1 Bab-Jehová Moisés'ga sogdebalid: "Israel-dulemarga be sogo: 'Ar dule-gwensakse gorlenonikile, be ibmar-daksad, be ibmar-itosad sogdaye. Ar we-dule yapa sogdagele, we-dule, dummad-nosad, degisoggu, sabsur-odurdaklegergebed.

2 Dule-gwensak ibmar-swilidiksulid ebusale:

ibmar-durgan-ised-burgwisaddibe,
ibmar-durgan-ised-sunna-akweleged-burgwisaddibe,

ibmar-ised-napagi-garmakdimalad-burgwisaddibe,
we-dule, ibmar-isedgi-warmaksad itossur-inigwele, swilidiksuli
gunonikoed.

Degisoggu, we-dule, nue-dummad-nosad.

3” ’Dule-gwensak wissulidgi ibmar-isgana-dulegi-danikid ebusale,
we-dule, swilidiksuli gunonikoed. Geb sorba, deyob ibmar-imeksaye-
wisgunonikile, we-dule, nue-nosadga gunonikoed.

4” ’Dule-gwensak, ibmar-nued-imizega, ibmar-isgana-imizegardibe,
ibmar-ise-sogar-sogleged, nue-binsassuli sogsadibe, geb degine, sorba,
magar itononikile, ede, deyob sogewilubsulinye, we-dule, nue-nosadga
gunonikoed.

5” ’Dule-gwensak we-ibmarmar-soggwenadgi isgusale, e-isgusad dugin na
barsogerbed. 6 Geb Bab-Jehová’ga na e-isgusad-anar sibat-wawaad-ome,
sibat-omedibe, oburgwega ukoed. Weyobi, dule-irwa-Bab-Dummadse-
goled, Bab-Dummad we-dulega-isgusad-osulogega imakoed.’ ”

Dule-wileged e-ibmar-ukoed

7 Bab-Jehová Moisés’ga sogdebalid: “Israel-dulemarga be sogo: ‘Dule-
isgusad sibat-wawaad-mimmi-bakega mani galakuele, sapur-nuu-gwabo,
wagnuu-mimmi-gwabodibe, na e-isgusad-ular Bab-Jehová’ga ukoed. Nuu-
gwagwen e-isgusad-ular oburgwelegega ukoed, baidi, ogumaklegega
ukoed. 8 We-dule, dule-irwa-Bab-Dummadse-goledse we-nuumar sedoed.
We-Bab-Dummadse-goled gebedgine isgusad-ular nuu-gwagwen weyob
ukoed: E-dukarg obipirmakoed, degi-inigwele, e-nono dukargi ungosulid.
9 Geb sorbali, isgued-ular nuu-uklenaid-e-abe ibmar-ogumakar-
ukleged-aila-dikargi bomi-bomi imakoed. Geb nuu-abe-obichadi,
ibmar-ogumakar-ukleged-aila-nagagi mioed. We-ibmar-uklegedi isgued-
ular ibmar-uklegedid. 10 Dule-irwa-Bab-Dummadse-goled nuu-baidi
igar-maidba ogumakar ukoed. Weyobi, dule-irwa-Bab-Dummadse-goled,
Bab-Dummad we-dulega-isgusad-osulogega imakoed. Geb Bab-Dummad
dule egi nossuliyob dakoed.

11” ’Ar dule-isgusad sapur-nuu-gwabo-bakega, wagnuu-mimmi-
gwabo-bakegardibe, mani galakubalile, madubur-bur-nued nibiratar na
e-isgusad-ular Bab-Jehová’ga ukoed. We-maduburgi, olivo-gwallu, degi, ina-
wawadikid eogosulid. Ar we-madubur isgued-ular ibmar-uklegedid. 12 Geb
we-madubur dule-irwa-Bab-Dummadse-goledse sedoed. Bab-Jehová bemarga
bela we-ibmar-ukmaid be ebinsamalaga, dule-irwa-Bab-Dummadse-goled
madubur na argan-nukgwen suoed. Geb we-madubur Bab-Jehová’ga-ibmar-
bamaad-soogi-ogumakar-uklegedba-mesa ibmar-ogumakar-ukleged-ailagi
ogumakoed. We-ibmar-uklegedi, isgued-ular ibmar-uklegedid. 13 Weyobi,
dule-irwa-Bab-Dummadse-goled ibmar-ukleged Bab-Jehová’ga ukoed.
Adi, Bab-Jehová, dulega e-isgusad eliega, egi nossuliyob dakegar. Ibmar-
ukleged-gwabgusaddi, dule-irwa-Bab-Dummadse-goledgadga guoed. Ar igi
ibmar-gwag-ukleged obichale, a-dulemarga ukledae, deyob uklemogoed.’ ”

Dule-isgusad-ular ibmar-ukleged

14 Bab-Jehová Moisés'ga sunmakdebalid, ega sogded: "Israel-dulemarga be sogo: 15 'Dule-gwensak na wissulidba Bab-Jehová-ibmar-islidikidgi isgusale, Bab-Jehová'ga e-isgued-ular sibat-wawaad-machered-swilidikid, gwen boni-nikasulid ukoed. We sibat-wawaad-macheredga e-mani-gargegued mani-aidikuedba nasiklegoed. Ar igi Bab-Dummadse-goled-neggi mani-aidikued-wilub-ebislege, deyob ebislegoed. We-ibmar-uklegedi, isgued-ular ibmar-uklegedid. 16 Dule-isgusad we-ibmar-islidikidgi-isgusad-ulale, gannar a-wilub ibmar ukoed, degine, napi ibmar-atargi gwensak ukbaloed. We-ibmardi dule-irwa-Bab-Dummadse-goledga ukoed. Weyobi, dule-irwa-Bab-Dummadse-goled dule-isgusad-ular Bab-Dummadga sibat-wawaad-machered oburgoed, geb Bab-Dummad dule egi nossuliyob dakoed.

17" 'Ar dule-gwensak na wissulidba Bab-Jehová-Igar-Maidgi annanonikile, amba we-dule isgusye soglegoed, sabsur-odurdaklegergebed. 18 Degisoggu, dule-irwa-Bab-Dummadse-goledse sibat-wawaad-machered-swilidikid, gwen boni-nikasulid sedoed. We sibat-wawaad-macheredga dule-isgusadba mani-soglesadba e-mani-gargegued nasiklegoed. Weyobi, dule-irwa-Bab-Dummadse-goled we-dule ibmar-wissulidba-isgusad Bab-Dummad ega osulogega imakoed, geb Bab-Dummad dule egi nossuliyob dakoed. 19 We-ibmar-uklegedi, isgued-ular ibmar-uklegedid. Ar we-dule, Bab-Jehová-Igar-Maidgi annasad, Bab-Jehová'gi nue-dummad nosad.' "

Dule-wargwen dule-baidgi-nosad

6 1 Bab-Jehová Moisés'ga sunmakded, ega sogded: "Israel-dulemarga be sogo: 2 'Dule-gwensak dule-baid ega ibmar-sabogega-uksadi, a-ibmar gannar yapa e-ibedga ukele,
mer-ukega yardaksadibe,
ei ibmar atursasdibe,
gannadgi annik ibmar-susdibe,
we-dule weyob-imaksadbali, Bab-Jehová'gi nue-dummad nosad.

3 Deginbali, ibmar-yoggusad amisale,
degite, amissurye sogdibe,
dule-gusgu-isgudaedgi, isgussurye gakansaar ise-sogar-sogdibe,
4 we-dule we-ibmargi nosad, egi ataklegoed.

Degisoggu, gannar we-ibmarmar ukergebed:

Ibmar-atursasad,
emar-annik gandikidgi ibmar-susad,
dule-baid ega ibmar-sabogega-uksanad,
ibmar-yoggusad amissurye-soged,

5 ibmar-bamaladgi-gakansaar-sogsad-imakoye.

We-dule, a-ibmarmar bela e-ibedga gannar ukoed,
deginbali, napi ibmar-atargi gwensak ega ukbaloed.

Ar e-igsawed-ular, ibmar-uknaid-ibagi, ibmar-ibedga bela we-
ibmarmar gannar ukoed.

6” ’Na e-igsawed-ular, Bab-Jehová’ga sibat-wawaad-machered-
swilidikid, gwen boni-nikasulid sedoed. Dule-igsawadba mani-soglesadba
we-sibat-wawaad-macheredga mani-gargegued nasiklegoed. Geb
dule, we-sibat-wawaad-machered na e-igsawed-ular, dule-irwa-Bab-
Dummadse-goledga ukoed. 7Geb degine, dule-irwa-Bab-Dummadse-goled
we-dule-e-igsawed-ular, Bab-Jehová’ga sibat-wawaad ukoed. Geb Bab-
Jehová bela we-dule-e-igsawed osulogoed.’ ”

Bab-Dummadga ibmar-ogumakar-ukleged

8 Bab-Jehová Moisés’ga sunmakdebalid, ega sogded: 9“ Aarón’ga,
degi, e-masmalaga be soge: ‘Ibmar-ogumakar-uklealir, weyob be
imakmaloye:

” ’Ibdurgan-ogumakar-ukleged bela gummakegala,
ibmar-ogumakar-ukleged-aila-birgi mutiki gamai oibodagoed. Ibmar-
ogumakar-ukleged-aila-birgi soo-gasiid ginnosulid.

10” ’Dule-irwa-Bab-Dummadse-goled e-lino’mor yooed, degi, lino-
morsangi-garson-bipi-makaled yobaloed. Ibdurgan-ogumaklenaid bela
gummaksale, dule-irwa-Bab-Dummadse-goled ibmar-ogumakar-ukleged-
aila-birgi buru-bukwad weoed. Geb we-aila-dikarba buru urboed.

11 Sorbali, dule-irwa-Bab-Dummadse-goled e-mor esugoed, geb mor-baid
yooed. Geb degine, Israel-dulemar-danar-danar-bukwad-magaba, neg-
swilidikidse buru sedoed.

12” ’Ibmar-ogumakar-ukleged-aila-birgi soo-gasiid ginnosulid. Dule-
irwa-Bab-Dummadse-goled bane-bane wakudaryalaba soo-gasiid-birgi
sapan urboed. A-soo-birgine, Bab-Jehová’ga-ibmar-ogumakar-uklenaid
mesoed, deginbali, a-birgi dule-gwenatigwar-guega ibmar-uklenaid-e-
gwallu ogumaklebaloed. 13 Ibmar-ogumakar-ukleged-aila-birgi soo-gasiid
bipisaar ginnosulid, degisadegu gasii guoed.’ ”

Bab-Dummadga ibmar-gwag-ukleged

14 Bab-Jehová Moisés’ga sunmakdebalid, ega sogded: “Aarón’ga, degi,
e-masmalaga be sogoed: ‘Bab-Jehová’ga ibmar-gwag-uklegoed-e-igar
weyob mai-guoye: Bemar ibmar-ogumakar-ukleged-aila-asabin Bab-
Jehová’ga ibmar-gwag ukoed.

15” ’Dule-irwa-Bab-Dummadse-goled-wargwen Bab-Jehová’ga-ibmar-
ukleged-madubur-bur-nued olivo-gwalluba-mesa argan-nukgwen weoed,
deyobi, ibmar-gwag-ukleged-birgi bela ina-wawadikid-bukwad subaloed.
Bela we-ibmarmar-susadi, ibmar-ogumakar-ukleged-aila-birgi ogumakoed.
Adi, bemar ebinsamalaga, Bab-Jehová bela bemarga ibmar ukmaid. Bab-
Jehová we-ibmar-ukleged yeer-yapan itodaed.

16” ’Bemar, we-ibmar-ukleged-gwabguoed gunmaloed. Madubur-e-inasuli, Bab-Dummad-dulemarbo-ambikued-neg-imbagi, neg-islidikidgi gunmaloed.

17” ’We-ibmar madubur-e-inaba dulegosulid. Ar ade, we-ibmar-ogumakar-uklesad-gwabgusadi, ani, Bab-Jehová, Aarón’ga, degi, e-masmalaga uksad. Ar we-ibmar igi isgusad-ular-ibmar-ukleged islidikid gue, degi, igi dule-baidgi-nosar-ibmar-ukleged islidikid gue, deyobi, we-ibmar bur-ise-islidikidid gumogad.

18” ’Bela Aarón-e-wagan-machergan we-ibmar sunna gunmaloed. Weyobi, Bab-Jehová’ga-ibmar-ogumakar-ukleged be-waganga degisadegu igar maiguoed. Ibu-ibmar Bab-Dummadga-ibmar-uklegedgi warmaksale, we-ibmar-warmaksad ibmar-swilidikidga gunonikoed.’ ”

Weyob Bab-Jehová Moisés’ga sunmaksad.

Dule-irwa-Babse-gormalad e-ibmar-ukmaloed

19 Bab-Jehová Moisés’ga sunmakdebalid, ega sogded: “Aarón’ga, degi, e-masmalaga be soge: 20 ‘Bemar, Bab-Jehová’ga arbaega-nugsalegoed-ibagi, we-ibmar-ukleged ukmaloed: Madubur-bur-nued, nibiratar anga ukoed. Wakdara negabar ukoed, baid negabaladdi sedo ukoed. Degisadegu na ukdii gumaloed. 21 We-ibmar-uklenaid ibmar-dibyedgine olivo-gwalluba be dibyoed. Degin, nue-omukuar burwi-burwi-dibyalé anga be ukoed. We, ani, Bab-Jehová, yeer-yapanne itodaed. 22 Amba deyobi, dule-irwa-anse-goled e-bab-Aarón-sorba-arbaega nugsalenonikir, imakmogoed. Bab-Jehová we-igar degisadegu maiguega uksad. We-ibmar-ukleged bela ogumaklegoed. 23 Dule-irwa-Bab-Dummadse-goled Bab-Jehová’ga na e-ibmar-uked gunnosulid, bela ogumaklegoed.’ ”

Isgued-anar Bab-Dummadga ibmar-ogumakar-ukleged

24 Bab-Jehová Moisés’ga sunmakdebalid, ega sogded: 25 “Aarón’ga, degi, e-masmalaga be soge: ‘Isgued-ular Bab-Jehová’ga-ibmar-ogumakar-ukleged-igar weyob mai-guoye: Bia ibdurgan-ogumakar-ukleged-e-duk-egwallege, agi, Bab-Jehová-asabin isgued-ular-ibmar-uklenaid-e-duk-egwallemogoed. We-ibmarde ibmar-bur-ise-islidikidid. 26 Dule-irwa-Bab-Dummadse-goled isgued-ular-ibdurgan-uknaid, sunna we-san gunnoed. Bab-Dummad-dulemarbo-ambikued-neg-e-imbagi neg-islidikidgi gunnoed. 27 We-sangi ibu warmaksadibe, bela we-ibmar-egi-warmaksad islidikidga gunonikoed. We-ibdurgan-abe, morgi milesale, we-mor nega-nue-islidikidgi enuklegoed. 28 Deginbali, san-ukleged, biti-napsa-bategi-dulesa, we-napsa-bate mamarilegoed. Ar esgoro-gordikid-bormogi-dulesardi, we-bormo diigi nue enuklegoed.

29” ’We-san Bab-Dummadga-uklenaid unnila dule-irwa-Bab-Dummadse-gormalad-e-gwenadgan-machergan gunmaloed.

We-ibmar bur-ise-islidikidid. ³⁰ Ar isgued-ular ibdurgan-uklenaid-abe Bab-Dummad-dulemarbo-ambikued-negse, neg-islidikidse isgued-osulogega-selesgusadi, e-sandi gullegosulid. Bela we-san soogi ogumaklegoed.’ ”

Dule-baidgi-nosar ibmar-ukleged

7 ¹ Bab-Jehová Moisés’ga sogdebalid: “Israel-dulemarga be sogo: ‘Dule-gwensak dule-baidgi-nosad-ular Bab-Dummadga-ibmar-uked bur-ise-islidikid gued. Weyobi, ega igar megoed: ² Bia ibmar-durgan-ogumakar-ukleged-e-dukur egwallege, agi dule-baidgi-nosad-ular-ibmar-uklenaid-e-dukur egwallemogoed. Geb e-abe ibmar-ogumakar-ukleged-aila-e-dikarmargi bomi-bomi imakoed. ³ Geb sorbali, bela ibmar-uklenaid-e-gwallu Bab-Jehová’ga uklegoed:

E-bunnugi-gwallumar-nanaid,
e-samur-birgi-gwallumar-nanaid,

⁴ e-mirwa-gwabogwad,
a-birgi e-gwallumar-nanaid,
e-dikarmargi-gwallumar-nanaid,
degi, bina-dutugwadgi-gwallumar-nanaid.

We-bina-dutugwadgi-gwallumar-nanaid mirwa-gwabogwadba welegoed.

⁵ ’Geb sorbali, dule-irwa-Bab-Dummadse-goled bela wemar ibmar-ogumakar-ukleged-ailagi ogumakar Bab-Jehová’ga ukoed. We-ibmala, isgued-ular ogumakar-uklegedid. ⁶ We-ibmar bela dule-irwa-Bab-Dummadse-gormalad-e-gwenadgan-machergan nabir gunmaloed. We-ibmar nega-islidikidgi gunmaloed. We, ibmar-bur-ise-islidikidid.’ ”

Dule-irwa-Babse-gormaladga ibmar-uklegoed

⁷ Bab-Jehová Moisés’ga sogdebalid: “Israel-dulemarga be sogo: ‘Isgued-ular-ibmar-uklegedga, degi, dule-baidgi-nosad-ular-ibmar-uklegedga, unnila igar-soggwenna megoed. Dule-baidgi-nosad-ular ibmar-uklenaidi, dule-irwa-Babse-goled-ibmar-imaknaidgadga guoed. ⁸ We-ibdurgan-uklenaid-e-uka dule-irwa-Babse-goled-ibmar-imaknaidgadga guoed. ⁹ Amba deyobbali, madubur soogi-yoaled, madubur bormogi-dualed, degi, madubur bormogi-dibyaled, dule-irwa-Babse-goled-ibmar-imaknaidgadga gubaloed. ¹⁰ Bela ibmar-gwag-Bab-Dummadga-ukleged, olivo-gwalluba-omukualeddibe, dinnagwaddibe, Aarón, e-masmalamala, na emarbi-mergu sumaloed.’ ”

Dule-gwenatigwar-guega ibmar-ukleged

¹¹ Bab-Jehová Moisés’ga sogdebalid: “Israel-dulemarga be sogo: ‘Dule-gwenatigwar-guega ibmar-ukleged-e-igar weyob megoed: ¹² Dule Bab-Jehová’ga dog-nuedye-sogega ibmar-uknaile, we-ibmar-uknaid-ukine, madu-olo-e-inasuli-olivo-gwalluba-omukualed, madu-matargana-e-inasuli-olivo-gwallugi magaled, degi, madubur-bur-nuedgi-madu-ologana-dibyar olivo-gwalluba-omukualed ukbaloed.

13 Bab-Jehová'ga-dog-nuedye-sogega ibmar-uklenaidmala, degi, gwenatigwar-guega ibmar-uklenaidmala, madu-ologana e-inaba-imakar Bab-Jehová'ga uklebaload. 14 Bab-Jehová'ga ukegala, bela we-ibmarmar-uklegedi, sog-soggwen sulegoed. Geb gwenatigwar-guega dule-irwa-Babse-goled ibmar-e-abe bomi-bomi-imaksadga we-ibmarmar guoed.

15 " 'Bab-Jehová'ga-dog-nuedye-sogega we-san uklesadi, a-ibagi gullegoed, banedgala bipisaar san sabolegosulid.

16 " 'Ar Bab-Jehová'ga-ibmar-ogumakar-uklenaidi, dule ibmar-imakedseye sogsagusad-ular uklenadibe, igi Bab-Jehová'ga na ibmar-ukbiedba uklenadibe, adi, a-ibagi a-san gullegoed. Ar san-obichardi, sunna bangi gullebaload. 17 Ar ibapaagi, we-san amba bukwale, bela soogi ogumaklegoed.

18 " 'Ar dule ibapaagi gwenatigwar-guega ibmar-ukleged-e-san guchale, we-ibmar-uklesadi, Bab-Jehová bar abingaosulid, bar ega igarga guosulid. Ar ade, we-san swilidiksuli gunonikoed. Dule we-san-guchadi, nue-dummad-igsawe soglegoed.

19 " 'We-sangi ibmar-swilidiksulid warmaksale, we-san bar gullegosulid, soogi ogumaklegoed. San-baidi, bela dule-san-swilidik-gudimalad sunna gunmaload.

20 " 'Dule-san-swilidiksuli-gudiid, gwenatigwar-guega ibmar-uklenaid-e-san guchale, e-dulemar-abargi onolegoed. Ar we-sande, Bab-Jehová'gadid.

21 " 'Deginbali, dule ibmar-igsawa-dulegad-ebusale, ibdurgan-e-ibmar-igsawa-ebusale, ibmar-ised-igsawa-ebusale, geb a-sorbali, gwenatigwar-guega ibmar-uklesad-e-san gunnele, we-dule, e-dulemar-abargi onolegoed. Ar we-sande, Bab-Jehová'gadid.' "

Ibdurgan-e-gwallu, degi, e-abe-imaklegoed

22 Bab-Jehová Moisés'ga sunmakdebalid, ega sogded:

23 " 'Israel-dulemarga be soge: 'Moli-bebe-nikad-machered-e-gwallu, sibad-wawaad-bipigwad-e-gwallu, degi, sibad-ome-e-gwallu, bemar bipisaar gunmalosulid. 24 Ibdurgan-sapurbalid-ursirmarse ibmar-burgwisad-e-gwallu, ese oichimaklesad-e-gwalludibe, mer be gunmalo. A-gwallumardi sunna ibmar-bamaladga be ebumaload.

25 " 'Dule Bab-Jehová'ga-ibmar-ogumakar-ukleged-e-gwallu guchale, we-dule, e-dulemar-abargi onolegoed.

26 " 'Deginbali, bia bemar maigumaloe, agi bemar bipisaar nuumar-abe, baid-ibdurgan-abadibe, gunmalosulid. 27 Ar doa-dule ibu-abe guchale, we-dule, e-dulemar-abargi onolegoed.' "

Dule-irwa-Babse-gormaladga ibmar-uklegoed

28 Bab-Jehová Moisés'ga sunmakdebalid, ega sogded: 29 " 'Israel-dulemarga be soge: 'Dule, gwenatigwar-guega ibmar-ukleged-ukele, we-dule, Bab-Jehová-asabin we-ibmar-ukleged abar sedoed.

³⁰Deginbali, we-dule, e-sunnad ibmar-ogumakar-uklegoedi, Bab-Jehová-asabin sedbaloed. Ibmar-e-gwallu, degi, e-binasgar sedoed. Geb binasgar Bab-Jehová-asabin bana-bana-imaklear ukoed. ³¹Dule-irwa-Bab-Dummadse-goled ibmar-e-gwallu ibmar-ogumakar-ukleged-ailagi ogumakoed. Moli-e-binasgardi Aarón'ga, degi, e-masmalaga uklegoed. ³²Dule-gwenatigwar-guega ibmar-ukleged-e-dua-nuedsikidi, dule-irwa-Babse-goled-ibmar-imaknaidga uklegoed. ³³Dule-irwa-Babse-goled dule-gwenatigwar-guega ibmar-ukleged-e-abe-uknaidi, degi, e-gwallu-uknaidi, we-ibmar-e-dua-nuedsikid suoed. ³⁴Israel-dulemar gwenatigwar-guega ibmar-ukleged-e-binasgar-bana-bana-imakleged, degi, e-dua, dule-irwa-Babse-goled-Aarón'ga, degi, e-masmalaga, ani Bab-Jehová, an uksad. We-igala, degisadegu Israel-dulemarga mai guoed.”

³⁵Bab-Jehová dule-irwa-ese-goledga, Aarón, degi, e-masmala-nug-imaksad-iba-akale, we-ibmar-Bab-Jehová'ga-ogumakar-uklegedi, Aarón'ga, degi, e-masmalaga ukleged-igar megnonikid. ³⁶We-dulemar-nug-imaklesad-ibagi, Bab-Jehová Israel-dulemarga igar-uksad, Aarón'ga, degi, e-masmalaga we-ibmarmar ukmaloye. We-igar, degisadegu Israel-waganga mai guoed.

³⁷Deginbali, Bab-Jehová'ga-ibmar-ogumakar-uklegedsik, Bab-Jehová'ga-ibmar-gwag uklegedsik, isgued-ular ibmar-ogumakar-uklegedsik, weyob igar megisad. Deginbali, dule-baidgi-nosar ibmar-uklegedsik, dule-irwa-Bab-Dummadse-golega nugsalenair ibmar-uklegedsik, degi, gwenatigwar-guega ibmar-uklegedsik, weyob igar megisad. ³⁸Bab-Jehová Moisés'ga we-igar Sináí-yalagi ukxa gusad. Deunni, Israel-dulemar Sináí-nega-dulesulidganba gudimargu, Bab-Jehová Moisés'ga ega-ibmar-ukleged-igar uksagusad.

2. DULE-IRWA-BAB-DUMMADSE-GOLED BAB-DUMMADGA NUGSALESAD

(8:1—10:20)

Aarón, degi, e-masmala, dule-irwa-Bab-Dummadse-golega nugsalesmalad
(Éxodo 29:1-37)

8 ¹Bab-Jehová Moisés'ga sogded: ²“Aarón, degi, e-masmala beba be sedo. Dule-irwa-Bab-Dummadse-gormalad-e-mormar, degi, nugsalenaidgi-olivo-gwallu-ebuleged be sedbalo. Deginbali, isgued-ular moli-bebe-nikad-sapingwagwad-oburgwileged be sedo, sibad-wawaad-machered-warbo be sedbalo, degi, garba-bipigwadgi madu-inasulid be sedbalo. ³Degine, bela Israel-dulemar Bab-Dummad-dulemarbo-ambikued-neg-yawagakgi be oambikuoed.”

⁴Moisés Bab-Jehová-ega-igar-uksadba ibmar-imaksad. Geb Bab-Dummad-dulemarbo-ambikued-neg-yawagakgi Israel-dulemar-oambikusad. ⁵Agi, Moisés Israel-dulemarga sogded: “Bab-Jehová anga igar-uksad, weyob ibmar imakoye.”

⁶Geb degine, Moisés, Aarón'se, degi, Aarón-e-masmalase gochad, ese dagmalagar.

Geb diigi amar-ogsad.

⁷Aarón'ga mor-dummad-suid yosad.

Geb mor-dub sadergi ega edichad.

Deginbali, mor-dummad-suitigwad ega yosbalid,

geb a-birgi, mor-sakwasulid-efod'ye-nugad ega yosbalid,

geb efod-molidubgi mor-dummad-suitigwad nue edichad.

⁸Geb sorbali, a-birgi mor-binasgargi-nagued ega nasiksad, geb mor-binasgargi-naguedyabali Urim, degi, Tumim ega sisad.

⁹Deginbali, e-nonogi mor-gurgin-ebirmakaled ega sisbalid, geb mor-gurgin-ebirmakaled-birgi, e-bebegi or-matargwagwad ega nasiksad.

We-or-matargwagwad oyonaid, Aarón, Bab-Jehová'ga-ibmar-imakega nugsalesye.

Ar igi Bab-Jehová ega igar-uksagusa, deyobi Moisés ibmar imaksad.

¹⁰Sorbali, Moisés, nugsalenaiddgi-olivo-gwallu-ebuleged susad. Geb we-olivo-gwallugi Bab-Dummadse-goled-neg-sunna-seleged mage-mage imaksad, degi, bela a-yaba ibmar-bukwad mage-mage imaksabalid.

Weyobi, we-ibmarmar unnila Bab-Dummadgarbi ebulegega imaksad.

¹¹Ibmar-ogumakar-ukleged-aila-birgi, ilagugle (7) olivo-gwallu bomi-bomi imaksad. Ibmar-ogumakar-ukleged-birgi, degi, bela we-ailagi ibmar-ebulemalad-bukwad-birgi, olivo-gwallu eosad, adi, we-ibmarmar unnila Bab-Dummadgarbi ebulegegar. Deginbali, dii-sied-birgi, degi, dii-sied-e-nagmargi olivo-gwallu mage-mage imaksabalid, adi, unnila Bab-Dummadgarbi we-ibmarmar ebulegegarbar.

¹²Sorbali, Moisés, dule-irwa-Bab-Dummadse-goledga Aarón-nugsaege, Aarón-nonogi olivo-gwallu eosad.

¹³Moisés, Aarón-e-masmala-ese-dagega imaksabalid. Geb mor-dummadgan-suitimalad ega yosad, mor-dub sadergi ega edichad. Deginbali, mor-gurgin-ebirmakaled ega sisbalid. Ar igi Bab-Jehová ega igar-uksagusa, deyobi, Moisés ibmar imaksad.

¹⁴Geb a-sorbali, Moisés, moli-bebe-nikad-sapingwagwad-isgued-ular-ukleged ega sedadega imaksad. Geb Aarón, degi, e-masmala, moli-bebe-nikad-sapingwagwad-e-nono-birgi e-argan mesismalad. ¹⁵Geb degine, Moisés moli-bebe-nikad-e-dukur egwachad. Geb e-googi moli-abe-wesgua, ibmar-ogumakar-ukleged-ailagi moli-bebeyob-gwigwichidgi, degi, aila-dikarmargi moli-abe mage-mage imaksad, adi, a-aila, swilidik imakegar. Abe-gwabgusaddi ibmar-ogumakar-ukleged-aila-nagagi eosad. Weyobi, ibmar-ogumakar-ukleged-aila swilidik gunonikid, degi, unnila Bab-Dummadgarbi ebulegega gunonikid.

¹⁶Moisés we-moli-bebe-nikad-uklenaid-e-samur-birgi gwallumar-nanaid, e-bina-dutugi gwallumar-nanaid, mirwa-gwabogwad, degi, mirwa-birgi-gwallumar-nanaid bela susad.

Geb bela we-ibmarmar ibmar-ogumakar-ukleged-ailagi ogumaksad. 17Ar Moli-bebe-nikad-sapingwagwad-e-ukadi, e-sandi, degi, e-saadi, bela Israel-dulemar-danar-danar-bukwad-magaba ogumaksad, ar igi Bab-Jehová ega igar-uksagusa, deyobi Moisés ibmar imaksad.

18A-sorbali, Moisés, sibat-wawaad-machered Bab-Jehová'ga-ogumakar-uklegoed ega sedagega imaksad. Geb Aarón, degi, e-masmala we-sibat-wawaad-machered-e-nono-birgi e-argan mesismalad. 19Geb degine, Moisés we-sibat-wawaad-machered-e-dukar egwachad, geb sibat-wawaad-abe ibmar-ogumakar-ukleged-aila-dikarmargi bomi-bomi imaksad.

20A-sorbali, Moisés sibat-wawaad-machered-e-san goa-goa imaksad. Geb sibat-wawaad-e-nono, e-san-goamaksad, degi, e-gwallu soogi ogumaksad. 21E-samurmar, degi, e-nagmar diigi enuksad. Geb a-sorbali, igi Bab-Jehová'ga-ibmar-soogi-ogumakar-ukleged-yeer-yapped ogumakledae, deyobi, Moisés we-sibat-wawaad ibmar-ogumakar-ukleged-ailagi ogumaksad, ar igi Bab-Jehová ega igar-uksa gusa.

22A-sorbali, Moisés sibat-wawaad-machered-baid ega sedagega imaksad. We-sibat-wawaadi Bab-Jehová'ga-arbaega-nugsalenair ukledaetid. Aarón, degi, e-masmala sibat-wawaad-machered-e-nono-birgi na e-argan mesismalad. 23A-sorbali, Moisés sibat-wawaad-e-dukar egwachad. Geb Moisés na e-googi sibat-wawaad-e-abe wesgua, Aarón-e-uaya-duku-argan-nuedsikidgi, abe mage-mage imaksad, degi, e-goo-dummad-argan-nuedsikidgi, degine, e-goo-dummad-nag-nuedsikidgi, abe mage-mage imaksabalid.

24Deginbali, Moisés, Aarón-e-masmala-ese-dagega imaksabalid. Moisés e-googi sibat-wawaad-e-abe-wesgua, amar-uaya-duku-argan-nuedsikidgi, abe mage-mage imaksad, degi, amar-goo-dummagan-argan-nuedsikidgi, degine, amar-goo-dummagan-nag-nuedsikidgi, abe mage-mage imaksabalid. Geb sibat-wawaad-e-abe-obichadi ibmar-ogumakar-ukleged-aila-dikarmargi eosad.

25Geb Moisés sibat-wawaad-machered-e-gwallu, e-bunnu, e-samurgi gwallumar-nanaid, e-bina-dutugwadgi-gwallumar-nanaid susad. Deginbali, mirwa-gwabogwad, e-gwallumarse-bakale, degi, sibat-wawaad-machered-e-dua-nuedsikid susbalid. 26Moisés, Bab-Jehová-asabin madu-inasulid garbagi-bukwadi susad, degi, madu-olo-inasulid susbalid. Deginbali, madu-olo-olivo-gwalluba-oburaled, degi, madu-matar susbalid. Geb we-madumala, sibat-wawaad-e-gwallu-birgi, degi, sibat-wawaad-e-dua-nuedsikid-birgi urbisad. 27Geb bela-we-ibmarmar Aarón-e-argangi, degi, e-masmala-argangi urbisad. Geb Aarón, degi, e-masmala, we-ibmarmar Bab-Jehová'ga-ukega, Bab-Jehová-asabin bana-bana imaksamalad. 28Moisés, Aarón-annik, degi, e-masmala-annik gannar we-ibmarmar susad. Geb ibmar-ogumakar-ukleged-ailagi, ibmar-Bab-Jehová'ga-uklenaidbamesa ogumaksad. We-ibmar Bab-Jehová'ga-arbaega nugsalenaidgi-ukleged yeer-yappedid, Bab-Jehová'ga soogi ogumakar ibmar-uklegetid.

29 Geb degine, Moisés sibad-wawaad-machered-e-binasgar susad. Geb Bab-Jehová'ga-ukega, Bab-Jehová-asabin bana-bana imaksad. We-binasgar Bab-Jehová'ga-arbaega-nugsalenaiddgi-ukleged Moisés'ga uklesadid. Ar igi Bab-Jehová ega igar-uksagusa, deyobi, Moisés ibmar imaksad.

30 A-sorbali, Moisés, nugsalenaiddgi-olivo-gwallu-ebuleged, degi, ibmar-ogumakar-ukleged-ailagi abe-siid susad, geb Aarón'gi, degi, e-masmalagi bomi-bomi imaksad. Deginbali, wemar-e-mormargi bomi-bomi imaksabalid. Weyobi, Moisés, Aarón, degi, e-morse-bakale, Bab-Jehová'ga swilidik imaksad. Deginbali, Aarón-masmala, degi, e-morse-bakale, swilidik imaksabalid.

31 Geb Moisés Aarón'ga, degi, Aarón-e-masmalaga sogded: “Bab-Dummad-dulemarbo-ambikued-neg-yawagak-dogedgi, bemar san dunamar. Agi, Bab-Jehová'ga-arbaega-nugsalenaiddgi madu-ukleged-garbagi-siidba be san gunmaloed. Igi Bab-Jehová anga igar-uksagusgu, anga sogsagusa: ‘Aarón, degi, e-masmala we-san gunmaloye.’” 32 Geb san-obichad, madu-obichad, be ogumakmaloed. 33 Ibagugle (7) Bab-Jehová'ga-arbaega-nugsaleged-iba naguod. We-ibagan-gwinmakedse, bemar Bab-Dummad-dulemarbo-ambikued-neggi bukumaloed. 34 Ar igi emi ibmar-imaklesa, deyobi, Bab-Jehová bemar-igsawed-ular ibmar-imakoye sogsagusad. 35 Degisoggu, ibagugle (7) mutikidba, degi, ibginedba bemar Bab-Dummad-dulemarbo-ambikued-neg-yawagakgi bukumaloed, ar igi Bab-Jehová-bemarga-sogsagusa, adi, bemar melle burgwemalagar. Ar deyob Bab-Jehová anga sogsad.”

36 Aarón, degi, e-masmala, ar igi Bab-Jehová Moisés'ga ibmar-sogsagusa, bela deyobi ibmar imaksamalad.

Dule-irwa-Bab-Dummadse-gormalad arbadmalad

9 1 Ibabaabakgi (8), Moisés, Aarón'se, Aarón-e-masmalase, degi, Israel-girmar-dummaganse gochad. 2 Moisés Aarón'ga sogded: “Isgued-ular-oburgwilegega moli-bebe-nikad-sapingwagwad Bab-Jehová'ga be ukoed, deginbali, Bab-Jehová'ga sibad-wawaad-machered ogumakar-ukega be ukbaloed. We-ibdurgan-warbogwad swilidik, gwen-boni-nikasulid, Bab-Jehová-asabin be ukoed.

3”A-sorbali, Israel-dulemarga be sunmakoed, amarga be sogoed: ‘Isgued-ular-oburgwilegega sibad-machered be sedamaloye. Deginbali, Bab-Jehová'ga ogumakar-ukega moli-bebe-nikad-sapingwagwad, degi, sibad-wawaad-sapingwagwad be sedamarbaloye. We-ibdurgan-warbogwad birgagwen nikamaloed, degi, swilidik, gwen-boni-nikasulid guod. 4 Deyobbali, dule-gwenatigwar-guega moli-bebe-nikad-machered, degi, sibad-wawaad-machered be sedamarbaloed. We-ibdurgan Bab-Jehová-asabin ogumakar be ukmaloed. Deginbali, ibmar-gwag-gullemalad olivo-gwalluba-oburar be sedamarbaloed. Ar emi-ibagi, Bab-Jehová bemarse e-gangued oyogod.’”

⁵Israel-dulemar, Moisés-ese-ibmar-egichisadi, bela Bab-Dummad-dulemarbo-ambikued-neg-yawagakse sesmalad. Bela Israel-dulemar Bab-Jehová'ga-ibmar-ogumakar-ukleged-ailase nonimalad. Geb Bab-Jehová-asabin gwichi gusmalad. ⁶Geb degine, Moisés sogded: "Bab-Jehová bemarga igar uknaid: 'Weyob, bema ibmar imakmaloye.' Ar deyob be imakmalale, Bab-Jehová na e-gangued-yeerdakleged bemarse oyogoed."

⁷Geb a-sorbali, Moisés Aarón'ga sogded:

"Ibmar-ogumakar-ukleged-ailase be dage.

Agi, be-igsawed-ular, Bab-Jehová'ga-ibmar-ukleged be ukdage.

Degi, be-ibdurgan-ogumakar-ukleged Bab-Jehová'ga be ukdabali.

Bab-Jehová bebo-igar-naboged,

degi, Bab-Jehová e-dulamarbo-igar-naboged be imake.

Deginbali, Israel-dulemar-e-ibmar-uked Bab-Jehová'ga be ukbali,

adi, Bab-Jehová e-dulamarga e-igsawed osulogega,

ar igi Bab-Jehová na igar-uksa gusa."

⁸Geb degine, Aarón ibmar-ogumakar-ukleged-ailase naded. Geb e-igsawed-ular, moli-bebe-nikad-sapingwagwad-uknaid-e-dukur egwachad.

⁹Geb e-masmala we-moli-abe ega uksamalad. Aarón abegi na e-goo owardikusgua, ailagi-moli-bebeyob-gwigwichidgi abe mage-mage imaksad. Abe-gwabgusaddi ibmar-ogumakar-ukleged-aila-nagagi eosad.

¹⁰A-sorbali, moli-oburgwilesad-e-gwallu, e-mirwamar, degi, e-binagi-gwallumar-nanaid, ibmar-ogumakar-ukleged-ailagi ogumaksad. Ar igi Bab-Jehová Moisés'ga igar-uksagusa, deyobi, Aarón ibmar imaksad. ¹¹Ar moli-e-sandi, degi, e-ukadi Israel-dulemar-danar-danar-bukwad-magaba ogumaksad.

¹²Deginbali, Aarón Bab-Jehová'ga-ibdula-ogumakar-ukleged-e-dukur egwachad. Degine, e-masmala a-abe ega uksad. Geb Aarón ibmar-ogumakar-ukleged-aila-e-dikarmargi abe bomi-bomi imaksad.

¹³A-sorbali, Aarón-masmala e-bab-Aarón'ga moli-bebe-nikad-e-san-goa-goad uksad. Deginbali, e-nono ega uksabalid. Geb Aarón bela we-ibmarmar ibmar-ogumakar-ukleged-ailagi ogumaksad. ¹⁴Geb moli-samurmar, degi, e-duamar enuksad. Geb san-ogumaklenaidba-mesa ibmar-ogumakar-ukleged-ailagi ogumaksad.

¹⁵Deginbali, Aarón, Israel-dulemar-e-igsawed-osulogega Bab-Jehová'ga ibdurgan uksabalid. Dulemar-igsawed-ular sibad-machered-uklenaid susad, degi, e-dukur-egwachad. Geb degine, dulemar-igsawed-ular Bab-Jehová'ga uksad, ar igi iduar e-igsawed-ular ibmar imaksagusa, deyobi imaksabalid.

¹⁶Ar igi igar-mai, aba Aarón Bab-Jehová'ga ibdurgan ogumakar uksad.

¹⁷Degi, ibmar-gwag-gullemaalad uksabalid. Geb Aarón, a-ibmar-gwag argan-nukgwen susad, geb wakdar-ibmar-ogumakar-uklegedba-mesa ibmar-ogumakar-ukleged-ailagi ogumaksad.

¹⁸Geb sorbali, dule-gwenatigwar-guega moli-bebe-nikad-machered-uklenaid-e-dukur egwachad, degi, sibad-wawaad-machered-uklenaid-e-dukur egwachabalid. Aarón-masmala e-bab-Aarón'ga a-abe uksad, geb Aarón ibmar-ogumakar-ukleged-aila-dikarmargi a-abe bomi-bomi imaksad.

¹⁹Deginbali, Aarón-masmala e-bab-Aarón'ga moli-machered-e-gwallu, degi, sibat-wawaad-machered-e-gwallu, e-bunnumar, e-samurgi-gwallumar-nanaid, e-mirwamar, degi, e-binamargi gwallumar-nanaid uksabalid. ²⁰Geb we-gwallumar moli-machered-e-binasgargi, degi, sibat-wawaad-machered-e-binasgargi urbisad. Geb degine, we-gwallumar ibmar-ogumakar-ukleged-ailagi ogumaksad. ²¹We-ibdurganmar-e-binasgardi, degi, e-duamar-nuedsikiddi, Aarón Bab-Jehová-asabin bana-bana imaksad. Ar igi Bab-Jehová Moisés'ga sogsagusa, deyobi imaksad.

²²Israel-dulemar-bukwadsik Aarón e-argan oyoded, geb amargi ise-nued-binsaedgi sunmaksad. Dulemar-isgued-ular ibmar-durgan-uksagu, Bab-Jehová'ga ibmar-ogumakar-uksagu, degi, dule-gwenatigwar-guega ibmar-uksagu, Aarón ibmar-ogumakar-ukleged-aila-naba-gwichidgi banguded.

²³Geb sorbali, Moisés, Aarón'bo, Bab-Dummad-dulemarbo-ambikued-negse dogsamalad. Agi gannar noarmargua, Israel-dulemargi ise-nued-binsaedgi sunmakdemalad. Geb Bab-Jehová na e-gangued-yeerdakleged Israel-dulemarse oyosad. ²⁴Degidgine, Bab-Jehová soo barmialid. Geb ibmar-ogumakar-ukleged-aila-birgi ibdurgan-gummakega-bukwad, degi, ibdurgan-gwallumar-bukwad bela soose gummaksad. Ar deyob daksamargua, bela Israel-dulemar weligwaledba oimakdemalad. Geb Bab-Jehová-nug-odummogega napase e-wagar dulluu imaksamalad.

Nadab-isgusad, degi, Abiú-isgusad

10 ¹Aarón-masmala Nadab, degi, Abiú, na egad-egad sianar susmalad. Geb sianargi soo ogasmalad, deginbali, sianargi inawawadikid urbismarbalid. Degi-inigwele, Bab-Jehová-ega-igar-uksadba imaksasurmalad. ²Degisoggu, Bab-Jehová Nadab'gi, degi, Abiú'gi soo barmialid. Geb wemala, Bab-Jehová-asabin burgwismalad.

³Geb Moisés, Aarón'ga sogded: “Bab-Jehová we, sogsa gusad. Deun sogsagusgu:

‘Dule anse warmakmaladga, an-islidik-gued an ega oyogoed.

Bela dulemarga an-gangued-yeerdakleged an oyogoed.’”

Agine, Aarón bar sunmaksasulid.

⁴Geb a-sorbali, Moisés Uziel-masmalase gochad, Misael'se, degi, Elzafán'se. Uziel'de Aarón-e-gilor gued. Geb Moisés we-masmalaga sogded: “Be dagmar. Bab-Jehová'se-goled-neggi be-gwenadgan-warbogwad-burgwismaid be onodamar. Israel-dulemar-danar-danar-bukwad-magaba be sedmar.”

⁵Geb degine, Misael, Elzafán'bo e-gwenadgan-burgwismalad-ononadmalad. Geb dule-burgwismalad-e-mor-dummad-yoidgi bipirmakar Israel-dulemar-danar-danar-bukwad-magaba onosmalad. Ar igi Moisés ega igar-uksa, deyob imaksamalad.

Dule-irwa-Babse-goled-burgwisad-igar-maid

⁶Geb degine, Moisés, Aarón'ga, degi, Aarón-masmala-warbogwad Eleazar'ga, degi, Itamar'ga sogded:

“Be bukib-itoged-oyomalaga, melle be gwiarsuli-gudii gumalo, degi, melle be-mor be esirmakmarbalo. Degisulile, be burgwemaloed, degine, Bab-Jehová bela-Israel-dulemargi uludbaloed. Ar be-gwenadgan-Israel-dulemardi, Bab-Jehová-soo-odesad-ular, akarsuli bukib-itomaloed.

⁷Bab-Dummad-dulemarbo-ambikued-neg-yawagakgi mer be bangumalo, adi, mer be burgwemalagar. Na bemar ebinsao, ar Bab-Jehová'ga-arbaega bemar-nonogi Bab-Jehová'ga-nugsalenaidgi-olivo-gwallu-ebuleged eolesad.”

Eleazar, degi, Itamar, Moisés-ega-sogsadba ibmar imaksamalad.

Bab-Dummadse-goled-negse-doglegoed-igar

⁸Geb degine, Bab-Jehová Aarón'ga sunmakded, ega sogded: ⁹“Be, degi, be-masmala dulemar-anbo-ambikued-negse dogsokarmalale, bemar bipisaale vino, degi, sisa gobosurmalad. Ar degisulile, bemar burgwemaloed. We-igar be-waganga degisadegu-mai guoed. ¹⁰Ar bemar nue-mag-dake gumalargebed, igid ibmar-nuedi, igid ibmar-igana, degi, igid ibmar-swilidikidi, igid ibmar-swilidikidsuli. ¹¹Deginbali, ani, Bab-Jehová, an bemarga Moisés'ba igar-uksagusad, bemar Israel-dulemar-odurdakoed.”

Dule-irwa-Babse-gormaladga mas-ukleged

¹²Moisés, Aarón'ga, degi, Aarón-masmala-dula-besmalad-Eleazar'ga, degi, Itamar'ga sogded:

“Bab-Jehová'ga-ibmar-gwag-gullemalad-e-madubur-uklenaid-gwabgusad be sumala. Geb we-madubur, e-inasuli, ibmar-ogumakar-ukleged-aila-naba be gunmar, ar we-ibmarde bela-bela ibmar-islidikidid. ¹³Neg-islidikidgi be gunmaloed. Ar we-ibmar Bab-Jehová'ga-soogi-ogumakar-uklegedid, bega, degi, be-masmalaga uklesad. Ar weyobi anga igar uklesad.

¹⁴”Deginbali, be, be-masmala, degi, be-bunamala ibmar-e-binasgar-bana-bana-imaklesad, degi, e-dua-Bab-Jehová'ga-uklesad sunna neg-islidikidgi gunmarbalid. We-ibmarmar Israel-dulemar gwenatigwar-guega Bab-Jehová'ga ibmar-uklegedid. Bab-Jehová sogdad: ‘Bega, degi, be-mimmiganga degisadegu uklegoye.’ ¹⁵Bab-Jehová'ga ibmar-ogumakar-uklenaid-e-gwallu-ogumaklegoedba-mesa, ibmar-dua-uklegoed, degi, binasgar-bana-bana-imaklegoed Bab-Jehová'ga uklegoed. We-ibmarmar bega, degi, be-mimmiganga degisadegu uklegoed, ar igi Bab-Jehová igar-uksa gusa.”

Eleazar, degi, Itamar, igar-maidba imaksasurmalad

16 Geb degine, Moisés, isgued-ular-sibad-machered-uklenaid egichided. Ar Moisés wisguargu, bato bela gummaksaye, Aarón-masmala-warbogwad Eleazar'se, degi, Itamar'se uluded, amarga sogded:

17—¿Ar ibiga bemar neg-islidikidgi dule-isgusad-ular-Bab-Jehová'ga-ibmar-uklenaid guchasurmala? Ar we-ibmar nue-islidikid gued. Bab-Jehová dulemar-e-isgued-osulogega bemarga uksanad. Ar we-ibmar-uklegedgi Bab-Jehová dulemar-e-isgued osuloged. **18** Ar sibad-machered-e-abe Bab-Dummadse-goled-Neg-Islikididyaba seledsursoggu, bemar sibad-machered-e-san neg-islidikidgi guchawilubmalanad, ar igi an bemarga igar-uksa gusa.

19 Geb Aarón, Moisés-abin sogded:

—Emi, an-masmala Nadab, degi, Abiú, na e-isgued-ular ibmar uksamalanad, degi, Bab-Jehová'ga ibmar-ogumakar uksamarbalinad. Degi-inigwele, we-masmala-ebogwad an surgunonikid. Ar emi, isgued-ular-ibmar-ukleged an guchana, ¿Bab-Jehová'de nabir an-dakoen be insae? Suli. Nabir an-dakosulinad.

20 Moisés, weyob Aarón-e-abin-imaksa-itosgua, yeer itosad.

3. IGAR-SWILIDIKID, DEGI, IGAR-SWILIDIKSULID

(11:1—15:33)

Ibdurgan-swilidikmalad, degi, ibdurgan-swilidiksuralad

(Deuteronomio 14:3-21)

11 **1** Bab-Jehová, Moisés'ga, degi, Aarón'ga sogded:
2 “Israel-dulemarga be sogmar: ‘Bela we-napneggi ibdurgan-bukwamalad-abargi, wemar be gunmaloed:

3 Ibdurgan-e-goonasi-darbo-mamararmalad,
gagan-masar, gannar-mabaliga sabanyagi mas saboged,
Wegiid-ibdurganmar be nabir gunnoed.

4” Degi-inigwele, ibdurgan-gagan-masar, gannar-mabaliga sabanyagi mas saboged, amar-abargi goonasi-darbo-mararsurmalad gudidimogad. Amardi be gunnosulid. A-ibdurganmala, wemalad:

Moli-yargan-mureged, we-moli gagan-masar, gannar-mabaliga sabanyagi mas saboged, ar e-gonasidi, mararsulid.

We-ibdurgan bemarga ibmar-swilidiksulidga guoed.

5 Deginbali, nubi, gannar-mabaliga sabanyagi mas saboged, ar e-gonasidi, mararsulid.

We-ibdurgan bemarga ibmar-swilidiksulidga guoed.

6 Amba deyobi, ugdun, gannar-mabaliga sabanyagi mas saboged, ar e-gonasidi, mararsulid.

We-ibdurgan bemarga ibmar-swilidiksulidga guoed.

⁷ Deginbali, sina, goonasi-darbo-marar-nika-inigwele, gannar-mabaliga sabanyagi mas sabosulid.

We-ibdurgan bemarga ibmar-swilidiksulidga guoed.

⁸ ” We-sanmar be gunnosurmalad, deginbali, a-ibmar-burgwarmalad be ebugosurmarbalid. Bemar we-ibmarmar swilidiksuli dakoed.

⁹ Ibdurgan-dii-yagi-gudidimalad-see-nikamalad, degi, uka-nikamalad, demargineddibe, diwargineddibe, be sunna gunmaloed.

¹⁰ Ar ibmar-dummagan, degi, ibmar-senigan-see-nikasurmalad, degi, uka-nikasurmalad, demargineddibe, diwargineddibe, bemar we-ibdurgan swilidiksuli dakoed.

¹¹ ” E-san bemar gunnosulid, deginbali, we-ibmar-burgwarmalad bemar ima-dakbaloed, ar ade, bemarga ibmar-swilidiksulidga guoed.

¹² Bela ibmarmar-diigi-gudidimalad-see-nikasurmalad, degi, uka-nikasurmalad, bemarga ibmar-swilidiksulidga guoed.

¹³ ” Bemar we-nuumar ima-dakoed, be gunnosurmalad, ar ade, we-nuumar bemarga swilidiksuli gued:

Sulubagi,

sulubagi-garmar-bisge-bisge-imaked,

uabu, ¹⁴ mula,

degi, bela sulubagi-senigan akar-akar-daklemalad,

¹⁵ bela abgokor akar-akar-daklemalad,

¹⁶ nuu-dummad-dukar-suid avestruz'ye-nugad,

irmon-senigan,

bela dilli-dilli akar-akar-daklemalad,

¹⁷ irmon, diidod,

badu-cisne'ye-nugad,

¹⁸ noo-mutikid,

gorgi, mula-dummad,

¹⁹ dabgala,

bela dabgala-dummagan-akar-akar-daklemalad,

sikwi-nugar-suid-abubilla'ye-nugad,

degine, uksir.

²⁰ ” Bela ibsenigan-gukumalad mali-walabakegwadgi-nanamalad, bemarga ibmar-swilidiksulidga guoed. ²¹ Degi-inigwele, ibsenigan-gukumalad mali-walabakegwadgi-nanamalad, ukinbali, ichomakega

e-nag-sorbalid-bur-suigan nikamalad, be sunna gunmaloed. ²² Bemar we-ibmarmar sunna gunmaloed:

Bela ses-dummagan-akar-akar-daklemalad,

sesmar, degi, ses-senigan.

²³ Ar bela ibsenigan-gukumalad-bamalad

mali-walabakegwadgi-nanamalad, bemarga ibmar-swilidiksulidga guoed.’ ”

Ibmar-swilidiksuralad-ebusad-igar

24 Bab-Jehová, Moisés'ga, degi Aarón'ga sogdebalid: “We-ibmarmar-
ulale, bemar swilidiksuli gunonikoed.

Ar doa-dule we-ibdurgan-burgwormalad ebusdibe,
neg-mutikidse swilidiksuli gudii guoed.

25 Ar doa-dule we-ibdurgan-burgwaled ebusale,
na e-mor enukoed.

We-dule mutikidse swilidiksuli gudii guoed.

26 Bela ibdurgan goonasi-mamararsulid, degi, mas gannar-mabaliga
sabanyagi mas-sabosulidi,
bemar swilidiksuli dako.

Bemar we-ibdurgan-ebusale,
swilidiksuli be guoed.

27 Bela ibdurgan-mali-walabake-nikamalad
e-goo-nasigi-nanasuralad,
bemarga ibmar-swilidiksulidga guoed.

Doa-dule we-ibmar-burgwaled ebusale,
neg-mutikidse swilidiksuli gudii guoed.

28 Dule we-ibmarmar-burgwaled ebusale, e-mor enukoed.

We-dule mutikidse swilidiksuli gudii guoed.

We-ibmarmar ibmar-swilidiksuli be dakoed.

29 Napagi ibmar-durgan-garmakdii-abargi, bemar we-ibdurgan
swilidiksuli dakoed:

Diachugiid-comadreja'ye-nugad,
nusa, ammanoomar-akar-akar-daklemalad,

30 akwa-nuku, daim,

isgin, asbanmar,

degi, gwanurgiid-camaleón'ye-nugad.

31 Napagi ibdurgan-garmakdii-abargi, we-ibdurgan bemar swilidiksuli
dakoed.

Ar doa-dule we-ibmar-burgwaled-ebusale,
neg-mutikidse swilidiksuli gudii guoed.”

Ibdurgan-swilidiksuralad-ebusad-igar-bamalad

32 Bab-Jehová, Moisés'ga, degi, Aarón'ga sogdebalid: “We-ibdurganmar-
burgwaled we-ibmarmargi argwachale:

Ibmar-urgogi-sobaledgi,

ibmar-ibdurgan-ukagi-sobaledgi,

morgi, sagugi,

degi, ibmar-arbaedgi-ebulegedgi, argwachale,

we-ibmarmar mutikidse swilidiksuli guoed.

Ar gannar we-ibmarmar swilidik-guega, diigi enuklegergebed.

Geb deyobi gannar swilidik gunonikoed.

33”Napsa-bormo-yagi we-ibmarmar-burgwaled argwachale, we-napsa-bormo-yagi bela ibmar-bukwadi ibmar-swilidiksulidga gunonikoed. Degisoggu, we-napsa-bormo mamarilegoed. 34We-napsa-bormogi-dii-siid ibmar-gullegedgi dedemaksale, we-ibmar-gulleged swilidikidsulidga gunonikoed. Deyobbalid, we-napsa-bormogi-dii-siid gobedgi dedemaksale, we-gobed swilidiksuli gunonikoed.

35”We-ibmar-burgwaled ibmar-bamaladgi argwachale, we-ibmarmar bela ibmar-swilidiksulidga gunonikoed. Madu-yoedgi argwachadibe, soogi argwachadibe, we-ibmarmar swilidiksulidga gunonikoed. Degisoggu, we-madu-yoed mamarilegoed, degi, we-soo obelolegoed. We-ibmarmar swilidiksuli gunonikid. Degisoggu, bemar deyobi, we-ibmar dakoed.

36”Degi-inigwele, unnila dian, degi, dii-sailagi bia dii-sulege, amarbi amba ibmar-swilidikidga guoed, gwen isguosulid. Ar dule we-ibmar-burgwaled-ebusaddi, swilidiksuli gunonikoed.

37”Ar we-ibmar-burgwaled ibmar-gwag-diglesokalidgi argwachale, we-ibmar-gwag amba swilidik guoed. 38Ar ibmar-gwaggi dii eolesardi, geb agi, we-ibmar-burgwaled egi argwachale, adi, we-ibmar-gwag swilidiksuli gunonikoed.

39”Ibdurgan-nabir-gulleged burgwisale, ar doa-dule we-ibmar-burgwaled-ebusale, neg-mutikidse swilidiksuli gudii guoed. 40Dule we-ibmar-burgwisad-e-san guchale, na e-mor enukoed. We-dule mutikidse swilidiksuli gudii guoed. Doa-dule we-ibmar-burgwisad magaba-onosale, na e-mor enukoed. We-dule mutikidse swilidiksuli gudii guoed.”

Napagi-ibdurgan-garmakdimalad ise-gullemalad

41Bab-Jehová, Moisés’ga, degi Aarón’ga sogdebalid: “Bemar napagi-ibdurgan-garmakmalad gunnosulid, ar ade, ibmar-swilidiksuraladid.

42”Ibdurgan-unimakar-nanamalad, e-mali-walabakegwadgi-nanamalad, degi, e-malimar-ichesulidgi-nanamalad, bemar gunnosuralad, ar ade, swilidiksuraladid. 43Ibdurgan-unimakar-nanamalad-gunnedba mer be swilidiksuli gumalo, mer be isgumalo, ar we-ibdurganmar swilidiksuli gumalad.

44”Ani, an-bemar-Bab-Dummad-Jehová gued. Ar an dule-isligwaledsoggu, bemar gwage-swilidik imakmalo, deyobi, bemar gwage-swilidik gudimalo. Ibdurgan-unimakar-nanamalad-gunnedba, degi, ebagedba, mer be swilidiksuli gumalo. 45Ani an Bab-Jehová gued. Ani an Egipto-yargi bemar-onosad, adi, an be-Bab-Dummadga guegar. Degisoggu, bemar gwage-swilidik imakmala, ar an dule-islidikidid.

46”Ibdurgansik, nuumarsik, bela ibdurgan-dii-yagi-gudidimaladsik, degi, bela ibdurgan-napagi-garmakdidimaladsik, weyob igarmar megisad. 47Adi, bemar magar-dakega, igid ibmar-isgana-gue, igid ibmar-nuegan-gue. Deginbali, igid-ibdurgan nabir gullege, igid-ibdurgan ise gullebali.”

Ome ugakgusad-sorba san-uruked-igar

12 ¹Bab-Jehová, Moisés'ga sogded: ²“Israel-dulemarga be weyob sogo: ‘Ome-wargwen gurgin-nika gunonikile, geb machigwa baknonikile, ibagugle (7) san-swilidiksuli gudii guoed. Ar igi na e-igar-dakdiir gudidae, deyobi gudiguoed. ³Ibabaabakgi (8) machi-bipi-ibe e-abgan-uka-duku siklegoed. ⁴Ar e-nandi ibadulagwen-gakambe-gakapaa (33) e-boni-itosad-ulale, san-urukdii guoed. San-urukdiid-e-ibagan-berguedse, geb ibmar-swilidikmalad ebugoed, degi, Bab-Dummad-goled-negse dogoed.

⁵”Ar bunolo-baksardi, adi, itoged-ilabo san-swilidiksuli gudii guoed. Ar igi na e-igar-dakdiir gudidae, deyobi gudii guoed. Geb iba-dulapaa-gakanergwa (66) e-boni-itosad-ulale, san-urukdii guoed.

⁶”Ome, machigwa-nikusad-ulardibe, bunolo-nikusad-ulardibe, san-urukdiid-e-ibagan-bergunonikile, ome sibat-wawaad-bipigwad Bab-Jehová'ga-ogumakar-ukega sedoed. Degi, e-isgued-ular, wagnuu-gwagwendibe, sapur-nuu-gwagwendibe, Bab-Dummad-dulemarbo-ambikued-neg-yawagakse oburgwilegega sedoed. Agi dule-irwa-Bab-Dummadse-goledga ukoed. ⁷Geb dule-irwa-Bab-Dummadse-goled we-ome-e-isgued-eliega Bab-Jehová-asabin a-ibmar ogumakar ukoed. Deyobi, we-ome, e-burba-milesadgi nue-swilidik gunonikoed.

”’Omega machigwa-uklesdibe, bunolo uklesdibe, weyob ega igar-mai guoed. ⁸Ar ome sibat-wawaad-bipigwad-bakega mani galakuele, sunna wagnuu-gwabodibe, sapur-nuu-gwabodibe, sedoed. Gwagwen ogumakar-uklegega guoed. Baidi, e-isgued-ular-uklegega guoed. Dule-irwa-Bab-Dummadse-goled we-ome-e-isgued-eliega Bab-Jehová'ga ukoed. Deyobi, ome nue-swilidik gunonikoed.’”

Naibe-buna-yaa-maleged-e-igar

13 ¹Bab-Jehová, Moisés'ga, degi, Aarón'ga sogded: ²“Dule-gwensak e-ukagi ukamar-mullu-mullu-bukwale, duuled-siidibe, e-ukagi ibmar-sipuu naidibe, yaa-siid naibe-bunayob-dakledibe, we-dule, dule-irwa-anse-goledse seledoed, Aarón'sedibe, e-masmalasedibe. ³Dule-irwa-anse-goled dule-ukagi-yaa-siid dakoed. Yaa-siidgi e-siga sipuu naile, degi, yaa ise-nue-gulluu daklegele, wedi, naibe-buna-yaa gued. Geb dule-irwa-anse-goled uka-daksad-sorbali, sogoed: ‘We-dule, swilidiksurye.’

⁴”Ar dule-ukagi ibmar-sipu-naid, unnila asginbi-nai daklegele, deginbali, e-siga sipuu daklesurbalile, dule-irwa-anse-goled, ibagugle (7) we-dule dule-baigangi bachikii mesoed. ⁵Geb ibagugledgine (7), dule-irwa-anse-goled, we-dule-e-uka gannar dakbaloed. Ar amba gannar deyob yaa daklegele, degi, ega bar nasgusulile, dule-irwa-anse-goled, gannar ibagugle (7) we-dule mesbaloed. ⁶Geb ibagugle-nasad-sorbali (7), dule-irwa-anse-goled, we-dule-e-uka gannar dakbaloed.

Ar yaa bar nasgussulile, degi, aka bur bergumai daklegele, dule-irwa-anse-goled sogoed: ‘We-dule, swilidik guye.’ Ar ade, unnila binsa uka ainisad. Geb degine, dule na e-mor enukoed, geb dule swilidik gunonikoed.

7”Uka-oyoapid-sorbali, we-dulega yaa nasgudele, dule-irwa-anse-goledse gannar e-uka oyonabaloed. 8 Dule-irwa-anse-goled we-dule-e-uka dakoed. Ar yaa-siid nasgumai-dakele, we-dule swilidiksurye sogoed, ar we-yaade, naibe-buna-yaa gued.”

Dule-ukagi yaa-siged e-igar

9 Bab-Jehová, Moisés’ga, degi, Aarón’ga sogdebalid: “Dule ukagi yaa siile, dule-irwa-anse-goledse seledoed. 10 Dule-irwa-anse-goled dule-e-uka dakoed. Ar uka-engunaid, degi, e-sigamar, sipuu naile, deginbali, e-san-gisigwad magar-daklebalile, 11 wedi, naibe-buna-yaa bur buledid. Dule-irwa-anse-goled sogoed: ‘We-dule, swilidiksuli guye, nue-boninikaye.’ Degisoggu, bar bachikii we-dule-mesosulid, ar ade, bato wismalad, we-dule, swilidiksuli gued.

12”Ar dule-irwa-anse-goled dule-uka bela nonose-bakale, nagadukuse-nasgumai dakele, 13 geb we-dule-e-uka argaoed. Ar dule-irwa-anse-goled, bela binsa-uka-nika dakele, sogoed: ‘We-dule, swilidik guye.’ Ar e-uka bela sipuu naded-ulale, we-dule swilidik gunonikid. 14 Ar e-ukagi e-san-gisigwad daklealirdi, adi, soglegoed, we-dule, swilidiksurye. 15 Dule-irwa-anse-goled we-san-gisigwad dakoed, geb sogoed: ‘We-dule, swilidiksurye.’ Ar san-gisigwad, swilidiksulid. We-boni naibe-buna-yaa gued.

16”Ar san-gisi-dakleged sipuu daklenadele, dule-naibe-buna-yaa-nikadi dule-irwa-anse-goledse naoed, 17 adi, ega yaa-siid dakegar. Ar yaa sipuu daklenadele, dule-irwa-anse-goled sogoed: ‘We-dule, swilidikye.’ Deyobi, dule swilidik gunonikoed.”

Ukagi dusi-siged-igar

18 Bab Jehová, Moisés’ga, degi, Aarón’ga sogdebalid: “Ar dule-gwensak e-ukagi dusi siile, degi, sorba nugunonikile, 19 geb dusi-sigisadgi ega uka-enguardibe, gutu-gisi-sipusaar nanguardibe, dule-irwa-anse-goledse oyonaoed, 20 adi, ega uka dakegar. Ar dusi-sigisadgi ise-nue-gulluu daklegele, degi, e-siga sipuu nadele, dule-irwa-anse-goled sogoed: ‘We-dule swilidiksurye.’ Ar ade, dusi-sigisadgi naibe-buna-yaa signonikid. 21 Ar dule-irwa-anse-goled we-dusi-sigisadgi siga sipuu daksulile, degi, ise-nue-gulluu daksulile, aka bur dulega yaa bergumai-dakele, ibagugle (7) dule-baigangi bachikii we-dule-mesoed. 22 Ar yaa-siid bela uka-ugakaase nasgudele, dule-irwa-anse-goled sogoed: ‘We-dule, swilidiksurye.’ Ar ade, naibe-buna-yaa nikad. 23 Ar yaa-siid bar dungusulile, deginbali, uka-sipu-naid bar nasgusurbalile, aka bur nugumaile, dule-irwa-anse-goled sogoed: ‘We-dule, swilidikye.’ ”

Dule-gummaksad-igar

24 Bab-Jehová, Moisés'ga, degi, Aarón'ga sogdebalid: “Dule-gwensak gummaksale, geb gummakaledgi uka sipuu naguardibe, igi, gisii naguardibe, 25 dule-irwa-anse-goled we-gummakaled dakoed. Ar gummakaledgi e-siga sipuu naile, degi, yaa ise-nue-gulluu daklegele, wedi gummakaledgi naibe-buna-yaa signonikid. Dule-irwa-anse-goled sogoed: ‘We-dule, swilidiksurye.’ Ar ade, we-dule naibe-buna-yaa nikad.

26”Ar dule-irwa-anse-goled gummakaled-daksadgi, dakalile, siga sipuu gussuli, deginbali, yaa ise-nue-gulluu daklesurbali, aka bur bergumai dakele, dule-irwa-anse-goled ibagugle (7) dule-baigangi bachikii we-dule-mesoed. 27Ibagugle-gusale (7), dule-irwa-anse-goled gannar ega uka dakbaloed. Ar yaa-siid bela uka-ugakaase nasgudele, dule-irwa-anse-goled sogoed: ‘We-dule, swilidikidsurye.’ Ar ade, naibe-buna-yaa nikad. 28 Ar yaa-siid nasgusulirdi, unnila gummaksad-e-gannar gued. Degisoggu, dule-irwa-anse-goled sogoed: ‘We-dule, swilidikye.’ Ar ade, unnila gummaksad-e-wilub gued.”

Nonogi, degi, akugi-yaa-siged-igar

29 Bab-Jehová, Moisés'ga, degi, Aarón'ga sogdebalid: “Machered-wargwengi, igi, omegindibe, e-nonogi yaa sigialile, igi, e-akugi yaa sigialile, 30 dule-irwa-anse-goled we-yaa dakoed. Ar we-yaa ise-nue-gulluu daklegele, e-sigamar gordik, degi, ichee daklegele, dule-irwa-anse-goled sogoed: ‘We-dule, swilidiksurye.’ Ar wedi nono-yaa, degi, aku-yaa nikad. 31 Ar dule-irwa-anse-goled we-yaa-daksadgine, dakele, yaa gulluu daklesuli, deginbali, e-sigamar sichii daklesuli, ibagugle (7) dule-boni-nikad dulemar-baigangi bachikii mesoed. 32 Ibagugledgine (7), dule-irwa-anse-goled we-dule nue, argaoed. We-yaa-maleged nasgussulile, degine, a-yaagi e-sigamar gordiksulile, degine, yaade dogdar-gulluu daklesulile, 33 geb agi, e-siga-emiega we-dule-imakoed. Unnila yaa-siidgi e-siga emiosulid. Geb degi, dule-irwa-anse-goled we-dule-yaa-nikad gannar ibagugle (7) dulemar-baigangi bachikii mesoed. 34 Ibagugledgine (7), dule-irwa-anse-goled gannar nue-argabaloed. We boni-nikad e-ukagi nasgussulile, degine, yaa asginewale, dule-irwa-anse-goled sogoed: ‘We-dule, swilidikye, boni nikasurye.’ We-dulede na e-mor enukoed, degi, soglegoed, we swilidikye.

35”San uruksad-sorba boni-nikad ega nasgudele, 36 dule-irwa-anse-goled nue-argaoed. Boni-nikad ukagi nasgudele, dule-irwa-anse-goled siga-gordikid bar amiosulid. We-dule boni-nikad, burbar swilidiksulid. 37 Ar boni nasgumai daklesulile, degine, siga-sichigana ainialile, we-dule-bonigwaledi nugusad. We-dule, bonigwarsulid. Dule-irwa-anse-goled sogoed: ‘We-dule swilidikye.’ ”

Ukagi yaa-binsaled-siged-igar

³⁸Bab-Jehová, Moisés'ga, degi, Aarón'ga sogdebalid: “Amba deyobbalodo, machered-gwensak, igi, ome-gwensakdibe, na e-ukagi uka sipuu nanguardibe, ³⁹dule-irwa-anse-goled ega uka argaoed. Dule-ukagi uka-sipu-naid wis sichisaar daklegele, adi, we binsa uka siid. We-dule, swilidik gued.”

Sailagia-bated-igar

⁴⁰Bab-Jehová, Moisés'ga, degi, Aarón'ga sogdebalid: “Ar dule-gwensak-ibe sailagia babatialile, degi, sailagia-sate gunonikile, we-dule, swilidikidye soglegoed. ⁴¹Ar dule-ibe sailagia-bebegined babatialile, degi, e-bebe swiri gunonikile, we-dule swilidikidye soglegoed. ⁴²Ar e-nono-swirigwad-dakasik, igi, e-bebegindibe, yaa gisaar siile, wedi naibe-buna-yaa siid. ⁴³Geb degine, dule-irwa-anse-goled ega yaa dakoed. Ar dakalile, we-yaa-dule-nono-swiregedgi-siid gisaar daklege, ar igi ukagi naibe-buna-yaa-siir dakledae, ⁴⁴deyob daklegele, we-dule, naibe-buna-yaa nikad. Degisoggu, dule-irwa-anse-goled sogoed: ‘We-dule, swilidiksurye.’ Ar ade, dule, e-nonogi yaa siid.”

Dule-yaa-maleged-nikad-igar

⁴⁵Bab-Jehová, Moisés'ga, degi, Aarón'ga sogdebalid: “Dule-yaa-maleged-nikadi mor-achirmakaled yooed, gwiosurbalid, degi, e-wagar-negabar-odukuar-nadapi binnasuli gornadapoed: ‘¡An swilidiksuli! ¡An swilidiksuli!’ ⁴⁶Dule yaa-maleged-nika-gudiidgine, enik soglegoed: ‘We-dule, swilidiksurye.’ We-dule, swilidiksursoggu, na walagwen mai guoed. Dulemar-danar-danar-bukwad-magaba mai guoed.”

Morgi-gutu-nagued-igar

⁴⁷Bab-Jehová, Moisés'ga, degi, Aarón'ga sogdebalid: “Sibad-wawaad-absargi-mor-makaledgine, degi, lino-dubgi-mor-makaledgine, gutu-nai daklealile, ⁴⁸degi, lino-dubgi-mor-sobaledgine, sibad-wawaad-absargi-mor-sobaledgine, ibmar-ukagine, degi, ibmar-ukagi-ibmar-sobaledgine, gutu-nai daklealile, ⁴⁹ar we-gutu-naid gwili-absargii-dakledibe, igi, gisaar-dakledibe, wedi, boni-dummad gued. Degisoggu, dule-irwa-anse-goledse oyogoed.

⁵⁰”Dule-irwa-anse-goled we-gutu-naid dakoed. Geb we-ibmar-gutu-naid ibagugle (7) bachikii urboed. ⁵¹Dule-irwa-anse-goled ibagugledgi (7) gannar we-gutu-naid argaoed. Ar we-gutu-naid, morgi, mor-sobaledgi, ibmar-ukagi, degi, ibmar-ukagi-ibmar-sobaledgi nasgusale, wedi, boni-dummad gued. We-ibmarmar bar nuedsulid. ⁵²Degisoggu, mor, mor-sobaled, ibmar-uka, degi, ibmar-ukagi-ibmar-sobaled, deyob-gutu-nikamalad, bela ogumaklegoed. Ar ade, boni-dummad gued. Ibmarmar bela ogumaklegoed.

53”Ar dule-irwa-anse-goled ibmar-nue-arganaidgi, we-gutu-naid, morgi, mor-sobaledgi, ibmar-ukagi, degi, ibmar-ukagi-ibmar-sobaledgi nasgussuli dakele, 54 dule-irwa-anse-goled sogoed: ‘Ibmar-gutu-nikad enukmarye.’ Geb we-ibmarmar gannar ibagugle (7) bachikii urbebaload.

55”Ibmar-gutu-nikad enuklesad-sorba, dule-irwa-anse-goled gannar ibmar-dakbaload. Ar dakele, gutu-naid bergussuli, amba gannar nai, gutu nasgussur-inigwele, soglegoed: ‘We, ibmar-nuedsurye, bela ichakwaye.’ Degisoggu, we-ibmar ogumaklegoed.

56”Ar dule-irwa-anse-goled ibmar-enuklesad-sorba we-gutu-naid boree-nai dakalile, morgi-gutu-naid, ibmar-ukagi-gutu-naid, degi, mor-sobaledgi-gutu-naid sikoed. 57 Ar we-gutu-naid gannar morgi-nai, mor-sobaledgi-nai, ibmar-ukagi-nai, degi, ibmar-ukagi-ibmar-sobaledgi-nai daklealile, wedi, gannar boni-dummad nagualid. Ar gutu-naid ogumaklegoed.

58”Ar mor, mor-sobaled, ibmar-uka, degi, ibmar-ukagi-ibmar-sobaled enuklesadgine gutu-naid allisale, we-ibmarmar gannar enuklebaload, geb we-ibmarmar swilidik gunonikoed.

59 Sibad-wawaad-absargi-mor-makaledgi boni-gutu-naidga, lino-dubgi-mor-makaledgi boni-gutu-naidga, mor-makaledgi boni-gutu-naidga, degi, ibmar-ukagi-ibmar-sobaledgi boni-gutu-naidga, weyobi igar megoed.

Adi, soglegega, we-ibmar swilidikye, igi, swilidiksurye.”

Naibe-buna-yaa-nikusar, san-urukoed-igar

14 1 Bab-Jehová Moisés’ga sogded: 2 “Dule-naibe-buna-yaa-nikusad na e-san-urukega, weyob ega igar-mai guoed: Dule-irwa-anse-goledse we-dule seledoed. 3 Geb dule-irwa-anse-goled, we-dule-e-uka-dakega, dulemar-danar-danar-bukwad-magaba nodoed. Ar dule-irwa-anse-goled, naibe-buna-yaa-siid nugusa dakele, 4 we-dule-e-san-urukega, nuu-dulad-swilidikid-gwabo, urwar-urgo, morgo-ginnid, degi, hisopo-ana, sedagoye sogoed. 5 Geb a-sorbali, dule-irwa-anse-goled ibe-dii napsa-noggi-sioed. Geb a-birgi nuu-gwagwen oburgoed. 6 Geb degine, nuu-dulad, urwar-urgo, morgo-ginnid, degi, hisopo-ana suoed. Geb we-ibmarmar nuu-duladba-mesa, nuu-oburgwilesad-e-abegi owardikuoed. 7 Dule-irwa-anse-goled dule-naibe-buna-yaa-nika-gusadgi ilagugle (7) abe bomi-bomi imakoed. Geb dule-swilidikgusyeg sogsad-sorbali, dule-irwa-anse-goled nuu-dulad indakoed, adi, nuu e-itolegedba sapurba gukumai guegar.

8”Dule-san-uruknaid e-mor enukoed, bela e-sailagia, e-siga swiri-imakoed, degi, diigi nue oboed, adi, swilidik guegar. Geb a-sorbali, dule-nugusad, sunna dulemar-danar-danar-bukwadse dogoed. Degi-inigwele, ibagugle (7) e-dordoneyaba gabosulid. 9 Ibagugledgine (7), gannar e-sailagia, e-aku-siga, e-ibya-siga bela swiri imakoed. Na e-mormar enukoed, ise-obar imakbaload. Deyobi, we-dule swilidik gunonikoed.

10”Geb dule-nugusad ibabaabakgine (8) we-ibmarmar-ukleged senonikoed:

Sibad-wawaad-ome-senigwad-swilidikid boni-nikasulid, warbo, sibad-wawaad-ome-birgagwen-nikad-swilidikid boni-nikasulid, wargwen, degi, ibmar-gwag-uklegedga madubur-nued nibirambe-gakatar (15) olivo-gwalluba-omukuar sedabaloed, deginbali, olivo-gwallu bute-abala ukbaloed.

11”Dule-irwa-anse-goled dulega-san-uruknaidi, we-dule, degi, e-ibmarmar-ukleged dulemar-anbo-ambikued-neg-yawagakse an-asabin bana-bana imakoed, ar ade, wemar bana-bana-ibmar-uklegedid. 12 Geb sorbali, dule-irwa-anse-goled sibad-wawaad-sapingwagwad-wargwen olivo-gwallu-litro-abalad-mesa suoed, geb a-ibmar-sulesad dule-isgusad-ular Bab-Jehová’ga ukoed. Geb Bab-Jehová-asabin bana-bana imakoed, ar ade, wemar bana-bana-ibmar-uklegedid. 13 Dule-irwa-anse-goled neg-islidikidgi bia isgued-ular ibdurgan-e-dukar-egwallege, degi, bia ibdurgan-ogumakar-ukleged-e-dukar-egwallege, agi sibad-wawaad-bipigwad-e-dukar egwannoed. Ar isgued-ular-ibdurgan-ukleged, degi, na-dukin-isgusad-ular-ibdurgan-ukleged dule-irwa-anse-goledgadga gued, ar ade, we-ibmarmar nue-islidikidid.

14”Geb dule-irwa-anse-goled dule-isgusad-ular, ibdurgan-uklenaid-e-abe weoed.

Geb dule-san-uruklenaid-e-uaya-nuedsikidgi, e-goo-dummad-nuedsikidgi, degi, e-nag-goo-dummad-nuedsikidgi, a-abe magoed.

15”Ama deyobi, dule-irwa-anse-goled olivo-gwallu-bute-abalad subaloed.

Geb e-argan-nuku-sapiledsikidgi eogoed.

16 Geb degine, e-goo-dummad-nagabalid-nuedsikid olivo-gwallu-e-argan-nuku-sapiledsik-siidgi owardikuoed.

Geb olivo-gwallu-owardikusad an-asabin ilagugle (7) bomi-bomi imakoed.

17”Geb dule-irwa-anse-goled e-argan-nukugi olivo-gwallu-ganikid-obichadi, dule-san-uruknaidgi magoed:

E-uaya-duku-nuedsikidgi, abe-magaled-birgi magoed, e-argan-goo-dummad-nuedsikidgi, abe-magaled-birgi magbaloed,

degi, e-nag-goo-dummad-nuedsikidgi, abe-magaled-birgi magbaloed.

18 Deginbali, olivo-gwallu-ganikid-obichadi, dule-san-uruknaid-e-nonogi eobaloed.

Dule-irwa-anse-goled dule-san-uruknaid-e-isgued-elilegegala, an-asabin weyob ibmar imakoed.

19”Geb sorbali, dule-irwa-anse-goled dule-san-uruknaid-e-igsawed-ular anga ibdurgan ogumakar ukoed. Deyobi, dule-san-swilidiksuli-gudiid, san swilidik gunonikoed.

”Aginde, dule-irwa-anse-goled ibdurgan-ogumakar-uklegoed-e-dukaregwannoed. 20 Geb we-ibdurgan ibmar-ogumakar-ukleged-ailagi anga ibmar-gwag-uklegedba-mesa ogumaklegoed. Dule-irwa-anse-goled dule-san-uruknaid-e-igsawed-elilegegala, weyob ibmar imakoed. Geb we-dule san swilidik gunonikoed.

21 ”Ar dule-san-uruknaid dule-wilegedirdi, sibad-wawaad-warbaagwad-bakega mani satele, adi, sibad-wawaad-sapingwagwad-wargwen e-igsawed-ular ukoed. We-sibad-wawaad-sapingwagwad, dule-e-igsawed-elilegegala, bana-bana-imaklegar uklegoed. Deginbali, madubur-bur-nued-nibiratar olivo-gwalluba-omukualed, degi, olivo-gwallu-bute-abala, ibmar-gwag-uklegedyob sedbaloed. 22 Amba deyobi, wagnuu-gwabo, sapor-nuu-gwabodibe, e-mani-nikadba sedbaloed. Nuu-gwagwena, e-igsawed-ular ukoed, baiddi, ogumakar ukoed. 23 We-ibmar, ibabaabagine (8), dule-irwa-anse-goled-asabin sedagoed, adi, san swilidik guegar. Dulemar-anbo-ambikued-neg-yawagakgi an-asabin uknonikoed. 24 Dule-irwa-anse-goled sibad-wawaad-sapingwagwad-igsawed-ular-uklenaid, degi, olivo-gwallu-bute-abala suoed. Geb an-asabin bana-bana-ibmar-uklegedyob ukoed. 25 Geb sorbali, sibad-wawaad-sapingwagwad-igsawed-ular-uklenaid-e-dukaregwannoed. Dule-irwa-anse-goled, a-abe weoed.

Geb dule-san-uruknaid-e-uaya-uku-nuedsikidgi,
e-argan-goo-dummad-nuedsikidgi,
degi, e-nag-goo-dummad-nuedsikidgi,
a-abe magoed.

26 ”Geb a-sorbali, dule-irwa-anse-goled olivo-gwallu na e-argan-nuku-sapiledsikidgi eogoed.

27 ”Geb e-argan-nuedsikid-e-goo-dummad-nagabalid we-olivo-gwallu-ganikidgi owardikuoed. Geb an-asabin olivo-gwallu ilagugle (7) bomi-bomi imakoed.

28 ”Geb dule-irwa-anse-goled e-argan-nukugi olivo-gwallu-ganikid-obichadi, dule-san-uruknaidgi magoed:

E-uaya-uku-nuedsikidgi, abe-magaled-birgi magoed,
e-argan-goo-dummad-nuedsikidgi, abe-magaled-birgi
magbaloed,
degi, e-nag-goo-dummad-nuedsikidgi, abe-magaled-birgi
magbaloed.

29 ”Dule-irwa-anse-goled e-argangi-olivo-gwallu-ganikid-obichadi dule-san-uruknaid-e-nonogi magoed, adi, deyobi, an we-dule-e-igsawed ega elioed. 30 Geb a-sorbali, wagnuu-gwabo, sapor-nuu-gwabodibe, e-mani-nikadba ukoed. 31 Nuu-gwagwenad dule-igsawed-ular uklegoed.

Baidi, ibmar-gwag-uklegedba-mesa ogumakar uklegoed. Dule-irwa-anse-goled dule-san-uruknaid-e-igsawed-elilegega, an-asabin weyob ibmar imakoed.”

³²Dule-naibe-buna-yaa-nikusad san-urukegala, ibmar-baid geg-ukele, weyob ega igar mai guoed.

Neg-igsawad-uruklegoed-igar

³³Bab-Jehová, Moisés’ga, degi, Aarón’ga sogded: ³⁴“An bemarga Canaán-yar-uknaidse be dogsamalale, agi an bema-neggi digwar nasikdemalale, ³⁵e-neg-ibed dule-irwa-anse-goled-owisonaoed, ega sogoed: ‘An-neg-galugi digwaryob nai an dakye.’

³⁶”Geb degine, dule-irwa-anse-goled neg-argaed-iduale, bela negyaba-ibmar-bukwad oniega imakoed, adi, bela negyaba-ibmar-bukwad melle isguegar. Deyob imaklesale, geb dule-irwa-anse-goled neg-argaega negyaba dogoed.

³⁷”Ar dule-irwa-anse-goled neg-arganaidgi neg-galugi digwar gordik, igi, gisii nai dakele, deginbali, we-gutu-nanaid yaa-bubukwayob daklebalile, ³⁸dule-irwa-anse-goled, a-neggi nodagoed. Geb ibagugle (7) a-neg ediar sioed. ³⁹Ibagugledgine (7), dule-irwa-anse-goled gannar neg-arganabaloed. Ar galugi-digwar-naid nasgusale, ⁴⁰dule-irwa-anse-goled igar-ukoed, akwamar-digwar-nikad ungemarye. Geb a-akwamar ibmar-iskanamar-milegedgi, neggwebur-magaba minamaloed. ⁴¹Deginbali, igar-ukbaloed, bela negyabali, galugi-napsa-magaled baad-baad imakmarye. Geb napsa-babatisadi ibmar-isgana-milegedgi, neggwebur-magaba minamaloed. ⁴²Geb degine, akwamar-onolesad-muchub, akwamar-binigan sioed, geb we-galu-birgi napsa-binid magoed.

⁴³”Ar galugi akwamar-onosad-sorba, galu-adarisad-sorba, degi, galu-maglesad-sorba, a-neggi gannar digwar nagualile, ⁴⁴dule-irwa-anse-goled we-neg gannar arganaoed. Ar a-neggine, digwar bela nasgusale, we-digwar ibmar-oichogedid. A-ulale, neg swilidiksuli gued. ⁴⁵Degisoggu, we-negde earilegoed, bela e-akwamar, e-urgomar, degi, bela we-neg-sobega-ibmar-ebulesmalad ibmar-isgana-milegedgi, neggwebur-magaba milegoed.

⁴⁶”Doa-dule, dule-irwa-anse-goled we-neg-edisad-ibagangine, we-negyaba dogsadibe, we-dule neg-mutikguedse swilidiksuli gudii guoed. ⁴⁷Dule a-neggi gabisale, mas-guchale, e-mor enukoed.

⁴⁸”Ar dule-irwa-anse-goled neg-argaega negyaba-dogsadgi dakalile, neg-maglesad-sorba bar digwar nasgussuli, sogoed: ‘We-neg, swilidik guye.’ Ar ade, digwar bar a-neggi naisulid.

⁴⁹”Dule-irwa-anse-goled neg-urukegala, nuu-gwabo-sedoed, deginbali, urwar-urgo, morgo-ginnid, degi, hisopo-ana sedbaloed. ⁵⁰Geb a-sorbali, dule-irwa-anse-goled ibe-dii napsa-noggi-sioed. Geb a-birgi nuu-gwagwen oburgoed. ⁵¹Geb a-sorbali, urwar-urgo, hisopo-ana, morgo-ginnid, degi, nuu-dulad nuu-burgwisad-abegi, degi, dii-siidgi owardikuoed. Geb dule-irwa-anse-goled ilagugle (7) abe neggi bomi-bomi imakoed.

52”Weyobi dule-irwa-anse-goled nuu-abegi, diigi, nuu-duladgi, urwar-urgogi, hisopo-anagi, degi, morgo-ginnidgi neg urukoed. 53 Geb degine, nuu-dulad neggwebur-magaba indakoed, adi, e-itolegedba sapurba gukumai guegar. Weyobi, neg urukoed, geb we-neg swilidik gunonikoed.

54”Weyobi naibe-buna-yaa-maleged akar-akar-daklemaaladga, 55 morgi-gutu-naguedga, neggi-digwar-naguedga, 56 uka-enguedga, yaa-sigedga, degi, ukagi-gutu-sipu-naguedga igar mai guoed. 57 Adi, bemar dulemar-odurdakega, sana wede ibmar swilidik gue, degi, sana wede ibmar swilidiksuli gue. Deyobi, naibe-buna-yaa-maleged-nikuedga igar mai guoed.”

Machered-abgangi boni-nikad-igar

15 1 Bab-Jehová Moisés’ga, degi, Aarón’ga sogded:
2 “Israel-dulemarga be sunmakmar, ega be sogmar: ‘Machered-gwensak, e-abgangi boni-nikale, we-dule swilidiksuli gunonikoed. 3 Ar ega duled-bupunmaksadibe, bupunmaksasurdibe, we-dule swilidiksuli guoed.

Weyob ibmar swilidiksuli gunonikoed:

4 We-dule-boni-nikad bia megoe, a-ibmar swilidiksuli gunonikoed. Amba deyobbalid, we-dule ibugi sigoe, bela a-ibmar swilidiksuli gunonibaloed.

5 Ar doa-dule, dule-boni-nikad-e-meged-ebusale, e-mor enukoed, degi, obbaloed.

Dule-ibmar-ebusad neg-mutikguedse swilidiksuli gudii guoed.

6 Ar doa-dule, bia dule-boni-nikad-sigisadgi sigisale, e-mor enukoed, degi, obbaloed.

Dule-sigisad neg-mutikguedse swilidiksuli gudii guoed.

7 Amba deyobbalid, ar doa-dule, dule-boni-nikad-ebusale, e-mor enukoed, degi, obbaloed.

We-dule neg-mutikguedse swilidiksuli gudii guoed.

8 Ar dule-boni-nikad dule-baidgi wii-agsale, dulegi-wii-aglesad e-mor enukoed, degi, obbaloed.

Dulegi-wii-aglesad neg-mutikguedse swilidiksuli gudii guoed.

9 Dule-boni-nikad moli-e-gangi-sigisale, we-moli-e-gan swilidiksuli gunonikoed.

10 Ar doa-dule, dule-boni-nikad-urba-ibmar-sigisad-ebusale, dule-ibmar-ebusad neg-mutikguedse swilidiksuli gudii guoed. Ar dule-we-ibmar-sedoed e-mor enukoed, degi, obbaloed.

Geb we-dule neg-mutikguedse swilidiksuli gudii guoed.

11 Ar dule-boni-nikad e-argan-enuksasuli dule-ebusale, we-dule-ebulesad e-mor enukoed, degi, obbaloed.

Dule-ebulesad neg-mutikguedse swilidiksuli gudii guoed.

12 Ar dule-boni-nikad ibmar-napsagi-sobaled-ebusale,
we-ibmar-napsagi-sobaled marilegoed.

Ar ibmar-urgogi-sobaled-ebusale,
we-ibmar diigi nue enuklegoed.

13 Dule-bonigwaled nugusdibe, san-uruked-igar-imakegala, ibagugle
(7) edarboed.

E-mor enukoed, diigi nue-oboed,
geb deyobi, swilidik gunonikoed.

14” ’We-dule-nugusadi, ibabaabakgine (8), wagnuu-gwabo, sapur-
nuu-gwabodibe, Bab-Jehová’ga Bab-Dummad-dulemar nugusdibe
boo-ambikued-neg-yawagakse sedoed. Agi dule-irwa-Bab-Dummadse-
goledga nuumar ukoed. 15 Dule-irwa-Bab-Dummadse-goled nuu-gwagwen
dule-isgued-ular ukoed, nuu-baididi ogumakar Bab-Jehová’ga ukoed.
Deyobi, dule-irwa-Bab-Dummadse-goled Bab-Jehová-asabin swilidik-
imakega dule-bonigwaled-saoed.

16” ’Machered-gwensak e-san-burba misale, oboed. Geb neg-
mutikguedse swilidiksuli gudii guoed. 17 Ar ibi-morgindibe,
ibi-ibmar-ukagindibe, dule-burba milesale, we-ibmar diigi nue
enuklegoed. Geb neg-mutikguedse swilidiksuli guoed. 18 Dule-gwensak
omebo-gabisadgi, e-san-burba misale, ebobela nue obmaloed. Geb neg-
mutikguedse swilidiksuli gudii gumaloed.’ ”

Ome-igar-daked-igar

19 Bab-Jehová, Moisés’ga, degi, Aarón’ga sogdebalid: “Israel-dulemarga
be sunmakmar, ega be sogmar:

‘Ome-gwensak na e-igar-dakdiile, ibagugle (7) swilidiksuli gudii guoed.
Ar doa-dule we-ome ebusale, we-dule mutikguedse swilidiksuli
gudii guoed.

20 Ar we-ome ibugi megoe, bela we-ibmar swilidiksuli gunonikoed.
Ar we-ome na igar-dakdiid-ibangangi ibugi sigbalodibe, amba
deyobi, a-ibmar swilidiksuli gunonibaloed.

21 Ar doa-dule we-ome-gabed-ebusale,
we-dule e-mor enukoed, degi, nue obbaloed.
Geb neg-mutikguedse swilidiksuli gudii guoed.

22 Ar doa-dule we-ome-ibmar-birgi-sigisad ebusale,
e-mor enukoed, degi, nue obbaloed.

Geb neg-mutikguedse swilidiksuli gudii guoed.

23 Ar doa-dule we-ome-gabisad-birgi-ibmar-bukwad-ebusdibe,
we-ome-gangi-sigisad-birgi-ibmar-bukwad-ebusdibe,
we-dule neg-mutikguedse swilidiksuli gudii guoed.

24 Ar machered-gwensak we-omebo-gabisale, ibagugle (7) swilidiksuli
gunonikoed.

Deginbali, we-machered bia gaboe, bela a-ibmar swilidiksuli
gunonimogoed.

- 25 Ome-gwensak na e-igar-daked-e-ibagan-sogedba e-igar-dakdiid ega bergusulile, igidibe, e-igar-dakdiid-e-ibagan ega suitii nadele, we-ome weyob-gudiid-berguedse swilidiksuli gudii guoed.
- 26 We-ome na e-igar-dakdiid-ibangangi ibigi gaboe, we-ibmar ome-igar-dakdiid-berguedse swilidiksuli gunonikoed.
Deginbali, we-ome ibugi sigoe, bela we-ibmar ome-igar-dakdiid-berguedse swilidiksuli gunonibaloed.
- 27 Ar doa-dule we-ibmarmar-ebusale, swilidiksuli gunonikoed. E-mor enukoed, degi, nue obbaloed. Geb neg-mutikguedse swilidiksuli gudii guoed.
- 28” ’Ome na-e-igar-dakdiid-bergunonikile, san-uruked-igar-imakegala, ibagugle (7) edarboed. Geb a-sorbali, swilidik gunonikoed. 29 We-ome ibabaabakgine (8), wagnuu-gwabo, sapur-nuu-gwabodibe, Bab-Jehová’ga Bab-Dummad-dulemarbo-ambikued-neg-yawagakse sedoed. Agi dule-irwa-Bab-Dummadse-goledga nuumar ukoed. 30 Dule-irwa-Bab-Dummadse-goled we-nuu-gwagwen dule-isgued-ular ukoed, nuu-baiddi Bab-Jehová’ga ogumakar ukoed. Deyobi, dule-irwa-Bab-Dummadse-goled, Bab-Jehová-asabin ome-igar-dakdiid swilidik-imakega saod.’ ”
- 31 Bab-Jehová, Moisés’ga, degi, Aarón’ga, sogdebalid: “Deyobi, bemar, Israel-dule-swilidiksuralad e-dulemargi bachikii imakmaloed. Adi, anse-goled-neg bemar-abargi-siid-oichosmalad-ulale, mer wemar burgwemalagar.”
- 32 Deyobi, machered-e-abgangi-boni-nikadga, degi, machergan-san-burba-mimaladga igar mai guoed. Ar ade, weyob-gued-ulale, swilidiksuli gunonidamalad. 33 Deyobi, ome-igar-dakdiidga, machered-e-burba-misadga, degi, machered-ome-igar-dakdiidse-gochadga, igar mai guoed.

4. ISGUED-ELILEGED-IBA-IGAR

(16:1-34)

Isgued-osulogega ibmar-ukleged-igar

16 1 Aarón-masmala-warbogwad-burgwismalad-sorbali, Bab-Jehová, Moisés’ga sunmaksad. Ar we-masmala Bab-Jehová’ga-ibmar-ogumakar-ukleged-ailase yogasaar-warmaksadba burgwismalad. 2 Bab-Jehová, Moisés’ga sogded: “Be-ia-Aarón’ga be soge: ‘Bab-Dummadse-goled-neggi mor-dummad-naid-daksik, Neg-Ise-Islidikidse wachi-yogasaar mer be dogo. Deginbali, Bab-Dummad-Ulu-birgi-eduged-maid-asabin mer be yogasaar dogbalo, adi, mer be burgwegar. Ar ade, ulu-eduged-birgi mogir-imbaba, Bab-Jehová magarononidaed.’ ”

3 Bab-Jehová, Moisés’ga sogdebalid: “Anse-goled-Neg-Ise-Islidikidse Aarón dogsokalile, e-isgued-ular moli-bebe-nikad-sapingwagwad anga sedoed, deginbali, sibad-wawaad-machered ogumakar-ukega anga sedbaloed. 4 Aarón nue obsad-sorbali, we-mor-nue-islidikmalad yooed:

Lino-mor-islidikid,
 lino-garson-bipi-urbalid,
 lino-morgo-dub-sadergi-nagued,
 deginbali, lino-mor-gurgin-ebirmakaled sibaload.

Wemarde mor nue-islidikmaladid.

5”Aarón, Israel-dulemar-e-igsawed-ular, sibat-machered-warbo anga ukoed, deginbali, ogumakar-ukega sibat-wawaad-machered-wargwen anga ukbaload.

6”Aarón, e-igsawed-ular moli-bebe-nikad-sapingwagwad sedagoed. Geb e-igsawed-eliega, degi, e-gwenadgan-e-igsawed-eliega, we-moli-sapingwagwad anga ukoed. 7Geb sorbali, Aarón sibat-machered-warbogwad suoad, geb dulemar-anbo-ambikued-neg-yawagakgi anga ukoed. 8Geb degine, Aarón we-sibadmar wilub-dakoed, adi, dakega, igid Bab-Jehová’gad guoe, igid Azazel’gad guoe. 9Sibat-machered Bab-Jehová’gadga-gunonikid, isgued-ular oburgwilegoed. 10Ar sibat-machered Azazel’gadga-gunonikiddi, isgued-eliegala, an-asabin dula uklegoed. Geb a-sorbali, we-sibat Azazel’ga nega-dulesulidganba barmidoed.

11”Aarón e-igsawed-ular, moli-bebe-nikad-sapingwagwad sedagoed. Geb e-igsawed-eliega, degi, e-gwenadgan-e-igsawed-eliega, we-moli-sapingwagwad anga ukoed. Geb Aarón, e-igsawed-ular, we-moli-sapingwagwad-e-dukar egwannoed. 12Geb a-sorbali, Aarón an-asabin ibmar-ogumakar-ukleged-ailagi-soo-gasiid sianar-ena weoad. Deginbali, ina-wawadikid-nagaled-yeer-yapanned argan-nukbo subaload. Geb Aarón, we-ibmarmar atued-dummad-naid-daksik sedoed. 13Geb agine, an-asabin soo-yagi ina-wawadikid eogoed, adi, a-waa-bupurmakdoedi Dulemar-Anbo-Igar-Mesisad-Ulu-edugedgi daasa sigoed. Deyob imakoed, adi, Aarón melle burgwegar.

14”Geb a-sorbali, Aarón, moli-bebe-nikad-sapingwagwad-e-abegi, e-goo owardikuoed. Geb Ulu-Eduged-dad-nakwedsikidgi, a-abe bomi-bomi imakoed. E-googi abe-naid ilagugle (7) ulu-asabin bomi-bomi imakoed.”

15Bab-Jehová, Moisés’ga sogdebalid: “Aarón, Israel-dulemar-igsawed-eliegala, sibat-machered-e-dukar-egwannoed. A-abe, atued-dummad-naid-daksik sedoed. A-abede, igi moli-bebe-nikad-sapingwagwad-e-abe imaksa, deyobi imakbaload: A-abe, Dulemar-Anbo-Igar-Mesisad-Ulu-eduged-birgi, degi, Ulu-asabin, bomi-bomi imakoed. 16Deyobi, Aarón, anse-goled-neg bela ibmar-isganagi, angi yolesmaladgi, degi, Israel-dulemar-e-igsawesmaladgi urukoed. Amba deyobi dulemar-anbo-ambikued-neg, dulemar-igsawesmalad-abargi-siid, imakbaload.

17”Aarón Neg-Ise-Isidikidyaba isgued-ular ibmar-uknaidgine, degi, gannar nodagedse, dule-wargwensaale dulemar-anbo-ambikued-neggi gudiguosulid. Aarón, e-igsawed-ular, e-gwenadgan-igsawed-ular, degi, Israel-dulemar-igsawed-ular, ibmar-uksale, 18An-asabin ibmar-ogumakar-ukleged-aila-gwichid-urukega nodagoed.

Moli-bebe-nikad-sapingwagwad-e-abe, degi, siband-machered-e-abe weoed. Geb ibmar-ogumakar-ukleged-aila-dikarba moli-bebeyob-gwigwismaladgi magoed. ¹⁹Aarón e-googi-abe-naid ibmar-ogumakar-ukleged-ailagi ilagugle (7) bomi-bomi imakoed. Aarón Israel-dulemar-isgusad-ulale, deyobi, ibmar-ogumakar-ukleged-aila urukoed.

²⁰"Aarón Neg-Ise-Islikidid, dulemar-anbo-ambikued-neg, degi, ibmar-ogumakar-ukleged-aila swilidik-imaksad-sorbali, siband-machered-dulad anga sedagoed. ²¹Aarón siband-machered-dulad-nono-birgi e-arganmar mesoed. Geb degine, bela Israel-dulemar-ibmar-isgana-imaksamalad, angi-bela-yolesmalad, degi, bela e-isgusmalad barsogoed. Deyobi, we-siband-macheredgi Israel-dulemar-e-isgusmalad nagoed. Geb dule-ega-igar-uklesadi, we-siband, nega-dulesulidganba sedoed. ²²Dule, we-siband-machered nega-dulesulidgangi indakoed. Geb we-siband bela Israel-dulemar-e-isgusad nega-dulesulidganba sedoed.

²³"Geb a-sorbali, Aarón dulemar-anbo-ambikued-negse dognonikoed. Agine, Neg-Ise-Islikididse-dogega lino-mor-yosadi esugoed. Geb agi a-mormar urboed. ²⁴Geb Aarón e-neg-obed-islidikidgi oboed. Agine, gannar e-mor-binsaled yooed. Geb a-sorbali, nodagoed. Geb e-igued-ular, degi, Israel-dulemar-e-igued-ular ibmar ogumakar ukoed. Deyobi, e-igued-eliega, degi, Israel-dulemar-e-igued-eliega, ibmar ogumakar ukoed. ²⁵Deginbali, igued-ular ibdurgan-uklenaid-e-gwallu ibmar-ogumakar-ukleged-ailagi ogumakbaloed.

²⁶"Dule, nega-dulesulidganba Azazel'se siband-machered berbeapid, e-mor enukoed, degi, obbaloed. Geb weyob-imaksad-sorbali, nabir Israel-dulemar-danar-danar-bukwadse gannar nonikoed.

²⁷"Moli-bebe-nikad-sapingwagwad, degi, siband-machered-igued-ular-oburgwilesad, igued-eliega amar-abe Neg-Ise-Islikididse selesgusad. We-ibdurganmar, Israel-dulemar-danar-danar-bukwad-magaba seledoed. We-ibdurganmar-e-ukadi, e-sanmardi, degi, e-saamardi, soogi ogumaklegoed.

²⁸"Dule-we-ibmarmar-ogumakoedi, e-mor enukoed, degi, obbaloed. Geb weyob-imaksad-sorbali, nabir Israel-dulemar-danar-danar-bukwadse gannar nonikoed."

²⁹Bab-Jehová, Moisés'ga sogdebalid: "Israel-dulemarga, degi, Israel-dulesurmaladga, weyobi degisadegu igar mai guoed: Nii-walagugled-ibambegi bemar mas-gunsuli gudii guoed. Deginbali, bemar bipisaale arbaosurbalid. ³⁰Ar a-ibagi, an-asabin bemar-igued elilegoed, degi, bemar bela we-isgumaladgi swilidik gunonimaloed. ³¹A-iba, bemarga obunnoged-iba guoed, agi bemar mas-gunsuli gudii guoed. We-igar, degisadegu-mai guoed.

³²"Dule, e-bab-sorba-gan-suega dule-irwa-anse-goled-bur-dummadga-nugsalesad ega-bela-gangued-uklesadi, igued-ular ibmar-uked imakoed. We-dule, lino-mor-nue-islidikid yooed. ³³We-dule, Neg-Ise-Islikidid, dulemar-anbo-ambikued-neg, degi, ibmar-ogumakar-ukleged-aila, swilidik imakoed.

Deginbali, dule-irwa-anse-gormalad-e-igsawed-ular, degi, bela Israel-dulemar-e-igsawed-ular anga ibmar-ukbaloed.

34”Bemarga weyob degisadegu we-igar mai guoed: Israel-dulemar-e-igsawed-eliegala, bema birgagi irgwen we-igar imakdii gumaloed.”

Ar igi Bab-Jehová ega sogsa, deyob Moisés bela imaksad.

5. ISLIDIK-GUED-IGAR

(17:1—25:55)

Babse-goled-negginbi ibmar uklegoed

17 1 Bab-Jehová, Moisés’ga sogded: 2 “Aarón’ga, degi, e-masmalaga, degine, bela Israel-dulemarga be sogge: ‘Bab-Jehová weyob bemarga igar-uked:

3” ‘Ar Israel-dule-gwensak moli-bebe-nikad, sibad-wawaaddibe, sibaddibe, Bab-Jehová’ga ukbigualile, 4 Bab-Jehová-dulemarbo-ambikued-neg-yawagakgi oburgwergebed. Ar dule, danar-danar-bukwadgi ibdurgan-oburgwisale, igi danar-danar-bukwad-magaba oburgwisale, we-dule, dummad-nosad. A-ulale, we-dule, Israel-dulemar-abargi onolegoed. 5 We-igar weyob-maid, adi, Israel-dulemar-neg-swiregedgi-ibdurgan-oburgwedamaladi Bab-Jehová’ga sedmalagar. Dule-irwa-Bab-Dummadse-goledse Bab-Jehová-dulemarbo-ambikued-neg-yawagakse sedmaloed. Geb agi dule-irwa-Bab-Dummadse-goled Israel-dulemar gwenatigwar-guega we-ibdurgan Bab-Jehová’ga ukoed. 6 Geb a-sorbali, dule-irwa-Bab-Dummadse-goled, Bab-Dummad-dulemarbo-ambikued-neg-dogedgi ibmar-ogumakar-ukleged-aila-gwichidgi, we-ibdurgan-e-abe bomi-bomi imakoed. Geb Bab-Jehová-yeer-yapanne-itogega, ibdurgan-e-gwallu ega ogumakoed. 7 Bema niamarga bar ibmar ogumakar ukosurmalad. Bema a-niamar-nug odummodii gusmalad, eba isgudii gusmalad. Degisoggu, be-waganga weyob degisadegu igar-mai guoed.’

8”Dulemarga be sogbaloed: ‘Ar Israel-dule-gwensakdibe, Israel-dulesulid-bema-abargi-gudiiddibe, ibmar ogumakar-uknaile, igi, ibmar-baid uknadibe, 9 we-ibmar Bab-Dummad-dulemarbo-ambikued-neg-yawagakse Bab-Jehová’ga-ukega sedergebed. We-ibmar sessulile, we-dule Israel-dulemar-abargi onolegoed.’ ”

San-abebiid ise-gulleged

10 Bab-Jehová sogdebalid: “Israel-dulemarga be sogbaloed: ‘Ar Israel-dule-gwensakdibe, Israel-dulesulid-bema-abargi-gudiiddibe, san-abebi guchale, we-dulegi an sabsur-gwisguoed, degi, we-dule e-dulemar-abargi an onogoed. 11 Ar ade, bela ibdurgan-dula-gued, degi, dule-dula-gued abegi danikid. Ani an ibdurgan-e-abe bemarga uksad, adi, bema ibmar-ogumakar-ukleged-ailagi a-abe bema-igsawed-ular anga ukegar. Ar ade, abegi dule-igsawed elileged.’ ”

12”Degisoggu, Israel-dulemarga an soged: ‘Bemar bipisaale san abebi gunnosurmalad, deginbali, Israel-dulesulid bipisaale san abebi gunnosurmogad.’

13”Ar Israel-dule-gwensakdibe, Israel-dulesulid-bemar-abargi-gudiiddibe, ibmar-durgan-nabir-gulleged-maksale, nuudibe, a-abe eogoed, geb a-abegi ukub mioed. 14Ar ade, abegi bela ibdurgan-dula-gued danikid. A-ulale, an bemarga sogsad: ‘Bemar bipisaale san abebi gunmalosurye, ar ade, abegi bela ibdurgan-dula-gued danikid. Ar doa-dule san abebi guchale, we-dule e-dulemar-abargi onolegoed.

15”’Bela Israel-dulemardibe, Israel-dulesuliddibe, ibdurgan-achusapurse-burgwisad guchale, igi ibdurgan-san-ichimaklesad guchale, e-mor enukoed, degi, nue obbaloed. Geb we-dule neg-mutikguedse swilidiksuli gudii guoed. Geb a-sorbali, swilidik gunonikoed. 16Ar e-mor enuksulirdi, degi, obsurbalirdi, e-igued na dukin sedii guoed.’ ”

Bab-Dummad-igargi nanamaloed

18 1 Bab-Jehová Moisés’ga igar uksad: 2 “Weyob be Israel-dulemarga sogo: ‘Ani an be-Bab-Dummad-Jehová gued.

3” ’Bemar Egipto-dulemar-damaladyob, melle be damalo. A-yargi bemar bukwagusmalad.

” ’Bemar Canaán-dulemar-damaladyob, melle be damalo. A-yarse an bemar-sedsokalid. Deginbali, e-damaladba, melle be nanamarbalo. 4 An-bemarga-igar-uksadba be ibmar imakmalo, degi, an-Igar-Mamaidba be nanamalo. Ani an be-Bab-Dummad-Jehová gued. 5 Degisoggu, an-Igarmar-Mamaidba, an-bemarga-igar-uksamaladba be nanamalo. Ar doa-dule we-igar-mamaidba ibmar-imizele, dula-gudii guoed. Ani an Bab-Jehová gued.’ ”

Dule e-gwenadbo negsichigi-nanaosulid-igar

6 Bab-Jehová Moisés’ga sogdebalid: “Dule-wargwensaale e-gwenadbo negsichigi galagwensuli nanadii guosulid. Ani an Bab-Jehová gued.

7 Melle be-nanbo negsichigi galagwensuli be nanadii guo.

Ar degiile, be-babgi be dododii itole.

Melle be deyob nanao, ar be-nan gued.

8 Melle be-bab-omebo negsichigi galagwensuli be nanadii guo.

Ar degiile, be-babgi be dododii itole.

9 Melle be-bun-gargwenadbo negsichigi galagwensuli be nanao. Deginbali, melle be-bun-be-babsikidbo, be-bun-be-nansikidbo, negsichigi galagwensuli be nanadii guo.

Ar amba we-be-bunmar be-negyagi gwalulesdibe, igi, be-negyagi gwalulesurdibe, mer deyob ebo be nanao.

10 Melle be-waganbo negsichigi galagwensuli be nanadii guo.

Ar degiile, na be dukin be-nug oichogoed.

- 11 Melle be-bab-ome-e-sisgwabo negsichigi galagwensuli be nanadii guo.
Ar be-bab-sisgwayob gued.
Degisoggu, be-bungi be dododiiyob gued.
- 12 Melle be-ammorbo negsichigi galagwensuli be nanadii guo,
ar ade, be-bab-e-bun gued.
- 13 Melle be-nan-e-iorbodibe, be-nan-e-urbabodibe negsichigi galagwensuli be nanadii guo,
ar ade, be-nan-e-gwenadgan gued.
- 14 Melle be-gilor-e-omebo negsichigi galagwensuli be nanadii guo.
Ar be-gilor-ome be-ammorga gunonikid.
- 15 Melle be-balabo negsichigi galagwensuli be nanadii guo.
Ar ade, be-machi-ome gued.
- 16 Melle be-ia-omebodibe, be-urba-omebodibe, negsichigi galagwensuli be nanadii guo.
Ar degiile, be-ia-e-nug, be-urba-e-nug be oichogoed.
- 17 Melle ome-wargwenbo, degi, e-sisgwabo, deginbali, e-waganbo negsichigi galagwensuli be nanadii guo.
Ar ade, wemar na gwenadgan gumalad.
Ar deyob be gudiile, nue-dummad be isgudiid.
- 18 Ar amba be-ome-dula-gudiidgine, be-ambe be nikuosulid, deginbali, ebo be negsichigi galagwensuli nanadii guosurbalid.
Ar degiile, omegan na ebo e-isdarmaladga gunonimaloed.”

Galagwensuli-nanaleged-igar-baigan-imaklegosulid

- 19 Bab-Jehová Moisés’ga sogdebalid:
“Ome igar-dakdidibe, melle ese be golo.
Ar ade, ome swilidiksuli gudiid.
- 20 Deginbali, melle dule-baid-e-omebo negsichigi galagwensuli be nanadii guo.
Ar degiile, be swilidiksuli guoed.
- 21 Melle bab-dummad-Moloc’ga be-mimmigan be ogumakar uko.
Ar deyob be imakele, be-Bab-Dummad-nug be oichogoed.
Ani an Bab-Jehová gued.
- 22 Omebo-megeyob mer be macherganbo mego.
Ar wede ibmar-isgana gued.
- 23 Bipisaale ibdurganbo galagwensuli be guosulid.
Ar wede, ibmar-isgana gued.
Ome-wargwensaale ibdurganbo galagwensuli guosulid.
Ar wede, ibmar-isgana gued.”

Dule-bamalad-ibmar-isgana-imakmalad imaklegosulid

- 24 “We-ibmar-imakedba mer be swilidiksuli gumalo. Ar an bemark-
idu-dulemar-onosokalid, we-ibmar-imakedba swilidiksuli gunonimalad.

²⁵Deginbali, e-napase-bakale, nue-igsus nagunonimogad. E-ibmar-igšana-imaksad-ulale, an we-dulemar sabsur-odurdaksad, geb e-dulemar e-yar-igsusadgi ononnolesmalad. ²⁶Degisoggu, an bemarga an-igargan-uksadba, degi, an bemarga an-igargan-sogsadba be ibsamala. Israel-dulemar, degi, Israel-dulesulid-bemar-abargi-mamaid, we-ibmar-igšanamar mer be imakmala. ²⁷Ar we-yargi bemar-idu dulemar-ambikusmalad we-ibmar-igšanamar imaksamalad. Degisoggu, e-yar nue-igsus nagussunnad. ²⁸Ar bemar we-yar oichosmalale, igi bemar-idu we-yargi dulemar-bukwagusad onilesgusa, deyobi, bemar we-yargi ononnolemoed.

²⁹”Ar doa-dule we-ibmar-igšana imakele, we-dule e-dulemar-abargi onolegoed. ³⁰Degisoggu, an-igar-mamaidba be nanamala. Dulemar we-yargi bemar-idu we-ibmar-igšana-imaksamaladba, mer be nanamala. Mer be we-ibmar-imakedba isgumala. Ani an be-Bab-Dummad-Jehová gued.”

Gwage-swilidik-nanaed-igar

19 ¹Bab-Jehová Moisés’ga weyob igar uksad: ²“Bela Israel-dulemar-bukwadga be sunmako, ega be sogo: ‘Bemar gwage-swilidik-gudii gumalo, ar ande be-Bab-Dummad-Jehová gwage-swilidik gued.

³ Bemar be-babgi, degi, be-nangi, binsaed-nikaa nanamalo.

An-obunnoged-ibagi, be obunnodii nanamalo.

Ani an bemar-Bab-Dummad-Jehová gued.

⁴ Melle bab-dummad surmalad-e-nug be odummomalo, deginbali, melle ibmar-esgoro-dualedgi-sobaled be-bab-dummadga be imakmalo.

Ani an be-Bab-Dummad-Jehová gued.

⁵” ’Gwenatigwar-guega be Bab-Jehová’ga ibmar uksokalile, nuedgi ega be ukoed, adi, Bab-Jehová we-ibmar-uklenaid nuedgi abingaegar.

⁶Uklesad-ibagi we-ibmar-uklesad be gunnoed, deginbali, sunna banedgine be gunbalid. Ar amba ibapaagi we-ibmar gwabgusale, adi, soogi be ogumakoed. ⁷Ar we-ibmar ibapaagi gullegele, we-ibmar isganaga guoed. Bab-Jehová we-ibmar abingaosulid. ⁸Ar dule-we-ibmar-guchad, na e-igued dukin-sedii guoed, ar ade, Bab-Jehová’ga-ibmar-swilidikid-uklesad, ibmar-igšana imaknonikid. We-dule, e-dulemar-abargi onolegoed.’ ”

Dulemar-baiganbo-nanamalad-igar

⁹Bab-Jehová Moisés’ga sogdebalid: “Israel-dulemarga be sogo: ‘Be-nainugi ibmar-gwag be wealile, melle be-nainugi bela ibmar-gwag be weo, deginbali, ibmar-gwag-napagi batisad, melle bar be subalo. Ar we-ibmar-gwag-argwachamalad dule-wileganaga, degi, Israel-dulesulidmarga be obegoed.

¹⁰” ’Melle be-uva bela ise-wear be imako, deginbali, uva-napagi-argwachamalad, melle bar be subalo.

Ar we-uva-argwachamalad dule-wileganaga, degi, Israel-dulesulidmarga be obegoed. Ani an be-Bab-Dummad-Jehová gued.

11 Melle ibmar be atursao.

Melle be gakansao.

Melle na be muchub-muchub yardakmalo.

12 Melle an-nuggi be ise-sogar-sogo: An ibmar imakoye.

Ar degiile, be-Bab-Dummad-nug be oichogoed.

Ani an Bab-Jehová gued.

13 Melle be-dulemar be aporsao, deginbali, melle e-ibe be ibmar atursabalo.

Dule-bega-arbaed yog be bennukar imako, melle banedse e-ibe be mani gao.

14 Melle dule-uaya-yalliled be ukabsao.

Deginbali, melle dule-ibyasulid ibmargi-yolegega be imako.

Bur be be-Bab-Dummad-dobee nanadii guo.

Ani an Bab-Jehová gued.

15 Igar-nabolenaile, igar-innikigwadba be imako.

Melle dule-wilegedba be nai guo.

Deginbali, melle dule-mani-nikadba be nai gubalo.

Dulemarga igar-innikigwadba be igar-nabogo.

16 Melle be dulemargi yogasaar sunmako.

Melle dule-baid-oburgwedgi be binsao.

Ani an Bab-Jehová gued.

17 Melle be-gwenad be isdar dako.

Dule-baid isgusale, ega be bakar ibmar soge, adi, melle e-isgusadba be nagumogagar.

18 Melle be-dulemar be buged-mai imako,

deginbali, melle isdar-dakdii be gubalo.

Ar igi na be san-sabgue, deyobi dule-baid be sabgumogoed.

Ani an Bab-Jehová gued.’ ”

Swilidik-nanamalad-igar-baigan

19 Bab-Jehová Moisés’ga sogdebalid: “Israel-dulemarga be sogo: ‘Bab-Jehová-Igar-Mamaidba be nanadii gumalo.

Melle be-moli-bebe-nikadmar ibdurgan-baidbo be onakdii guo.

Melle be-nainu-gwensakgine, ibmar-gwag be akar-akar digo.

Melle dub-baid-baidgi-oburar-mor-makaled be yoo.

20” ’Ar dule-gwensak, ome-maiga-gudiid-sui-nikusokalidbo negsichigi galagwensuli nanasale, ar amba we-ome yoo manigi onolegele, deginbali, amba yoo maiga-gudiidgi ollorgubalile, ebobela sabsur-odurdaklemaloed. Degi-inigwele, oburgwilegosurmalad, ar ade, ome, amba yoo maiga-gudiidgi ollorgued. 21 We-machered, na e-isgusad-ular, sibad-wawaad-machered Bab-Jehová’ga ukoed. We-sibad-wawaad-machered Bab-Dummad-dulemarbo-ambikued-neg-yawagakse sedoed.

22 Geb dule-irwa-Bab-Dummadse-goled, we-sibad-wawaad-machered isgusad-ular-uklenaidgi, Bab-Jehová'ga sogoed, we-dulega isgued eliyé. Weyobi, dulega, e-isgued elilenonikoed.

23" 'An-bemarga-yar-uknaidse bemar dogsale, agi bemar sapi-nabir-gullemaalad-digsale, gebe we-sapimar-sanmakoed birgapaa be gunnosurmalad, ar ade, we-sapi-e-san bemarga isganaga guoed.

24 Birgabakegwadgine, bela we-sapi-e-san Bab-Jehová-nug-odummogega Bab-Jehová'ga nugsalegoed. 25 Geb birgataledgine, sunna bemar we-sapi-e-san gunmaloed. Deyobi, we-sapi bela-bela bemarga sanmakdoed. Ani an bemar-Bab-Dummad-Jehová gued.

26 Melle san abebi be gunmalo.

Melle ibmar-wilubgan-dakedgi yoedse-ibmar-guoed-sogdii be gumalo.

Melle nia-igar-dule-oichogedgi arbao.

27 Melle sailagia orokwaa be sikmalo.

Deginbali, melle be-siga-e-duku be sikbalo.

28 Dule-burgwisad-ular, melle be-san na be daas-daas imako, deginbali, melle be-sangi ibmar yogasaar narmakar be sobo.

Ani an Bab-Jehová gued.

29 Melle be-sisgwa gambanuchuga be imako,

adi, melle be-sisgangi we-igar-isgana dogega.

Ar degiile, be-yala bela-bela isgudoed.' "

Ibmar-imaklemaalad bamalad

30 Bab-Jehová Moisés'ga sogdebalid: "Israel-dulemarga be sogo: 'An-obunnoged-ibagi be obunnomalo, degi, anse-goled-neg melle neg-isganayob be dakmalo, egi be binsaed-nikaa damalo. Ani an Bab-Jehová gued.

31" 'Melle dule-burwarmaladbo-sunmakmarye-sogmaladse be idakmalo.

Deginbali, melle burba-isganase-gormaladse be idakmarbalo.

Ar deyob be imakmalale, eba be isgumarmoged.

Ani an be-Bab-Dummad-Jehová gued.

32 Dador begi danikile, iduale be gwichibin imako.

Dadormargi be binsaed-nikaa dao.

Be-Bab-Dummad-dobee be nanao.

Ani an Bab-Jehová gued.

33" 'Dule-yar-baidsikid bemar-yargi-megnonikile, melle be sabsur-imakmalo. 34 We-dule-bemar-abargi-maidi, be-negginedyob be dakmalo.

Ar bemaryobgusoggu, be nue sabgumalo. Be insamalo, Egipto-yargi, be-yarsulidgi, be deyob gudii gusmarmogad. Ani an bemar Bab-Dummad-Jehová gued.

35 Igar-nabolenaidgi, igar-maidba inniki be imako:

Melle napaneg-wilubsalenaidgi, be galakuar wilubsao.

Melle ibmar-oidikunaidgi, be galakuar oaidikuo.

Melle ibmar-mergu-urbilegedgi, be galakuar urbo.

36 Ibmar-wilubdaked-nued, nibir-nued, degi, ibmar-wilubsaed-nued be ebumalo.

Ani an be-Bab-Dummad-Jehová gued.

An Egipto-yargi be-onosadid.

37” ’Degisoggu, bela an-igar-mamaidba be ibsamalo. Bela an bemarga igar-uksadba be ibmar imakmalo. A-sogedba be nanadii gumalo. Ani an Bab-Jehová gued.’ ”

Isgusad-ular sabsur-odurdakleged-igar

20 1 Bab-Jehová Moisés’ga sunmakded, ega sogded: 2 “Israel-dulemarga weyob be sogo:

” ‘Ar Israel-dule-gwensakdibe, Israel-dulesulid-bemar-abargi-maiddibe, e-mimmi bab-dummad-Moloc’ga ogumakar uksale, we-dule oburgwilegoed. Dulemar, we-dule akwagi-makar oburgoed. 3 An-sunnad we-dulegi an yoleмогоed. An we-dule e-dulemar-abargi obelogoed. Ar bab-dummad-Moloc’ga e-mimmi-ogumakar-uksad-ulale, an-nug-islidikid oichosad, degi, anse-goled-neg oichosbalid. 4 Ar dulemar, we-dule na-e-mimmi bab-dummad-Moloc’ga ogumakar-uksad baisur-dakele, degi, we-dule-oburgwesurmalale, 5 ani an we-dule, degi, e-gwenadgan sabsur-odurdakoed. We-dule, degi, bela dulemar-bab-dummad-Moloc-nug-odummosmaladmala, an e-dulemar-abargi obelogoed.

6” ’Dule-wargwen dule-burgwarmaladbo-sunmakmarye-sogmaladse idakele, degi, burba-isanase-gormaladse idakele, deginbali, amarba-nai guarbalile, we-dulegi an gwisguoed. We-dule, e-dulemar-abargi an obelogoed.

7” ’Degisoggu, angarbi be gudii gumalo, gwage-swilidik be imakmarsun, ar ade, ani an be-Bab-Dummad-Jehová gued. 8 An-igarmar-mamaidba be ibsamala, degi, eba be ibmar imakmala. Ani an Bab-Jehová, bemar-gwage-swilidik-imakedid.

9” ’Ar dule-gwensak e-bab-ukabsasale, e-nan-ukabsasale, we-dule oburgwilegoed, ar ade, e-bab, degi, e-nan-ukabsasad. We-dule, na dukin burgwed amisad.

10” ’Ar dule-gwensak dule-baid-omebo negsichigi galagwensuli nanasale, wemar, ebobela oburgwilemaload.

11” ’Ar dule-gwensak e-bab-omebo negsichigi galagwensuli nanasale, e-babgi nue dodosad. A-dule, e-bab-omebo oburgwilegoed. Wemar, na dukin burgwed amismalad.

12” ’Ar dule-gwensak e-bala-ebo negsichigi galagwensuli nanasale, wemar, ebobela oburgwilegoed. Nue-dummad isgusmalad. Wemar, na dukin burgwed amismalad.

13” ’Ar machered-wargwen machered-baidbo galagwensuli gusale, ebobela oburgwilegoed, ar ade, nue-dummad isgusmalad. Wemar, na dukin burgwed amismalad.

14” ’Ar dule-wargwen ome-nikusadgi, e-ome-e-nan-nikunonibalile, we-dule, nue-dummad isgusad. Degisoggu, we-dule, degi, we-omegan-warbogwadmala, ogumakar oburgwilemaloed, adi, bemar-abargi dulemar melle we-ibmar-isgana-imakdii gumalagar.

15” ’Ar machered-gwensak ibdurganbo galagwensuli-gusale, we-dule, oburgwilegoed, deginbali, ibdurgan oburgwilemogoed.

16” ’Ome-gwensak ibdurganbo galagwensuli-gusale, we-ome, degi, ibdurgan oburgwilegoed. Wemar, na dukin burgwed amismalad.

17” ’Ar dule-gwensak e-bun-e-babsikidbodibe, e-nansikidbodibe, negsichigi galagwensuli nanasale, ibmar-isgana imaksad. Degisoggu, e-dulemar-wagab ebobela oburgwilemaloed. E-bun-e-nug dummad-oichosad. We-dule, e-isgusad-ular, oburgwilegoed.

18” ’Ar dule-gwensak ome-e-igar-dakdiidgi ese gochale, degi, ome-igar-dakdiid eyeye sogsamogale, wemar, ebobela e-dulemar-abargi onolegoed.

19” ’Melle be-ammor-babsikidbodibe, be-nansikidbodibe, negsichigi be galagwensuli nanao. Ar degiile, be-sergan-nug be oichogood. Wemar, ebobela na e-isgusad-ular, sabsur-odurdaklemaloed.

20” ’Ar dule-gwensak e-gilor-omebo negsichigi galagwensuli nanasale, e-gilor-nug oichosad. Wemar, ebobela e-isgued-sedii gumaloed, mimmi-nikussuli burgwemaloed.

21” ’Ar dule-gwensak, e-iagindibe, e-urbagindibe ome-egwanele, we-dule nue-dummad isgusad. E-ia-nug, degi, e-urba-nug oichosad. We-dule, e-ambebo mimmigan-nikuosuli gudii gumaloed.

22” ’Degisoggu, an bemarga bela an-igarmar-uksadba, an bemarga bela an-igarmar-sogsadba be ibsamalo. A-sogedba, be ibmar-imakdii gumalo. Adi, an-bemar-odosokalid-yargi an melle bemar-onogegar.

23 An bemar-sabed-ular, bemar-idu we-yargi-dulemar-bukmalad an onisokalid-e-damaladba, mer be damalo. Ar we-dulemarde, bela we-ibmar-isganamar-imakdii gusmalad. A-ulale, an wemar bela-bela isdar-daknonikid. 24 Ar bemargardi an sogdo: We-dulemar-be-idu-bukwad-e-yala bemargadga guoed, an bemarga ukoed, adi, degisadegu bemargadga guegar. A-yargi bela-bela ibmar-gulleged obinebaka nikad.

” ’Ani an be-Bab-Dummad-Jehová gued. Bemar an-dulamarga-guega, ani an dulemar-baigangi bachikii bemar-urbisad. 25 Degisoggu, ibdurgan-swilidikid, ibdurgan-swilidiksulidbo, bemar magar-dake gumalargebed. Deginbali, nuumar-swilidikid, nuumar-swilidiksulidbo, bemar magar-dake gumarbalirgebed. Bemar we-ibdurgan-swilidiksulid-ebuged-ular, nuumar-swilidiksulid-ebuged-ular, ibmar-napagi-garmakdimalad-swilidiksulid-ebuged-ular, melle be swilidiksuli gumalo. Ar ade, we-ibmarmar an bemarga swilidik gusurye sogsa gusad. 26 Bemar anga islidik damalargebed, ar ade, ani an Bab-Jehová islidik gued. Ani an dulemar-baigangi bachikii bemar-urbisad, adi, bemar an-dulamarga guegar.

27” ’Machered-gwensakdibe, ome-gwensakdibe, dule-burgwaled-e-burbase idakele, igi, ibmar-wisguega burba-isganase-gordiile, we-dule, akwagi-makar oburgwilegoed. We-dule, na dukin burgwed amisad.’ ”

Dule-irwa-Babse-gormalad gwage-swilidik gudigumaloed

21 ¹ Bab-Jehová, Moisés’ga sogded: “Dule-irwa-Bab-Dummadse-gormalad-Aarón-e-masmalaga be soqe: ‘Melle dule-burgwisad ebumalo. Ar degiile, swilidiksuli gumaloed. ² Aarón-masmala, unnila e-gwenad-walikagwad-burgwismaladbi ebugoed:

E-nan, e-bab,
e-machi, e-bunolo,
e-ia, e-urba,

³ degi, e-bun sui-satedba amba be-walik-gudiid,
sunna na ebumaloed.

⁴” ’Dule-yogasaaledyob melle swilidiksuli gumalo, deginbali, mer isgumarbalo.

⁵” ’Dule-irwa-Bab-Dummadse-gormalad nono swire imakmalosulid, e-siga-duku sikmalosulid, deginbali, e-san daas-daas imakosurmarbalid.

⁶ Wemar, e-Bab-Dummadga gwage-swilidik gudigumaloed, degi, e-Bab-Dummad-nug oichomalosulid. Ar we-dulemar, Bab-Jehová’ga ibmar-ogumakar ukmaladid, degi, e-Bab-Dummad-madu ukmarbalidid. A-ulale, dule-irwa-Bab-Dummadse-gormalad gwage-swilidik gudigumaloed.

⁷ Dule-irwa-Bab-Dummadse-goled,
ome-gambanuchu-imaked nikuosulid,
ome-machered-egi-dodosad nikuosulid,
deginbali, ome-sui-meted nikuosurbalid,
ar ade, dule-irwa-Bab-Dummadse-goled Bab-Dummadga-
arbaega nug-imaklesad.

⁸” ’Degisoggu, bemala dule-irwa-Bab-Dummadse-goled swilidik dakoed. Ar we-dulede, be-Bab-Dummadga madu ukedid. Ar we-dule, begala dule-swilidik guoed. Ar ani an-Bab-Jehová dule-swilidikid gued. Ani an dule-swilidikidga bemar-imaked.

⁹” ’Ar dule-irwa-Bab-Dummadse-goled-e-sisgwa gambanuchuga-gudiile, we-bunagwa e-bab-nug oichodiid. Degisoggu, we-bunagwa, ogumakar oburgwilegoed.’ ”

Dule-irwa-Babse-gormalad-e-dummad islidik gudiguoed

¹⁰ Bab-Jehová Moisés’ga sogdebalid: “Dule e-gwenadgan-abargi dule-irwa-Bab-Dummadse-gormalad-e-dummadga sulenonikidi, degi, Bab-Dummadga-arbaega e-nonogi olivo-gwallu eolesadi, degi, dule-irwa-Bab-Dummadse-goled-bur-dummad-e-mor-yoega ega gangued uklesbalid, e-sailagia gwiarsuli gudii guosulid, degi, dule-burgwisad-ular, e-mor esirmakosulid. ¹¹ We-dule, dule-burgwisad-negse dogosulid.

Amba e-babdibe, e-nandibe, burgwisar, a-negse amba dogosurbalid, adi, melle swilidiksuli guegar.

12”Bab-Dummad-Neg-Islidikid mer oichogega, Bab-Dummadse-Goled-Neg-Islidikidgi noosulid. Ar ade, e-nonogi ina-wawadikid eolesad, adi, soglegegar: ‘We-dule, Bab-Dummadgarbi-arbaega nug-imaklesye.’ Ani an Bab-Jehová gued.

13”Dule-irwa-Bab-Dummadse-gormalad-e-dummad, unnila ome-yagwabi nikuoad. 14 Ome-ei-sui-burgwisad, degi, ome-sui-meted nikuosulid, deginbali, ome-gambanuchu-imaked nikuosurbalid. Unnila e-dule-bunagwa-yagwad nikuoad, 15 adi, melle e-dulemar-abargi e-wagan-danikoed-e-nug isguegar. Ani an Bab-Jehová, we-dule-islidik imaked.”

Dule-irwa-Babse-goledga-arbaosurmalad

16 Bab-Jehová, Moisés’ga sunmakded, ega sogdebalid: 17 “Aarón’ga sogo: ‘Be-wagan-bonikwagwad bipisaale Bab-Dummadga-madu-ukleged ukosulid, ese warmakosulid. Degisadegu, be-waganga weyob igar maiguoed. 18 Bab-Dummadga-ibmar-ukedse weyob-bonigwamalad bipisaale warmakosulid:

Dule-ibya-sated, dule-muya-muya-nanaed,
dule-nag-sikaled, dule-sakwa-sikaled,
dule-asu-bonikwagwad, dule-uaya-bonikwagwad,

19 dule-nag-bisgaled, dule-argan-bisgaled,

20 dule-yargan-mureged, dule-geg-dungumalad,
dule-ibya-sibudikid, dule-ukagi-yaa-siid,
dule-ukagi-boni-nikad, dule-alugwaggi-boni-nikad.

21” ‘Aarón-e-wagan-bonikwagwad, bipisaale Bab-Jehová’ga-ibmar-ogumakar-ukleged-ukega, Bab-Jehová’s e warmakosulid. Ar bonikwaa-gued-ulale, bipisaale Bab-Dummadga-madu-ukleged-ukega, Bab-Jehová’s e warmakosulid. 22 Ar Bab-Dummadga-madu-uklegeddi sunna gunmaloed, deginbali, mas-nued-islidikid, degi, mas-nued-bur-islidikid sunna gunmarbaloed. 23 Degi-inigwele, bonikwaa-gued-ulale, mor-dummad-naid-daksik dogosulid, deginbali, Bab-Dummadga-ibmar-ogumakar-ukleged-ailase warmakosurbalid, adi, anse-goled-neg mer oichogegar. Ani an Bab-Jehová, dule-irwa-anse-gormalad islidik an imaked.’ ”

24 Weyobi, Moisés, Aarón’ga, Aarón-e-masmalaga, degi, bela Israel-dulemarga sunmaksa gusad.

Bab-Dummadga-ibmar-ukleged

22 1 Bab-Jehová Moisés’ga sunmakded, ega sogded: 2 “Aarón’ga, degi, e-masmalaga be sogo: ‘Israel-dulemar anga ibmar-islidik-uksamaladgi melle dodomalo, adi, bemark mer an-nug-islidikid oichomalagar. Ani an Bab-Jehová gued.’

3”Amarga be sogbalo: ‘Bela be-wagan, degi, be-wagan-sorba-danimarballoed, nue-swilidiksuli-gudiidgi Israel-dulemar anga ibmar-islidikmalad-uksadse warmakdele, we-dule, an-asabin yog-onolegar guoed. Ani an Bab-Jehová gued.

4” ’Aarón, ar be-wagan-gwensak naibe-buna-yaa nikale, igi, e-abgangi boni-nikale, na san-swilidik-guedse geb sunna Bab-Dummadga-ibmar-islidikmalad-ukleged gunnoed.

Aarón, ar be-wagan-gwensak,

ibu-ibmar-burgwaled ebusale,
dule-na-e-burba-misad ebusale,

5 ibmar-napagi-garmakdimalad ebusale,

dule-swilidiksulid ebusale,

ibmar-baigan-swilidiksulid ebusale,

6 a-dule, neg-mutikguedse swilidiksuli gudii guoed.

” ’Ar e-abgan enuksulile, a-dule, Bab-Dummadga-ibmar-islidikmalad-ukleged gunnosulid. 7Dad-argwatele, a-dule, swilidik gunonikoed. Geb a-sorba, Bab-Dummadga-ibmar-islidik-ukleged nabir gunnoed, ar ade, we-ibmar e-masgunned gued. 8Dule-irwa-Bab-Dummadse-gormalad ibdurgan-burgwaled, degi, achu-sapurse ibdurgan-san-ichimaklesad gunnosulid. Ar degiile, dule swilidiksuli gunonikoed. Ani an Bab-Jehová gued.’ ”

9Bab-Jehová, Moisés’ga sogdebalid: “Degisoggu, dule-irwa-Babse-gormalad an-igar-uknaidba ibsamalo. An-igar-uknaidba ibsasulid-ulale, melle isgumalo, adi, wemar melle burgwemalagar. Ani an Bab-Jehová, wemar angarbi-arbaega an nug-imaksad.

10”Dule-irwa-Babse-goled-e-gargwenadsulid we-ibmar-islidikmalad gunnosulid. Deginbali, dule-e-neggi-maid, degi, dule-ega-arbaed, we-ibmar-islidikid gunnosurmarmogad.

11”Ar dule-irwa-Babse-goled manigi mai-wargwen-baksale, a-duledi, sunna we-ibmar-islidikmalad gunnoed. Deginbali, dule-irwa-Bab-Dummadse-goled-neggi mai-gwalulesmalad amba sunna we-ibmar-islidikid gunmarmogod.

12”Dule-irwa-Babse-goled-e-sisgwa, dule-irwa-Babse-goledsulidbonikusale, we-ome, Bab-Dummadga-we-ibmar-islidikid-ukleged gunnosulid. 13Ar dule-irwa-Babse-goled-e-sisgwa ei-sui burgwenonidibe, mimmi-nikussuli e-sui-metedibe, na e-bab-negse gannar nonikile, ar igi yoo-sui-nikugu, e-bab-masgunned gundii gusa, deyobi, gannar e-bab-masgunned gundii gubaloed. Ar dule-baigandi, bipisaale we-mas gunnosulid.

14”Ar dule-gwensak wissulidgi ibmar-islidikid guchale, we-dule, we-ibmar-guchad-wilub gannar dule-irwa-Bab-Dummadse-goledga ibmar ukoed. A-ukinbali, ibmar-atargi-gwensak napi ukbaloed.

15”Degisoggu, dule-irwa-Babse-gormalad Israel-dulemar Bab-Jehová’ga-ibmar-islidikidmalad-ukleged-oichogega imakosulid.

16 Ar dule-wargwen, we-ibmar-islidikid-ukleged-guchale, na dukin e-isgued sedii guoed. Ani an Bab-Jehová, wemar angarbi-arbaega an nug-imaksad.”

Igid-ibdurgan Bab-Dummadga uklegoe

17 Bab-Jehová, Moisés’ga sogdebalid: 18 “Aarón’ga, degi, e-masmalaga, deginbali, bela Israel-dulemarga be sogo:

‘Ar Israel-dule-wargwendibe, Israel-dulesulid-bemar-abargi-maiddibe, ibmar-imakoye-sogsad-ular, igi, na e-itoleged ibmar-ukbied-ular, Bab-Jehová’ga ibmar ogumakar ukele,

19 we-ibmar, Bab-Jehová-nabir-abingaegala, ibmar-durgan-machered-swilidikid, boni-nikasulid ukoed. Sunna moli-bebe-nikad-machered, sibat-wawaad-machereddibe, sibat-machereddibe, ukoed.

20 ” Ibdurgan-wis-boni-nikad bipisaale Bab-Jehová’ga be ukosulid, ar ade, Bab-Jehová we-ibmar bei abingaosulid.

21 ” ’Amba deyobbardo, ar dule-gwensak ibmar-imakoye-sogsad-ular, igi, na e-itoleged-ibmar-ukbied-ular, gwenatigwar-guega, Bab-Jehová’ga moli-bebe-nikad, sibat-wawaaddibe, sibaddibe, ukele, we-ibdurgan-swilidikid, boni-nikasulid ukoed, adi, nabir Bab-Jehová we-ibmar-uknaid abingaegar.

22 Bab-Jehová’ga ibdurgan-aku-atakmalad, muya-muya-nanamalad, nag-sikarmalad, yaa-nikamalad, uka-sensenmalad, uka-muru-murumalad, be ukosulid.

” Deginbali, we-ibmarmar ibmar-ogumakar-ukleged-ailagi, Bab-Jehová’ga be ogumakar ukbalosulid. 23 Sunna be-itoleged ibmar-ukbiedba anga be moli-bebe-nikad, igi, sibat-wawaad-wis-bonigwaled uked. Ar ibmar-imakoye-sogsad-ular, ibdurgan-degiid be ukerdi, Bab-Jehová bei abingaosulid.

24 Bab-Jehová’ga ibdurgan alugwag-bonigwaled, alugwag-madareged, alugwag-gwasualed, degi, alugwag-sikaled be ukosulid.

Be-yalagi ibdurgan-degimalad Bab-Jehová’ga be ukosurmalad.

25 ” Deginbali, ibdurgan-degimalad be-Bab-Jehová’ga-ukega, Israel-dulesulid-abin be abingabalosulid, ar ade, we-ibdurganmar bonigwaledid. Degisoggu, be-ibe abingalegosulid.’ ”

26 Bab-Jehová, Moisés’ga sogdebalid: 27 “Moli-bebe-nikad-e-mimmi gwalulesdibe, sibat-wawaad-e-mimmi-gwalulesdibe, igi sibat-e-mimmi-gwalulesdibe, na e-nan-walik ibagugle (7) gudii guoed.

Geb ibabaabakgine (8) sunna bema anga we-ibdurgan ogumakar ukoed.

28”Melle iba-galagwena moli-bebe-nikad-ome, e-mimmi-ebo, igi, sibad-wawaad-ome, e-mimmi-ebo e-ibe be e-dukara egwanno.

29”Be anga dog-nuedye-sogega, ibmar uknaile, nue igar-maidba-imakar be ukoed. Adi, an nabir abingaegar. 30 We-ibmar-be-anga-uknaid, a-ibagi be gunnoed. Banedga, we-ibmar be sabogosulid. Ani an Bab-Jehová gued.

31”An-igarmar-mamaidba be ibsamala, eba be ibmar-imakdii gumala. Ani an Bab-Jehová gued.

32”An-nug-islidikidgi melle be dodomalo, adi, Israel-dulemar-abargi an-nug islidik guegar. Ani an Bab-Jehová bema islidik imaked. 33 Ani an Egipto-yargi bema onosad, adi, an bema Bab-Dummadga gumalagar. Ani an Bab-Jehová gued.”

Iba-dummagan-onoleged

(*Números 28:16—29:40*)

23 1 Bab-Jehová, Moisés’ga sogdebalid: 2 “Israel-dulemarga be weyob sogo: ‘Bab-Jehová we-itoakwaa-ibamar-onoleged mesisad. Bema Bab-Jehová-nug-odummogega, a-ibama islidikid-onmakedye bimaloed. Bab-Jehová we-ibama omesisad.’ ”

Obunnoged-iba

3 Bab-Jehová, Moisés’ga sogdebalid: “Israel-dulemarga be weyob sogo: ‘Bema ibanergwa (6) arbamaloed. Ar ibagugledgindi (7), bema obunnomaloed. A-iba, an-nug-odummogega itoakwaa-iba-onoleged-iba gued. A-ibagi, bema bipisaale arbaosurmamad. A-ibagi, bema na bia maimalodibe, Bab-Jehová-nug-odummogega bema obunnoged.’ ”

Israel-Dulemar-Oburgwilegoenad-Iba

(*Éxodo 12:14-20; Números 28:16-25; Deuteronomio 16:1-8*)

4 Bab-Jehová, Moisés’ga sogdebalid: “Israel-dulemarga be weyob sogo: ‘Bab-Jehová we-itoakwaa-ibamar-onoleged mesisad. Bema Bab-Jehová-nug-odummogega we-itoakwaa-ibamar-onolegedgi islidikidgi onmaknonimaloed. An bema iba-mesnaid-sekalaagi, bema na onmaknonimaloed:

5” ‘Gebe-nii-onodoed-ibambe-gakabakegi (14), a-sedogidba, bema Bab-Jehová-nug-odummogega Egipto-yargi bema Oburgwilegoenad-Iba onomaloed.’ ”

Madu-E-Inasulid-Iba

6 Bab-Jehová, Moisés’ga sogdebalid: “Israel-dulemarga be weyob sogo: ‘A-nii-ibambe-gakatargi (15), Bab-Jehová-nug-odummogega Madu-E-Inasulid-Iba onodoed. Madu-e-inasulid ibagugle (7) be gunmaloed.

7Gebe-iba-onodoedgine, bemar islidikidgi danar ambikumaloed. A-ibagi, bipisaale bemar arbaosurmalad. 8Ibagugle (7) bane-bane, bemar Bab-Jehová'ga ibmar ogumakar ukmaload. Geb ibagugledgi (7), bemar Bab-Jehová-e-nug-odummogega islidikidgi danar ambikunonimaload. A-ibagi, bemar bipisaale arbaosurmalad.' ”

Ibmar-Gebe-Sanmaked-E-Iba

9Bab-Jehová, Moisés'ga sogdebalid: 10“Israel-dulemarga be sogo: ‘Yar-an-bemarga-uknaidse bemar dogsamalale, agi bemar ibmar-gwag-digaled wearmalale, bemar gebe-ibmar-gwag-wesad-dukwen, dule-irwa-Bab-Dummadse-goledse sedoad. 11Dule-irwa-Bab-Dummadse-goled Bab-Jehová-asabin we-ibmar-gwag bana-bana imakoed, adi, Bab-Jehová we-ibmar-gwag abingaegar. Obunnoged-iba-banedgine, we-ibmar-gwag Bab-Jehová'ga bana-bana imakoed. 12We-ibmar-gwag-dukwenad Bab-Jehová'ga be uknaid-ibagi, sibad-wawaad-sapingwagwad-birgagwen-nikad, swilidikid, boni-gwen-nikasulid, Bab-Jehová'ga be ogumakar ukoed. 13Deginbali, madubur-bur-nued nibirbake olivo-gwalluba-omukuar, be ukbaloed. We-ibmar-ogumakar-ukleged Bab-Jehová yeer-yapanne itodaed. Degin, vino bute-gwagwen eba eolegoed. 14Be-Bab-Dummadga-inse be we-ibmar-gwag uksasulile, bemar madu gunnosulid. Bemar ibmar-gwag-dibyaed, igi, ibmar-gwag-biniddibe, gunnosurmarbalid. Bia be mai-guoe, bega, degi, be-waganga, we-igar degisadegu mai guoed.’ ”

Itoged-Ilagugled-Iba

(Números 28:26-31; Deuteronomio 16:9-12)

15Bab-Jehová, Moisés'ga sogdebalid: “Israel-dulemarga be sogo: ‘Obunnoged-banedgine, orosgi-dakleged-trigo'ye-nugad-dukwen Bab-Jehová'ga be bana-bana-uksad-sorbali, itoged-ilagugle (7) be ebisoed. 16Obunnoged-ilagugled (7), geb a-banedgine, bela iba-dulabo-gakambe (50) guoed. Geb degine, Bab-Jehová'ga ibmar-gwag-binidi bemar ukoed. 17Be-neggine, madu-gwabo madubur-nuedgi-e-inaba-sobaled, Bab-Jehová'ga bana-bana-ukega be sedoad. We-madu-gwagwen madubur-nibirbake-imakaled, baid amba deyob imakarbalid. We-madumar Bab-Jehová'ga gebe-ibmar-sanmaked-uklegedid. 18Maduba-mesa sibad-wawaad-sapingwagwad-birgagwen-nikad, swilidik, boni-nikasulid, walagugle (7) be ukoed. Deginbali, moli-bebe-nikad-sapingwagwad-wargwen, degi, sibad-wawaad-machered walabo be ukbaloed. Wemala, Bab-Jehová'ga ogumakar be ukoed. Degin, ibmar-gwag eba be ukbaloed, degine, vino-egi-eolemalad be ukbaloed. Wemarde, Bab-Jehová'ga soogi ogumakar-uklegedid, Bab-Jehová yeer-yapanne itodaed.

19” ‘A-ukinbali, isgued-ular sibad-machered-wargwen be ukbaloed, degi, gwenatigwar-guega sibad-wawaad-sapingwagwad-birgagwen-nikad, warbo be ukbaloed.

²⁰Dule-irwa-Bab-Dummadse-goled, sibat-wawaad-sapingwagwad-warbogwad madu-gebe-uklegedba-mesa Bab-Jehová-asabin bana-bana imakoed. We-ibmarmala, Bab-Jehová-asabin ibmar-ukleged-bana-bana guedid. Wemar, Bab-Jehová'ga ibmar-islidik-uklegedid, dule-irwa-Bab-Dummadse-goledga uklegoedid.

²¹ " 'A-ibagi, bela bemar Bab-Jehová-nug-odummogega islidiki danar ambikunonimaloed. A-ibagi, bemar bipisaale arbaosurmalad. Be-wagan bia maimardibe, we-igar degisadegu ega maigu guoed.

²² " 'Ibmar-gwag-weed-ibagan mosale, melle bela be-nainu-dikar-nagase be weo. Deginbali, ibmar-gwag napase batisale, melle a-ibmar-gwag be bar suo. Ar ade, wemala dulemar-wileganaga, degi, Israel-dulesurmaladga be obegoed. Ani an be-Bab-Dummad-Jehová gued.' "

Gar-Trompeta'mar-E-Iba

(Números 29:1-6)

²³ Bab-Jehová, Moisés'ga sogdebalid: ²⁴ "Israel-dulemarga be sunmake, ega be soge: 'Nii-walagugled-gebe-iba-onodedgi, bemar obunnogoed. A-ibagi, gar-trompeta-ogolale, bemar iba onogoed. Deginbali, bemar Bab-Jehová-nug-odummogega danar ambikunonimarbaloed. ²⁵ A-ibagi, bemar bipisaale arbaosurmalad. Agine, bemar, Bab-Jehová'ga ibmar ogumakar ukoed.' "

Isgued-Elileged-E-Iba

(Levítico 16:2-34; Números 29:7-11)

²⁶ Bab-Jehová, Moisés'ga sogdebalid: ²⁷ "Israel-dulemarga be sunmake, ega be soge: 'Nii-walagugled-ibambegi Isgued-Elied-Iba guoed. A-ibagi, bemar Bab-Jehová-nug-odummogega, islidik danar ambikunonikoed. A-ibagi, bemar mas-gunsuli gudigumaloed, deginbali, bemar Bab-Jehová'ga ibmar ogumakar ukmarbaloed. ²⁸ A-ibaginbali, bemar bipisaale arbaosurmalad, ar ade, a-iba, Isgued-Elileged-Ibad, agine, be-Bab-Dummad-Jehová bemarga isgued elioed. ²⁹ Ar dule-wargwen a-ibagi mas-guchale, we-dule, e-dulemar-abargi onolegoed. ³⁰ Ar dule-wargwen a-ibagi arbasale, we-dule, e-dulemar-abargi an obelogoed.

³¹ " 'Degisoggu, a-ibagi, bemar bipisaale arbaosurmalad. Be-wagan bia maimardibe, we-igar degisadegu ega maigu guoed. ³² A-iba, bemarga obunnogoed-iba guoed. A-ibagine, bemar mas-gunsuli gudiguoed. We-obunnoged-iba, bemar nii-walagugled-ibabakebak-sedodedgi onodoed. Geb banedgi, sedogidse bergudapoed.' "

Neg-Matargana-Sobaled-E-Iba

(Números 29:12-39; Deuteronomio 16:13-17)

³³ Bab-Jehová, Moisés'ga sogdebalid: ³⁴ "Israel-dulemarga be sogo: 'Nii-walagugled-ibambe-gakaatargine, Neg-Matargana-Sobaled-E-Iba Bab-Jehová-e-nug-odummogega be onodoed.

We-iba, ibagugle (7) onolenai guoed. ³⁵Gebe-iba-onodedgine, bemar Bab-Jehová-e-nug-odummogega islidiki danar ambikunonimaloed. A-ibagi, bemar bipisaale arbaosurmalad. ³⁶Bemar ibagugle (7) Bab-Jehová'ga ibmar-ogumakar-uknai guoed. Ibabaabakadgine (8), bemar Bab-Jehová-e-nug-odummogega islidiki danar ambikunonimaloed. Agine, amba bemar Bab-Jehová'ga ibmar ogumakar ukbaloed. A-iba, ibadummadid. Degisoggu, bemar a-ibagi, bipisaale arbaosurmalad.

³⁷ "We-ibamala Bab-Jehová'ga iba-itoakwaa-onolemaladid. A-ibagi, Bab-Jehová-e-nug-odummogega bemar islidiki danar ambikunonimaloed, adi, Bab-Jehová'ga we-ibmarmar-ogumakar ukegar:

Ibdurgan-ogumakar-ukleged,
 ibmar-gwagmar-ukleged,
 ibmarmar-ukleged,
 degi, vino-ukleged.

We-ibmarmar e-ibagan-uklegoed-maidba be ukmaloed.

³⁸ We-ibamala,

Bab-Jehová-obunnoged-iba-ukine,
 Bab-Jehová'ga ibmar-uklegoye-ise-sogar-sogsad-ukine,
 degi, ibmar-ukbiedba-ukleged-ukine,
 be onobaloed.

³⁹ "Nii-walagugled-ibambe-gakatargi, bemar ibmar-gwagwesmalad-sorbali, Bab-Jehová'ga ibagugle (7) bemar iba onomaloed. Gebe-iba-onodoedgi, degi, ibabaabakgi (8) bemar arbaosurmalad.

⁴⁰ Gebe-iba-onodoedgine, bur sapimar-nuegangi e-sanmar-nuegan-nanaid, ogobgi-dakleged-e-gagan, sapimar-dummagan-e-anagan, degi, sosgamar bemar amimaloed. Ibagugle (7) bemar be-Bab-Dummad-Jehová-asabin wergumaloed. ⁴¹ Birga-iliba, nii-walagugledgi (7), ibagugle (7) bemar Bab-Jehová-nug-odummogega iba-onodii gumaloed. We-igar bemar-waganga degisadegu maigu guoed. ⁴² Ibagugle (7) bemar neg-matargan-sobaledgi-mai gumaloed. Bela bemar Israel-dulemar Israel-yargi-gwalulesmalad we-neg-matargan-sobaledgi-mai gumaloed, ⁴³ adi, be-wagan wisgumalaga, an Egipto-yargi Israel-dulemar-onosgu, ani an neg-matargan-sobaledgi-megega bemar-imaksaye. Ani an bemar-Bab-Dummad-Jehová gued.' "

⁴⁴ Weyobi, Moisés, Israel-dulemarga Bab-Jehová'ga-ibamar-itoakwaa-onolegedgi sunmaksad.

Bab-Dummadse-goled-neggi gwallu ogalegoed

(Éxodo 27:20-21)

24 ¹ Bab-Jehová, Moisés'ga sogdebalid: ² "Israel-dulemarga be soge: 'Olivo-gwallu-bur-swilidikid ibmarba-oburarsulid, be sedamalo. Adi, Bab-Dummadse-goled-neggi gwallu ogaegar. Deyobi, a-gwallumar degisadegu gasii guoed. ³ Aarón Bab-Dummad-dulemarbo-ambikued-neggi gwallumar ogaed, bia Bab-Dummad-Israel-dulemarbo-Igar-Mesisad-Ulu-siid-iduar, mor-dummad-naid magaba ogaed.

Adi, we-gwallumar Bab-Jehová-asabin gasii oibodagegar. We-igar, be-waganga degisadegu maigu guoed. ⁴Gwallu-sied-olobiid-birgi gwallumar-bukwad degisadegu Bab-Jehová-asabin gasii guoed.’ ”

Madu-Bab-Dummadga-ukleged

⁵Bab-Jehová, Moisés’ga sogdebalid: “Israel-dulemarga be sogo: ‘Madubur-nuedgi madu-ologana gwaambe-gakabo (12) be soboed. Madu-gwagwengi madubur nibirbo be ebugoed. ⁶Bab-Jehová-asabin mese-olobiid-birgi, ilebo be madu-ologana urboed. Ilegwengi gwanergwa (6) be urboed, baid ilegwengi deyob mergu be urbebaloed. ⁷Deginbali, ina-wawadikid-ibmar-baidba-oburarsulid madu-ilegwen-ilegwen-bukwad-dikarba be urbebaloed. We-ina-wawadikid madu-anar ebinsalegega-ibmar-uklegedyob gued. We-ina-wawadikid Bab-Jehová’ga ogumakar uklegoed. ⁸Obunnoged-iba-iliba, Israel-dulemar-nukine, we-madu Bab-Jehová-asabin be urbedii guoed. Israel-dulemar weyob degisadegu we-igar imakdioed. ⁹We-madu Aarón’gadga, degi, e-masmalagadga degisadegu guoed, neg-islidikidgi gunmaloed. Ar ade, we-ibmar bur bule Bab-Jehová’ga ibmar-ogumakar-ukleged-baiganba, islidikid gued. Weyob we-igar degisadegu maigu guoed.’ ”

Bab-Dummadgi-isdar-sunmaked sabsur-odurdaklegoed

¹⁰A-ibagangine, Israel-dulemar-abargi dule-gwensak maigusad. E-nande Israel-duled, e-babdi Egipto-duled. Ibagwengine, we-dulede Israel-dule-wargwen-ebo danar-danar-bukwadgi uluar gusad. ¹¹Agine, ome-Israel’gined-e-machi galagwensuli sunmakdegu Bab-Dummad-nug obarisad. Degisoggu, we-dule, Moisés’sesagusmalad. ¹²Geb Bab-Jehová Israel-dulemarga we-dule-imaklegoed-sogedse, esgaryagi we-dule-metemargweled. We-dule-e-nande Selomit’ye nugad, Dibri-sisgwad. Dibri’di Dan-wagwad.

¹³Geb degine, Bab-Jehová Moisés’ga sogded: ¹⁴“We-dule-galagwensuli-sunmaksad bemar-danar-danar-bukwad-magaba be onomalo. Bela dule-itosmalad we-dule-nono-birgi e-argan mesoed. Geb bela Israel-dulemar akwagi we-dule-makoed. ¹⁵Israel-dulemarga weyob be sogoed: ‘Ar doa-dule e-Bab-Dummadgi galagwensuli-sunmaksale, e-isgusad egi aibinoed. ¹⁶Ar doa-dule e-gwenad-ukabsanidgi Bab-Jehová-nug bisale, we-dule oburgwilegoed. Bela Israel-dulemar akwagi we-dule-makoed. Ar Israel-duledibe, Israel-dulesurdibe, Bab-Jehová’gi-galagwensuli-sunmaksale, we-dule oburgwilegoed.’ ”

Buged-mai-imakleged-igar

¹⁷Bab-Jehová, Moisés’ga sogdebalid:
“Ar doa-dule, dule-baid-oburgwisale,
we-dule oburgwilemogoed.

- 18 Ar doa-dule, dule-baid-ibe ibdurgan-oburgwisale,
we-dule ibdurgan-oburgwisad-anar ibdurgan-baid ega ukoed.
- 19 Ar doa-dule, dule-baid-naibi-imaksale,
we-dule, deyob naibi-imaklemogoed.
- 20 Ar doa-dule, dule-baid-ibe gar-bichisale,
we-dule-ibe gar bisgelemogoed.
Ar doa-dule, dule-baid-ibe ibya-naibisasale,
we-dule-ibe ibya naibisalemogoed.
Ar doa-dule, dule-ibe nugar-bichisale,
we-dule-ibe nugar bisgelemogoed.
Ar doa-dule, igi-dule-baid-naibisaoe,
we-dule deyob naibisalemogoed.
- 21 Ar doa-dule, dule-baid-ibe ibdurgan-oburgwisale,
we-dule-ibe ibdurgan-oburgwisad-anar ibdurgan-baid ega
ukoed.
Ar doa-dule, dule-baid-oburgwisardi,
we-dule deyob oburgwilemogoed.
- 22 Israel-dulega, degi, Israel-dulesulidga unnila igar-soggwenna maigu
guoed.

Ani an bemar-Bab-Dummad-Jehová gued.”

23 Moisés Israel-dulemarga bela we-ibmar sogsa gusad. Geb
Israel-dulemar, dule-galagwensuli-Bab-Jehová’gi-sunmaksad danar-
dandar-bukwamalad-magaba onosmalad. Geb agi, akwagi-makar
oburgwismalad. Ar igi Bab-Jehová, Moisés’ga sogsa gusa, deyobi, Israel-
dulemar ibmar imaksamalad.

Nainu-Imaklegosulid-Birga

25 ¹ Bab-Jehová, Moisés’ga Sinaí-yargi sunmakded, ega sogded:
² “Israel-dulemarga be sogo: ‘Bab-Jehová bemarga-yar-uknaidse
be ambikudapmalale, Bab-Jehová-nug-odummogega a-yargi birgagwen
nainu obunnonai guoed.

³ ” Birganergwa (6) bemar be-nainumargi ibmar digmaloed.
Birganergwa (6) be-uva-dub be nue sike-sike imakmaloed, degi, e-san be
weemarbaloed. ⁴ Birgagugledgindina (7), Bab-Jehová-nug-odummogega,
bar be nainugi arbaosurmalad. A-birgagine, be-nainugi be ibmar-
digosulid, deginbali, be-uva-dub be sike-sike imakosurbalid. ⁵ Be-nainugi
wargwengi ibmar-gwag-ainidagoedi be bela weosulid, deginbali, uva be
digsasulid wargwengi-sanmakdagoedi be bela weosurbalid. Birgagwen
nainugi be arbaosulid. ⁶ Degi-inigwele, a-birgagi nainugi bela ibmar-
sanmakoedi bemarga unniguar gunnega guoed. Be-mai-machered,
be-mai-ome, dule-bega-arbaed, degi, Israel-dulesulid-be-yargi-gudiid
sunna gunmarmogoed. ⁷ Deginbali, be-molimar-bebe-nikad, degi,
ibdurganmar be-yargi-nikamalad we-ibmarmar-sanmakoedi, sunna
gunmarmogoed.’ ”

Gannar-Ibmar-Ukleged-Birga

⁸ Bab-Jehová, Moisés'ga sogdebalid: "Israel-dulemarga be sogo: 'Birgagugled, ilagugle (7) be ebisoed. A sogleged, birga-durbo-gakabakebakye (49). ⁹ Geb a-birga-nasadgine, nii-walagugled-ibambegi, isgued-osuloged-ibagi binnasuli gar-trompeta bela be-yalagi be ogoloed. ¹⁰ Weyobi, birga-durbo-gakambegidi (50), Bab-Jehová'ga birga-islidikidga be imakoed. A-birgagi, bela Israel-yargi Israel-dulemar maiga-gudiile, ollorgunonikoed. A-birga, bemarga Gannar-Ibmar-Ukleged-Birgaga guoed. Degine, bemar na gannar e-nainu-e-nainu sumaloed, gannar na e-gwenadganse namaloed. ¹¹ Birga-dulabo-gakambegid (50) bemarga Gannar-Ibmar-Ukleged-Birgaga guoed. A-birgagi, bemar nainugi ibmar-digosurmalad, nainugi ibmar-ainioed be weosurmarbalid, degine, uva be weosurmarbalid. ¹² Ar ade, a-birga, Gannar-Ibmar-Ukleged-Birgad. A-birgade bemarga birga-islidikidid. A-birgagi unnila ibmar-e-itolegedba-ainied-sanmakoedi be gunmaloed.

¹³ " 'Gannar-Ibmar-Ukleged-Birgagi bela bemar na gannar e-nainu-e-nainuse namaloed.

¹⁴ " 'Dule-baidga be nainu manigi-uksadibe, dule-baidse be nainu-baksadibe, melle bemar be-gwenadgan mesagwar imako. ¹⁵ Igi birga Gannar-Ibmar-Ukleged-Birga-napi, a-birga-napiwilub be dule-baidse nainu bakoed. Dule-nainu-ukoeddi, Gannar-Ibmar-Ukleged-Birga-napiwilub nainu gargegu ukoed.

¹⁶ " 'Gannar-Ibmar-Ukleged-Birga amba undar napile, mani-dummad nainu be ukoed. Gannar-Ibmar-Ukleged-Birga ichee napile, adi, nainu mani-bipii be ukoed, ar ade, ibmar-welegoedba, we-nainu gargegu be ukoed.

¹⁷ " 'Melle be dule-baid mesagwar imako. Bur be-Bab-Dummad be dobee nanadii gumalo, ar ade, ani an bemar-Bab-Dummad-Jehová gued.' "

Igar-maidba-nanamalad-igar

¹⁸ Bab-Jehová, Moisés'ga sogdebalid: "Israel-dulemarga be sogo: 'Bab-Jehová-e-igar-bemarga-uksadba be nanamarsun, Bab-Jehová-Igar-Mamaidba be damarsun. A-sogedba bemar gudii gumarsun. Geb degine, bemar bogidik gudii gumaloed. ¹⁹ Nainu bemarga ibmar-osanmakoed. A-ibmarmar nue-immedik bemar gunmaloed, degine, a-yalagi, nue-bogidik bemar bukwa gumaloed.

²⁰ " 'Ar bemar egisdamalodibe: ¿Ar wede birgagugledgi (7), ibi anmar gunmalosunna? Ar ade, ibmarde anmar digosurmalad, degine, anmar weosurmarbalid.

²¹ " 'Birganergwadgine (6) Bab-Jehová bemargi ise-nued binsamaloed. Bab-Jehová birgapaa-wilub nainugi ibmar-osanmakoed. ²² Birgabaabakgine (8), be ibmar-digmaload.

A-birgagine, ibmar-gwagmar-sabosmalad bemar gunmalloed. Birgabakebakse (9), ibmar-sabosad be gunmalloed. Geb a-birgagine, ibmar-sanmakded be gutemalloed.’ ”

Ibmar-gannar-obirileged-igar

²³Bab-Jehová, Moisés’ga sogdebalid: “Israel-dulemarga be sogo: ‘Dule-nainu-baksadi degisadegu egadga guosulid, ar ade, nainu Bab-Jehová’gadid. Ar bemar unnila sikwas we-yargi gudimalad. Bemar we-yargi degisadegu gudiguosurmalad. ²⁴Degisoggu, bemar-nainu-baksamaladi, be wisgumalargebed, gannar-nainu-obirileged-igar bemarga maigu guoed.

²⁵” ’Be-gwenad mani-sate-gudele, na e-nainu uksale, e-gwenad-bur-walikagwad nainu-uklesad ega ononikoed.

²⁶” ’Dule ega e-anar nainu-onoged-satele, ar na dakin e-nainu-onogega, unniguar mani amisale, ²⁷nainu-uklesad-akar birga ebisoed. Geb Gannar-Ibmar-Ukleged-Birga igi-napi, a-wilub mani bennukoed. Geb degine, we-nainu gannar na egadga gunonikoed. ²⁸Ar unniguar mani amissulile, dule ese nainu-baksadi we-nainu Gannar-Ibmar-Ukleged-Birgase gani guoed. Geb agine, we-nainu Gannar-Ibmar-Ukleged-Birgagi gannar e-ibedgadga guoed.

²⁹” ’Dule-gwensak neggwebur-sakdigar-siidyaba na e-neg manigi uksale, we-dule, sunna a-neg birgagwengi gannar obiroed. Ega birgagwen nagoed gannar neg-obiregar. ³⁰Birgagwengi we-neg obiridsulile, neggwebur-sakdigar-siidyaba we-neg-siidi, dule-neg-baksadgadga, degi, e-wagangadga degisadegu guoed. Gannar-Ibmar-Ukleged-Birgagi we-neg e-ibedga bar uklegosulid.

³¹” ’Neggwebur-sakdigarsulidgi negmar-siidi nainuyob guoed. A-negmardi sunna gannar obirilegoed, Gannar-Ibmar-Ukleged-Birgagi a-nega e-ibedga uklegoed.

³²” ’Levita-dulemardi e-neggweburmargi e-neg-siidi manigi uksale, sunna gannar obire guoed. ³³Dule-gwensak Levita-dulemar-neggweburgi Levita-dulese neg baksale, we-dule, Gannar-Ibmar-Ukleged-Birgagi gannar ega neg maniginsuli ukoed. Ega gannar obiroed, ar ade, e-neggweburmargi-neg-bukwadi Israel-dulemar-abargi Levita’marga uklesadid. ³⁴Levita-dulemar-e-gagan-nainumardi bipisaale manigi uklegosulid. Ar ade, we-gagan-nainu Levita-dulemargadga degisadegu guoed.

³⁵” ’Be-dule wilegedga gudele, bese danikile, be bendakoed. Be-neggi dule-neggwebur-baidginedyob gudii guoed. ³⁶We-dulegi, melle ega be mani-nug meso, degi, melle ei ibmar be sumarbalo. Suli, degisuli. Be-Bab-Dummad-dobee be nanamalloed. We-be-dule be-walik gudii guoed. ³⁷Deginbali, bese mani egichisale, egi mani onogegala, melle egi mani-obine be gao, degi, melle masgunned ega mani-obine be ukbalo. ³⁸Ani an be-Bab-Dummad-Jehová gued.

Ani an Canaán-yala bemarga ukega, Egipto-yargi bemar-onosad, adi, an be-Bab-Dummadga guegar.

39” ’Be-dule be-walik-gudii wilegedga gudele, manigi bese na dugin ukdele, melle dule-mai-imaklegedyob be imako. 40Nabir binsa bega dule-arbaedyob, Israel-dulesulid-be-walik-gudiidyob be imakoed. We-dule, Gannar-Ibmar-Ukleged-Birgase bega arbaed. 41Geb a-birgagine, e-mimmiganmala nabir be-neggi nodoed. Geb e-gwenadganse gannar naoed, na e-dadgan-nainu gannar egadga gunonikoed. 42Deyob guoed, ar ade, Israel-dulemar anga-arbamalad-gumalad, ani an wemar Egipto-yargi onosad. A-ular, Israel-dulemala maiga-guega manigi uklegosurmalad. 43Melle Israel-dulemar sabsuli-imakdii be gumalo. Suli, degisuli. Be-Bab-Dummad-dobee-nanadii be gumaloed.

44” ’Dulemar-be-yar-dikarba-mamaid, machereddibe, omedibe, amala sunna be-maiga gumaloed. Amala, machereddibe, omedibe be-maiga-gumalagala, manigi be bakmaloed. 45Deginbali, Israel-dulesurmalad-bemar-abargi-mamaid, e-mimmigan-be-yargi-gwalulesmaladi, be-maiga-guegala, sunna manigi be bakmaloed, adi, bemargadga guegar. 46Be burgwisale, we-be-maimala sunna be-mimmiganga be obemalad, adi, degisadegu be wagangadga guegar. Amala, degisadegu be-maiga gumaloed. Bemar, be-gwenadgandi, Israel-dulemardi, sabsuli gwen imakosurmalad.

47” ’Israel-dulesulid bemar-abargi-maid mani-ibedga gudele, Israel-dule a-dikarba-maid wilegedga gudele, we-dule, dule-mani-ibed-e-maiga-guega na san-ukdele, igidibe, Israel-dulesulid-e-gwenadga na san-ukdele, 48dule-na-san-uksad sunna gannar onoleged. E-gwenad-wargwen sunna manigi onogoed. 49E-gilordibe, e-gilor-machidibe, a sunna manigi a-dule-onogoed. E-gwenad-walikagwad sunna onomogad. Ar e-sunnad sunna nabir na onoge, ar na dugin manigi onogodo. 50Dule, degi, dule-mani-ibed na ebogwa itomaloed, birgabigwa-gusa dule-manigi-uklesa, degi, igi-birga, Gannar-Ibmar-Ukleged-Birga napi. Agine, itogoed, dule-wargwen-arbaed igi-mani bennuklesale, abali, mani-nasiklegoed, igi-manigi dule-onolegoe. 51Gannar-Ibmar-Ukleged-Birga amba ichesur-napile, a-wilub, uklesadgi-ollorguega mani-dummad bennukoed. 52Gannar-Ibmar-Ukleged-Birga ichenapile, itomaloed, a-birgamarde igi-mani-wilub gue. Geb ollorguega, a-wilub bennukoed. 53We-dule, unnila dule-birgagwen-manigin-arbaedyob imaklegoed. We-dule nue be dakmaloed, melle dule-baksad sabsuli we-dule-imaked be imakmalo.

54” ’We-dule Gannar-Ibmar-Ukleged-Birga-idu ollorgussulile, Gannar-Ibmar-Ukleged-Birgagi e-mimmiganmala ollorguoed.

55” ’Israel-dulemar anga-arbamalad gumalad. We-Israel-dulemar, ani an Egipto-yargi onosad. Ani an be-Bab-Dummad-Jehová gued.’ ”

6. DULEGI-ISE-NUED-BINSALEGED, DEGI, DULE-UKABSALEGED (26:1-46)

Dulegi nued-binsaleged-igar

(Deuteronomio 7:12-24; 28:1-14)

26 ¹Bab-Jehová, Moisés'ga sogdebalid: “Melle ibmar-sobarmalad bab-dummadyob-imakegala, be sobmalo. Ibmalyob-daklemalad-wilubgan, degi, akwa-islidikmalad, melle be sobmarbalo. Deginbali, akwa-sobaled bemar-yargi be siosurmarbalid, adi, melle bemar a-asabin dulluu imakegar. Ar ani an be-Bab-Dummad-Jehová gued.

²”An-obunnoged-ibagi, bemar obunnomarmogoed. Degin, anse-goled-neggi nue-binsaed-nikaa be damaloed. Ani an Bab-Jehová gued.

³”An bemarga igarmar-uksadba, igarmar-mesisadba, be nanamalale, a-igarmar-sogedba be inniki damalale, ⁴ani an bemarga e-ibagan-sekalaa dii-owioed. Nainumargi-ibmar-digaled na e-ibagan-sekalaa sanmake an imakoed, degine, sapimar deyob an imakbaloed. ⁵Uva-san-weledagoed-ibaganse, ibmar-gwag-welegoed bemar nikagu gumaloed. Degi, ibmar-gwag-diged-ibagan-nagunonikoedse, bemar uva-san amba wenanai guoed. Immediki be gudii gumaloed. Degin, bogidik be-yalagi bemar bukwa gumaloed.

⁶”Ani an bemar-yargi neg-bogidikid nasikoed. Degin, dobsulidba nue-gabbukwa, an bemar-imakoed. Ibdurgan-sapurbarmalad-ursirmar an bemarga osulogoed. Degin, bar be-yalagi bila-onolegega an imakosulid. ⁷Bemar be-isdarmalad-bareginmaloed, amar es-suidgi bemarse burgwemaloed. ⁸Bemar-walatale, dulemar-dulatar-mergued (100) bareginmaloed. Bemar-dulatale (100) dulemar-miliambe-mergued (10,000) bareginmaloed. Be-isdarmalad bemarse es-suidgi burgwemaloed.

⁹”An ise-nued bemargi binsaoed. An bemar-omelogoed, dulemar-ichesuli-guega an bemar-imakoed. Degin, an-bemarbo-igar-mesisadi maiguguega an imakoed. ¹⁰Ibmar-gwagmar-sabolesmalad bemar gumaloed, degine, ibmar-gwag-binid-wesmalad-sabogega, birga-nasadgi ibmar-gwag-gwabgusad be midmaloed.

¹¹”An bemar-abargi maigu guoed. An isdar bemar-dakosulid. ¹²An bemar-abargi gudii guoed. Ani an bemar-Bab-Dummadga guoed. Bemarmoga, be an-dulamarga gumarmogoed. ¹³Ani an bemar-Bab-Dummad-Jehová gued. Ani an Egipto-yargi bemar-onosad, adi, bemar Egipto-dulemar-e-maiga mer bar-guegar. Bemar mer bingegudii gumalaga, maiga-gudiidgi an bemar-onosad.”

Bab-igar-maidba-nanasurmalad sabsur-odurdaklegoed

(Deuteronomio 28:15-68)

¹⁴Bab-Jehová, Moisés'ga sogdebalid: “Ar bemar an-itosurmalale, degi, an-negseleged-igarmar-mamaidba be dasurmalale, an sabsur bemar-odurdakoed.

15 An-igarmar-mamaid be baisur dakmalale, an-igarmar-bemarga-uksadba be nanasurmalale, bela an-sogedba be dasurmalale, degine, an bemarko-igar-mesisadgi be annadmalale, 16 an weyob bemarko-sabsur-imakoed: Ukiar dobed-dummad bemargi nagunonikoed, bonigan-dummagan, degi, uellemalad-dummagan begi an barmidagoed. Wemala, be-ibymar oichogoed, degi, be-sanmar noloo imakoed. Be-ibmar-gwag bemarko binsa digmaloed, ar ade, dule-baigan bemarko ibmar-gwag-digmaloedi gunmaloed. 17 Bemargi nue-dummad an yolegoed, degine, bemarko be-isdarmaladse galakuega an bemarko-imakoed. Be-isdarmaladse bemarko ebipiledii gumaloed, degine, dulemar bemarko-bareginnosurmar-inigwele, degite, bemarko wakinmamai gumaloed.

18 "Deyob an sabsur-bemarko-odurdaked-sorbali, amba bemarko an-sogedba dasurmalale, be-isdarmalad-ular, ilagugle (7) bur bule sabsur an bemarko-odurdaknonisunnoed. 19 Bemarko be-san-dummarba-imakmaladi, an san-bipii bemarko-imakoed. Nibneg esgoroyob, an bega imakoed, degi, napadi esgoro-gordikidyob an bega imakbaloed, ar ade, dii wiosulid, degi, napagi ibmar-sanmakosulid. 20 Binsa dummad-arbanai be guoed, ar ade, napa isguosoggu, ibmar-gwag-be-digsale, bega sanmakosulid. Degine, be-sapimar bega sanmakosurbalid.

21 "Ar amba a-sorba, bemarko angi yolenanaimalale, an-sogedba bemarko dasurmalale, be-isdarmalad-ular, ilagugle (7) bur bule boni-dummagan bemargi an barmidagoed. 22 Degine, bemargi ibdurgan-sapurbarmalad-ursilimalad an barmidabaloed, adi, be-mimmigan ese bergumalaga, degi, be-moli-bebe-nikamalad bei oburgwemalagar. Degisoggu, bemarko ichee-gudmalosoggu, dule-be-igarba-nanamalad sate gudmaloed.

23 "Weyob an bemarko-sabsur-odurdaknanaidgine, amba bemarko nugusurmalale, amba bemarko angi-yolenanaile, 24 ani an bemargi yolemarmogoed, be-isdarmalad-ular, ilagugle (7) bur bule boni-dummagan bemargi an barmidabaloed. 25 An bemarko-ebo-igar-mesisadba bemarko dasurmalale, bemarko urwenanaidgi, es-suidgi-burgwega an bemarko-imakoed. Ar bemarko bemarko-neggweburgi be dukunadmalale, uelleged-dummad begi an barmidoed, degine, bemarko, be-isdarmaladse be galakumaloed.

26 "Mas-sate an bemarko-imakoedgi, soo-gwagwengi omegan-warambe (10) bemarga mas-dunai guoed. Mas ise-wilubsaar-mimidmalogu, mas ichee-gusoggu, immelegosurmalad.

27 "Ar deyob sabsur an bemarko-odurdaknaid, amba be an-itosurmalale, amba angi bemarko yolenanaile, 28 agine, bemargi ise-yolegar nue an sae-itogedgi, an-sunnad bemargi yoledsunnoed, be-isdarmalad-ular, ilagugle (7) bur bule boni-dummagan bemargi an barmidabarsunnoed. 29 Be-masmala be gutemaloed, be-bunamala be gutemaloed. 30 Be-bab-dummad-baiganse-gormalad-e-aila-matusurmalad bei an osulogoed, be-bab-dummad-baiganse-gormaladga ina-wawadikid-e-aila-sobarmalad bei an bibisgoed. Be-bab-dummadyob-imakmalad-burgwarmaladgi, be-muimar an mesoed. Isdar an bemarko-dakoed.

31 Be-neggweburmar an bibisgoed, be-bab-dummad-baiganse-gormalad-negmar an bibisgebaloed, degine, be anga ibmar-ogumakar-ukmalad bei an abingaosulid, ar ade, isdar-yapanne anga guoed.

32 "Be-yala bei an bibisgoed. Be-isdarmalad be-yarse nonimalogua, amarbela geger be-yar dakmaload. **33** Bemar dule-baid-baid-bukwamaladse-aisakiega an be-imakmaload, degine, be-isdarmalad es-suid-gani bemar-bareginnega an imakoed. Be-yala, dulemar-sate guoed, degi, be-neggweburmar bela bibisgar guoed. **34** Geb degine, be-isdarmalad-yargi be bukwaloadegine, be-yardi olloo mellesii guoed. Geb agine, be-yala wis obunnogued. **35** Ar igi be maidgi, be-yala obunnoged-birgagi obunnosawilubbina, deyobi, bemar maiosurmaladgine, be-yala obunnogued.

36 "Bemar-dula-bemaloedi, be-isdarmalad-yargi bela-belad dobed an begi nasikmaload. A-ular, binsa sapi-gagan-argwanedgi bemar gwakiar wakinmamai gumaloed. Ar igi dule es-suid-idu wakitedamala, deyob bemar wakitemaloed. Ar dule bemar-bareginnosurmar-inigwele, degite, bemar aimukudmaload. **37** Es-suid-idu wakinmamaiyob, dule bemar-bareginnaanai-guosurmar-inigwele, na be muchub-muchub yolenanai gumaloed. Be-isdarmalad-abin bemar gwisguosurmarbalid.

38 "Dulemar-baigan-yargi be burgwemaloed, be-isdarmalad-yala be-obelomaloed, agi, be diglemaloed. **39** Bemar-burgosurmaladdi, be-isdarmalad-yargi aka bur bule wiledmaload. Bemar isgusmalad-ular, degi, be-babgan-isgusmalad-ular, be deyob gumaloed.

40 "Ar bemar-isgusadba, degi, be-babgan-isgusadba, be anga bangudigumalad, be anga yoledigumalad. **41** Ar a-ular, be-isdarmalad-yarse an bemar-barmidoed. A-yargi-gudiidgi bemar-isgusmalad na be magar-itononimalale, be anga sokarmalale, anmar bukib-itomarye, **42** geb agi an, Jacob-ebo, Isaac-ebo, degi, Abraham-ebo-igar-mesisad an ebinsaoed. Deunni, amarga an sogsad, yar an bemarga ukoye. A-yargi ise-nued an egi binsaoed. **43** A-yargi bemar bangudogua, bar egi be megmalosulidgi, a-yala obunnonai guoed. Bemardi, be-isgusmalad-ular be sabsur-odurdaklemaloed. Ar ade, an-igar an bemarga uksamaladi, bemar abingassurmalad, an-igar an-bemarga-mesismaladi, isdar be daksamalad.

44 "Ar be-isdarmalad-yargi be gudigumalo-inigwele, amba an be-iegosurmalad. Degine, bela be-obelogedse an be-imakosurmalad. Ar an deyob imakdele, degiile, bemar-dadgan-ebo-an-igar-mesisadgi an annao-itole. Ar ade, ani an be-Bab-Dummad-Jehová gued. **45** Be-dadgan-ebo-an-igar-mesisad, an iegosulid. Deun, an bemar-Bab-Dummadga-guega, Egipto-yargi dulemar-baigan-wagab an bemar-onosad. Ani an Bab-Jehová gued."

46 We-igar-uklesmalad, degine, dulemar-odurdakega-igar-uklesmalad, deun, Bab-Jehová Sinaí-yargi Moisés'ba Israel-dulemar-ebo igar mesis gusad.

7. BAB-DUMMADGA IBMAR-NUGSALEGARMALAD

(27:1-34)

Bab-Dummadga-dulemar-nugsalegarmalad-onolegoed-igar

27 ¹ Bab-Jehová, Moisés'ga sunmakdebalid, ega sogdebalid:
² "Israel-dulemarga be sunmake, amarga be sogo: 'Dule Bab-Jehová'ga sogsadibe, dule-gwensak-anar an mani bennukoye, we-dule-onogega, weyob imakoed:

³ Machergan birga-durgwen-nikad (20), birga-dulapaa-nikadse (60) onogega,
 mani-dulabo-gakambe-aidiku (50) be bennukoed,
 Bab-Dummadse-goled-neggi mani-wilub-saed-siidba bennukoed.

⁴ Omegan-onogegardina,
 mani-dulagwen-gakambe-aidiku (30) be bennukoed.

⁵ Masmala birgatar, birga-dulagwenadse-nikale (20), onogega,
 mani-dulagwen-aidiku (20) be bennukoed.

Bunamala-onogegardi,
 mani-ambe-aidiku (10) be bennukoed.

⁶ Susmala nii-wargwen-nikale, birgatar-nikadse, onogega,
 mani-atar-aidiku be bennukoed.

Bunormala-onogegardi,
 manipaa-aidiku be bennukoed.

⁷ Machergan-birga-dulapaa (60), degi, birga-dulapaa-obine-nikale, onogega,
 mani-ambe-gakatar-aidiku (15) be bennukoed.

Mukwamar-onogegardi,
 mani-ambegi-aidiku (10) be bennukoed.

⁸ "Ar dule nue-wilegediile, we-igar-maidba geg bennukele, dule-irwa-Bab-Dummadse-goledse seledoed, adi, ega mani-nug nasikegar. Dule-irwa-Bab-Dummadse-goled, we-dule e-ganguedba na bennuko-itogedba, ega mani-nug nasikoed.' "

Bab-Dummadga-ibdurgan-nugsalegarmalad-onoleged-igar

⁹ Bab-Jehová, Moisés'ga sogdebalid: "Israel-dulemarga be sogo: 'Bab-Jehová'ga ibdurgan sunna uklegedile, a-ibdurganmar Bab-Jehová'ga uklesale, bela we-ibdurganmala ise-nue-islidikidga guoed. ¹⁰ Degisoggu, we-ibdurgan bipisaale ibdurgan-baidbo ogwalegosulid, ibdurgan-baidbur-nueddibe, ibdurgan-baid-bur-ichakwagwaddibe, bipisaale muchub ogwalegosulid. Ar we-ibdurgan-muchub baid-ibdurgan be ukye sogele, we-ibdurgan-warbobela ise-nue-islidikidga guoed.

¹¹ " 'Ibdurgan-Bab-Dummadga-ukleged, swilidiksulidile, dule-irwa-Bab-Dummadse-goled-asabin seledoed.

12 Geb dule-irwa-Bab-Dummadse-goled we-ibdurgan nue dakoed, adi, sogega, igi-mani-gargegu naguoe. We-mani-naguoedi, dule-baid bipisaale ogwaosulid. 13 Ibdurgan-e-ibed we-ibdurgan-onobiele, mani-soglesadba bennukoed, degine, a-ukine, a-mani-atargi-gwensak napi bennukbaloed.’ ”

Bab-Dummadga-neg-nugsalegarmalad-onoleged-igar

14 Bab-Jehová, Moisés’ga sogdebalid: “Israel-dulemarga be sogo: ‘Ar dule-wargwen Bab-Jehová’ga na e-neg-uksale, dule-irwa-Bab-Dummadse-goled we-neg nue dakoed. Nue dakogu, geb dulega mani-nug-nasikoed. We-mani-nug-naguoedi, dule-baid bipisaale ogwaosulid. 15 Ar dule Bab-Jehová’ga na neg-uksad gannar neg abegele, mani-nug-nagusadba bennukoed. A-ukinbali, a-mani-atargi-gwensak napi bennukbaloed. Geb agine, we-neg gannar egadga gunonikoed.’ ”

Bab-Dummadga-nainu-uklesad-onoleged-igar

16 Bab-Jehová, Moisés’ga sogdebalid: “Israel-dulemarga be sogo: ‘Dule-wargwen na e-nainu-e-dad-ega-uksad, Bab-Jehová’ga ukele, we-nainu ibmar-gwag-diglegedba e-mani-nug ega naguoed. Orosgisaaardakleged-cebada’ye-nugad galón-gwadulabo-gakambe-gakatar (55) sunna diglelele, mani dulabo-gakambe (50) aidikued-wilub ega naguoed. 17 Dule na e-nainu Gannar-Ibmar-Ukleged-Birgagi Bab-Jehová’ga uksale, nainu-gargegued-soglesadba e-mani-nug naguoed. 18 Gannar-Ibmar-Ukleged-Birga-sorba Bab-Jehová’ga e-nainu ukerdina, dule-irwa-Bab-Dummadse-goled ebisoed, birgabigwa Gannar-Ibmar-Ukleged-Birga-baidse-warmaked napi. Geb a-wilub ega mani-nug bur-bipi nasikoed.

19” ‘Ar dule na e-nainu-uksadi gannar obirbiele, nainuga mani-nug-nagusadba bennukoed, degine, a-ukinbali, a-mani-atargi-gwensak napi bennukbaloed. Geb agine, we-nainu gannar egadga gunonikoed. 20 Ar dule we-nainu gannar obirsulile, we-nainu dule-baidga manigi uklesale, we-nainu dule bar obirosulid. 21 We-nainu Gannar-Ibmar-Ukleged-Birgagi ollorgunonikogu, we-nainu Bab-Jehová’gadga gunonikoed. Degine, nainu-islidikidga gunonisunnoed. Geb degine, we-nainu dule-irwa-Bab-Dummadse-gormaladgadga gunonikoed.

22” ‘Ar dule-wargwen, nainu-e-dad-ega-uksasulid-baksadi, Bab-Jehová’ga ukbiele, 23 dule-irwa-Bab-Dummadse-goled Gannar-Ibmar-Ukleged-Birga-napiwilub ega mani-nug nasikoed. Geb a-ibagine, a-mani-nug-nagusadba dule mani bennukoed. Ar wede Bab-Jehová’ga ibmar-swilidik uklegaledid. 24 Gannar-Ibmar-Ukleged-Birga-nagunonikir e-ibed-sunnadga we-nainu gannar uklegoed.

25” ‘Bela ibmarga be mani nasikalile, Bab-Dummadse-goled-neggi mani-wilub-saed-siidba ega be nasikoed. We-mani-e-wilubde gramo-ambe (10) aidikued.’ ”

Ibdurgan-gebe-gwalulesad-onoleged-igar

26 Bab-Jehová, Moisés'ga sogdebalid: "Israel-dulemarga be sogo: 'Ar ibdurgan-gebe-gwalulemaladdi, gusgu bato Bab-Jehová'ga uklegaledsoggu, gege be Bab-Jehová'ga uked, ar bato egadid. Ar moli-bebe-nikaddibe, sibat-wawaaddibe, wemarde bato Bab-Jehová'gadid. 27 Ar ibdurgan swilidiksulile, e-ibed we-ibdurgan-onobiele, mani-nug-nagusadba bennukoed, degine, a-ukinbali, a-mani-atargi-gwensak napi bennukbaloed. We-ibdurgan-onosulirdi, e-mani-nug-nagusadba dule-baidga manigi uklegoed.' "

Ibmar-ilagwen-ukar-imalsad, geg bar onoleged-igar

28 Bab-Jehová, Moisés'ga sogdebalid: "Israel-dulemarga be sogo: 'Dule-gwensak Bab-Jehová'ga ibmar-ilagwen-ukar-imalsale, gege bar manigi uked, gwen onogosurbalid: Duledibe, ibdurgandibe, nainu-e-dad-ega-uksaddibe, manigi ukosulid, gwen onogosurbalid. Bela Bab-Jehová'ga-ibmar-uklesadi, nue-islidikidga gunonikoed. 29 Dule-wargwen-oburgwilegega ukabsalesgudiidi, manigi onolegosulid. We-dule, oburgwilegebed.' "

Ibmar-ambegi-gwensakad (10%) Bab-Jehová'ga-ukleged

30 Bab-Jehová, Moisés'ga sogdebalid: "Israel-dulemarga be sogo: 'Nainugi-ibmar-sanmakmalad, ibmar-gwag sanmakoeddibe, sapimar-sanmakoed-e-sanmardibe, bela wemala ambegi-gwensakad (10%) Bab-Jehová'gadid. Wemala bela Bab-Jehová'ga nugsalegaledid. 31 Dule-wargwen we-ibmar-ambegi-gwensakad (10%) wis ebubiele, ega mani-nug-nagusadba bennukoed, degine, a-ukinbali, a-mani-atargi-gwensak napi bennukbaloed.

32 " 'Moli-bebe-nikamalad, igi sibat-wawaadmardibe, bela wemarmerguedba warambegi-gwensak (10%) Bab-Jehová'gadid, ar ade, Bab-Jehová'ga uklegergebed. 33 We-ibdurganmala be dakosulid, wede nueddibe, ichakwadibe, unnila Bab-Jehová'ga bemar ukxa-imakmaloed. Deginbali, we-ibdurganmala ibmar-baidbo be muchub ogwaosurbalid. Be ogwaye sogele, we-ibdurgan, degi, ebo be ogwanaid, warbobela Bab-Jehová'ga islidikidga guoed. We-ibdurgan-warbogwadi be gwen manigi onogosulid, Bab-Jehová'gadga guoed.' "

34 Bab-Jehová we-igarmala Sinaí-yalagi Moisés'ga uksad, adi, Moisés Israel-dulemarga we-igarmar ukmogagar.